

臺灣外記

國學叢書第六種上

臺灣外記

上海均益圖書公司印行

臺灣外記序

余於乙丑春間獲交珠浦江子東旭蓋循循然重厚博物君子也嗣出其所輯臺灣外記三卷屬序於余余讀其書起於擁衆明季迄於敗止垂六十年其間島嶼之阻絕城壘之沿革鎮弁營將之忠佞勇怯以至沿海之戰蹟區畫靡不瞭如指掌筆力古勁確有龍門班椽風其書專爲鄭氏而作始於明太祖非著明之始所以著鄭氏之始也首誌顏思齊所以著鄭芝龍之始又以著臺灣開闢之始也至於紀闖賊之流禍載馬相之擅權列三藩之反側藉爲鄭氏引線故不詳其說非具有三長者不能也按成功以隆武賜姓逃竄海外奉朝三十有七年仗義守節庶幾田橫之遺矣是書以閩人說閩事詳始末廣搜輯迥異於裨官野史信足備國史採擇焉余故乘而序之

康熙甲申冬

岷源陳祈永





臺灣外記序

三

鄭氏世次

鄭芝龍

字飛皇。福建泉州府南安縣石井人。在日本國娶翁氏。生森。繼娶顏氏。生子四。恩、蔭、渡、襲。

鄭成功

芝龍長子。名森。字大木。南安學生員。隆武賜姓朱。名成功。妻董氏。容先長女。生子十。經、聰、明、睿、知、寬、裕、溫、柔、發。年三十九。卒於臺灣。

鄭經

成功長子。字元之。妻唐氏。顯悅女孫。無出。陳氏生子六。壘、壘以下幼。未詳。年三十九。於卒臺灣。

鄭克塽

經長子。才能剛正。令其監臺。迨經死。馮錫范譖。諸叔以螟蛉說於董氏。



共謀殺之年一十八。妻陳氏永華女。翰林夢球妹。懷孕盡節。人無不嘆之。
鄭克塽

經次子。降清封正黃旗漢軍公。妻馮氏。正白旗漢軍伯錫范之女。
附記

鄭氏起事於天啓元年。至康熙癸亥降清。共六十三年。

臺灣外記上卷

明萬曆三十二年甲辰三月十八日有閩人鄭紹祖者後改名子名一官芝蘭名

越戊申一官五歲紹祖送啟蒙取名國桂頗聰明庚戌歲七歲讀書放牛歸

於途戲石過牆誤中太守蔡善繼紗帽繼失驚遣人擒入紹祖始為免巾請罪

善繼見一官眉目清秀氣宇軒昂贊之曰此寧馨兒也賞而釋之

天啓元年辛酉一官年十八性情蕩逸不喜讀書有膂力好拳棒潛往粵東香

山澳尋母舅黃程程見雖喜但責其當此年富正宜潛心無故遠遊擅離父母

一官詭答以思慕甚殷特候起居非敢浪遊程留之

天啓三年癸亥夏五月程有白糖奇楠麝香欲附李旭船往日本遣一官押去

然前日本與今不同今之日本凡船隻到港人都入在班中拘束不許四處散

歇交易只許六十萬兩各船攤開數足將餘貨發還給水米蔬菜駕回昔之日

本最敬唐人凡各洋悉唐朝與通故稱中國人曰唐人船一到岸只有值日庫街擊頓公司貨物司

乃船主的貨

其餘搭客暨船中頭目夥計貨物悉散接居住。其婦人雖跣足蓬

頭而姿色羞花。宛如仙女。且頭髮日日梳洗。熏以奇楠。不似中國抹以香油也。

客至其家。最敬者或茶或酒。杯盞必擦以頭髮。然後斟而送客。其奇楠氣味。齒

頰生香。所以抵日本者。老誠亦彼迷墮。况一官正在方剛之年。本街有倭婦翁

氏。倭日本別號年十七。天嬌絕俗。美麗非常。見一官魁梧奇偉。彼此神交。第不得即

爲雙棲並一耳。一官遂聘之。合巹後隔冬住下。凡洋船乘風而回而未回者故曰隔冬時有福建

漳州府海澄縣人顏思齊。字振泉。身體雄健。武義精熟。因宦家欺凌。揮拳斃其

僕。逃日本。裁縫爲生。居有年。積蓄頗裕。疏財仗義。遠邇知名。

天啓四年甲子。夏。唐船販日本者甚多。思齊與大赤般財副楊天生交稱最好。

天生字人英。泉州晉江人。赤般船名財副管理一船貨物算法精敏。最熟大刀。且言語便捷。桀

黠多智。朝夕盤桓。遂成水乳。一日偶共飲微酣。思齊嘆曰。人生如朝露耳。若不

能揚眉吐氣。虛度歲月。差作醜髯丈夫。天生曰。舜何人也。予何人也。有志者亦

若是長兄有此雄畧。何愁久困。以余度之。此地可圖。思齊嘆曰。吾亦有心久矣。其奈力微何。天生曰。先以得人爲要。弟當憑三寸不爛舌。鼓動各船之傑者。尊拜我兄爲盟主。然後徐徐說之。則事可成矣。思齊曰。此非吾弟不可。事成富貴與共。聞李德船中有一洪陞。爲人慷慨豪邁。甚好籐牌。天生曰。與弟最厚。字泉卿。係興化府莆田縣人。其迺祖至同安。因而在同住家。籐牌正跳七尺。倒跳一丈。思齊思此人當招之。天生曰。他亦極慕長兄名譽。二人談得投機。直至酩酊方別。次早天生邀陳勳同到張弘船中。弘字子大。泉之惠安縣人。剛直勇敢。能舉五百觔青石。徧行教場一回。面不改容。故號爲鐵骨張弘。適陳德林福亦在船中。福字振祖。手足便利。善使標鎗炮火。泉之同安人。天生叙談之際。就提起拜顏振泉爲盟主之事。衆咸喜焉。林福舉李英。莊桂。楊經三人。年少義俠。陳衷紀。舉林翼。黃碧。張輝。王平。黃昭五人。福即同天生往招李俊臣。臣名明。漳之南靖人。風流灑脫。甚精鉞頭。俊臣許諾。天生等回。於途遇鄭一官。與何錦。天生招

之一官舉高貫武藝超羣。並余祖方勝許媽黃瑞郎唐公張寅傳春劉宗趙鄭玉等共二十八人。於六月十五日。大結燈綵。香花牲儀。列齒序行。以鄭一官爲尾弟。禱告天地。衆拜振泉爲盟主。大開筵席。暢飲而散。自此之後。親契友愛。勝於同胞。惟天生每用言挑撥諸人。說日本地方廣闊。上通遼陽北直。下達閩粵交趾。眞魚米之所。若得佔踞。足以自霸。陳衷紀陳勳張弘洪陞高貫五人咸動心。向振泉謀曰。天生所言誠是。大哥不可失此機會。振泉曰。公等如兒戲然。奪人之國。豈爾我數人而可。洪陞曰。非此之謂。未知大哥如何。大哥意若決。則吾會中諸人立呼可就。毋煩周折。其餘當徐徐誘之。則大事成矣。振泉曰。事當密秘。觀人而言。偷一造次。性命攸關。諸人領諾而去。洪陞張弘楊天生既得思齊實意。欲往李明船中。途從砲臺經過。見守臺倭番整肅羅列。火砲齊備。天生猛省一驚。顧陞與弘曰。砲臺如此嚴謹。如此整備。恐難下手。陞笑曰。砲臺嚴謹。不過見我等船欲起身。加意提防耳。此何必介意。天生曰。君既胸有成算。試畧陳

其槩。陸曰。兩臺倭兵。不過百有餘人。所恃者。惟數門大砲。以弟愚見。每臺只用。膽勇者。五六十人。或清晨。或黃昏。乘其交換。無備時。衝入將守砲者。砍倒砲車。扭轉連放數門。彼知所恃者。已爲人奪。安有戰志。另擇一位驍勇者。統之。從中。趕殺。再分百人兩邊。放火喊殺。則可得矣。天生點首曰。所見畧同。遂到明船。與高齊李英傅春等商議。英曰。不乘此時。齊集舉事。更待何時。弘曰。言之誠當。不勝於終年波浪。馳逐乎。天生曰。還須與大哥酌定。衆曰。然。同到思齊寓中。天生述衆意。勸速舉事。齊曰。凡事當料。己料人方保萬全。豈可苟且。倘畫虎不成。反類狗。天生曰。兄所慮者。恐人心未一乎。齊曰。然。天生曰。俟十二日。弟設數席。請諸位。令其各書名押號。並密約策應備敵之計。齊曰。此最要著。賢弟宜亟行之。十二日。天生治席。請二十七人。咸至。依次而坐。酒至數巡。天生向陳衷紀曰。今歲我等。舡隻不知交易幾多。貨物配搭。不知幾多。鎊金計搭幾多。板銀計搭幾多。何船得利。何船虧本。衷紀曰。別船不知。就弟舡中計數。虛頭大約獲利無幾。

天生曰。冒波濤而涉風險。不能得利。亦就難了。杲卿曰。生理都好。奈此中抑勒。不與我等親自交關。憑他當事掣肘。京客尙有三年不得貨者。子大笑曰。我等出於千波萬浪之中。反爲倭奴束縛。將幾間板屋。放一把火。大家焚了罷。天生只自不應。衷紀曰。長弟不用過慮。子大之言是也。弟亦有心久矣。恨無首領提調耳。今日大哥在此。衆人協力。衝鋒破敵之事。弟獨任之。天生曰。二位酒言。我等至此。頂履別人天地。休作兒戲。思齊曰。幸座中都是我等。若有外人。豈不惹出事來。衷紀曰。小弟之言。實出肺腑。並非醉語。杲卿曰。人生貴適志耳。碌碌何爲。凡我在座。聽弟一言。衆曰。謹聽鈞諭。杲卿曰。今日此會。實乃天緣。生於中國。而獲聚一島。況大哥德望。素爲人欽仰。共扶爲主。乘時踞此。同享富貴。何如。衆大喜曰。是天生杲卿卽斟酒一杯。禱告天地曰。座中諸人。苟有異心者。天其殛之。禱畢。又斟酒一杯。共扶思齊上座。環跪曰。今日之事。大哥主之。富貴與共。生死勿替。若有違約束者。鳴鼓共誅。思齊曰。諸位莫非醉否。何鹵莽若是。天生曰。

大哥勿太執。我們所言實從心出。今日化家爲國在此舉。取禍殺身亦在此舉。幸爲主決。莫作婦人之仁。齊曰。賢弟今日醉言。恐明朝酒醒。悉都忘卻。豈不誤事。天生曰。應立個規矩方可。杲卿曰。有單在此。衆人各書名簽號。以便調度。衆欣然曰。言甚有理。遂各按名下書押畢。遞與思齊曰。願聽約束。思齊曰。齊寔不才。因一日之長。既蒙推之。凡事當聽吾言。共成富貴。衆咸曰。毋再反悔。卽赴湯火。亦不敢辭。飲至三鼓方散。甫出門。見天昏地黑。雨箭風刀。飛沙走石。鼓浪興波。令人震怖。時正七月十四夜。適一官生一子。見火光耀室。心暗喜焉。思齊率衆拜賀。十二日。思齊遣人請一官至寓。叮曰。此番舉事。惟汝年輕。汝須慎言語。切勿輕漏於婦人之耳。一官曰。大哥不須過慮。丈夫作事。自有定見。豈肯向兒女嗷嗷。齊曰。如此足見賢弟少年練達。忽天生杲卿至。問一官曰。數日忙甚。姪兒想都乖巧。一官曰。月裏孩子。聊且過日。天生曰。這就是好。但弟婦面前。此事不可與知。齊曰。今日正爲此。特請他來叮囑。恐其少年失於檢點。倒亦老練。矜

持梟卿曰。如此纔是丈夫所爲。一官曰。事貴速。恐耽延日久。人多誤。事齊曰。總在八月間矣。天生曰。業已通知各位。一應索路帆蓆。收拾齊備。乘秋潮將船悉放浮水。所有柴米蔬菜。加倍配足。使倭人不疑。船中軍器砲火。全賴梟卿與子大二位調度。其中路統衆。併上將軍衙者。衷紀西路奪砲臺。領人釘砲者。子大搶入東砲臺。督人扭轉砲車。放砲者俊臣。由東南率衆喊殺者莊桂。其陳勳從西北角抄入。放火喊殺。大哥與一官領一隊沿海接應。小弟與李英統人分路接應。其調度各船杉板預備者楊經。派定在單。大哥可著人傳諭。期在八月十五早。思齊接單閱完。將單交一官。令他前去密傳。一官隨到各位。通知調度。八月初四日。各船悉放落港。心整頓收拾。靜候十五日。舉事。十三日。楊經壽誕。衆備禮作賀。經留衆飲。獨李英酒多。乘醉而歸。倭婦王氏。接入股勤。伏伺於情濃之際。英將十五日欲併國王事。悉吐露焉。王氏曰。砲臺兵許多。砲又大。如何做。得英大笑曰。爾真痴婦。我們這些唐船。就許多人。又舊唐多少人。合做幾路。放

火者放火。占砲臺者占砲臺。幾許倭兵。何足介意。但爾勿驚慌。王氏曰。有爾作主。我豈驚慌。遂與英搥擦。昏昏睡去。至天明。英忘卻醉後語。梳洗畢。出門調理諸事。王氏卽請伊兄六平到家。將英夜間所言。一一通知。囑其收拾貨物。免臨時慌張。王六平開巨行。有心人也。聞此言。而自忖度曰。此輩做事。其害匪淺。出首爲是。就詭應曰。我就去收拾。忙轉身到值日街。尋值日。何必登。六平曰。爾可知唐人做事乎。登曰。不知。汝胡這樣慌忙。六平曰。唐人結黨。約在明朝。就欲焚殺併奪。登曰。汝有何據。而知其詳。六平將李英昨夜醉後對伊妹之言。細陳。登曰。果有是事。速同爾去見當事。以便啓王。必登帶六平到當事。楊復門首。問守門者曰。裏面誰在。守者曰。翁翌皇在焉。登曰。可有唐人否。答曰。無。登囑六平。汝且暫站。我先去報明。纔來叫爾。六平點首。登入。楊復望見。問曰。爾今日值日來。此何事。登曰。有要話欲回。復曰。爲何事。如此要緊。登曰。可有唐人在此否。復曰。只翌皇爾我三人。登曰。此就說也。無妨。將六平所言。伊妹始末。一一陳說。復曰。

王六平呢。登曰。現在門首。復曰。叫他進來。登出叫。六平入見。復曰。唐人如何做事。爾焉知其詳。當確實有據。不可妄生枝節。六平曰。我原不知其情。因李英是我妹夫。昨夜乘醉歸家。與我妹說其始末。囑勿驚慌。故此舍妹早間叫我過去商量。我知而不言。罪同叛逆。特來出首。復曰。然有之。我此數日見唐人備辦物件。收拾器械。與往歲不同。今汝妹之言。大約不虛。此乃土地之靈。王上之福。翌皇爾且回去。別日來清數。爾亦外面打聽。我領他去啟王。翌皇就出來。忙奔到家。見一官抱孩子。同女兒。在氍踏絲上頑耍。翌皇翁氏之父一官之丈人。忙曰。一官不好了。爾等唐人做事。當被李英妻舅。王六平出首。纔去啟王。就有兵出來擒拏。汝可速下船逃生。一官聽見。魂不附體。飛跑出門。恰轉西撲面。遇天生杲卿子大三人。一官忙捏於旁。曰。不好了。事已洩漏。王兵卽出。可快下船逃走。我去報大哥。三人聞說。分頭轉傳各人。一官奔思齊寓中。正遇陳衷紀莊桂高貫余祖何錦傳春計議。忙曰。我丈人來說。王六平出首。事已敗露。王兵卽來擒拏。快快下船。

齊曰爾等快去傳說各人速速下船。只陳衷紀傳春二人同一官思齊各執大刀奔至海邊。見唐人紛紛亂竄。正十四日未刻。秋潮已漲。各船杉板本處花葉日本小。悉灣泊岸邊。思齊忙喚衆人下船。都各各爭先。急搖到大缸。起鎮者起缸名。鎮起帆者起帆。當其慌忙之際。遙見倭兵亦四出擒拏。乃是必登隨楊復啟王。王傳鎮國將軍到。正在疑惑間。欲差人來喚李英說實。而四處值日見唐人鼎沸。造反。王隨傳兵馬齊出。撥將前去謹守砲臺。放打唐船。岸上有走不及者。或至海埕。無船者。有羣爭上船。而船覆者。有得上船而急搖者。思齊招吶快來抽起杉板。開駛出口。思齊一船正要開頭砲臺上。大砲連發。倭人亦慌忙。兼之潮落。風又微順。各船亦悉轉頭。坐潮緩緩而行。雖砲聲不絕。卻無壞船。一個時辰。船咸出口。思齊站在尾樓上。見將到洲仔尾。令人放砲。打招旗傳令。今晚暫泊此處議事。但思既倖脫虎口。船不急去。而就泊港外。豈不虞倭人出追乎。日本因前犯浙閩粵東三省邊界。擄掠陷城。總制胡宗憲令大將戚繼光追捕。勦殺。

殆盡。所剩回者可數。國王從此將大小船隻去舵。以絕不肖倭人出洋作反。思齊籌之熟矣。料他船隻缺舵。難以追趕。正傳灣泊。諸船聞號砲。悉一條鞭停住。落鎖。各搖杉板。到齊船中。齊接衆人上船。互相安慰。畢。乃曰。幸脫此險。不知諸兄弟可有失落否。天生曰。都下並無失落。齊著團坐。齊曰。只差一日。就得成事。莫非天意。若不是一官通知。幾乎遭難。此亦列位福氣。但不知何由得知。一官答曰。是我丈人。往楊復班中算數。何必登領王六平出首。說是英兄被酒漏言。英兄嫂對伊兄六平說。囑其收拾貨物。因此六平得知。正往出首。楊復著我丈人。且回。就去啟王。我丈人飛跑來家。叫我快走。出門就遇陞兄。他們三位方說與知分頭通報。因此得脫。齊問英曰。汝昨晚如何與弟婦說。英曰。醉了亦都不知。有說甚麼話。杲卿曰。醉後失言。往往有之。今悔莫及。且速商量退步。齊曰。出來共多少船隻。天生起來點數。共一十三艘。當各分配支更。聽吾號砲。一齊放洋。暫到舟山。再作商量。衷紀曰。舟山何用。若到舟山。人都散了。人散則孤立。難

以濟事依小弟管見。將此十三艘船。乘此秋風。直駛臺灣安頓。天生曰。此言有理。齊曰。就煩衷紀子大二位爲頭。程日陞號帶夜放火箭。以便觀望跟蹤。天生曰。如此甚好。暫且過船料理。衆各告別。十五日。天明思齊船中號砲三響。各船魚貫隨行。計八晝夜。方到臺灣。卽安設寮寨。撫恤土番。然後整船出掠。悉得勝焉。故閩浙海邦。咸知思齊等踞臺橫行。一官父紹祖已死。季弟芝虎。同其四弟芝豹。從兄芝堯。附搭魚船往尋。是以聲勢愈大。

天啟五年乙丑秋九月。顏思齊因往豬羅山打圍回來。

卽諸羅縣

歡飲過度。隨感風

寒。自知不起。與天生諸人訣曰。共事二載。本欲與諸君取富貴。豈期今日染此重病。中途分別。天生等慰之曰。疾病人所難免。時加調養。自好。何必過戚。齊曰。雖然奈大數已盡。難與諸君揚帆波濤中耳。言訖。嗚咽而死。天生等隨卽殮殮。設位衆軍掛孝。完百日方祭奠除靈。十二月初二日。天生集諸位商議。再推一人統衆方。杲卿曰。弟有一言奉告。不知列位尊意如何。衆曰。所言合當。豈有

不遵之理。臬卿曰。我等這番所爲。雖未得日本。而禍不臨身。兄弟等又完全。此乃一官一人之力也。奉爲盟主。於理頗合。齊曰。吾等願傾心矣。天生曰。當選吉日。楊經曰。初八日大吉。我等尊拜一官爲首。

按獵歷明季諸舉記事。又說拜劍躍起。遂扶芝龍爲首。又一說芝龍與陳衷紀陳勳等十人。各乘一舟。亡臺灣爲盜。風引桅帶攙而爲一。各駭誓曰。議以三通鼓而開者。立爲主帥。芝龍忽開。此皆互疑兩可。難爲信史。余先君諱美。鼈生同時。從永勝伯鄭彩翊弘光督師江上。繼而福州共事。署龍驤將軍印。至丁巳改職歸誠。往粵東連平州。始末靡不周知。口傳耳授。不敢一字影捏。故表而出之。噫。使當時卽以臺爲盜。旣名芝龍。則成功從何而生。於後作何附會。鄭芝龍平鄭一官功題請。致崇禎問林鈺芝龍一官是一人耶。或是二人。鈺慄然不能對。奏曰。臣待罪京師。梓里之事。不能詳知。容查實回奏。出遂服藥死。據云十船相連。尙隔有十餘丈。二十丈之間。不知海船難比河船。駕

駛相近。則兩船必有一船礙傷。灣澳落鎖。若相近。則兩船亦難獨全。兩船且難相近。何況十船之桅帶。可攪而爲一乎。附辨於末。以待採風者擇焉。

附紀芝龍從顏思齊爲盜時。名一官。至齊死。衆推渠爲首。更名芝龍。于招安之日。重賂當道縉紳。獨林銓不見其使。不受其禮。反其牘背署之曰。人有向善之心。而不與人爲善者。非也。與人爲善而又因以爲利者。亦非也。遂以義士鄭芝龍收鄭一官功。題報授職。後銓拜相。一日侍講。崇禎偶問及銓。以有人密奏其事。不敢對。附會其說出。卽服藥死。

一官曰。弟年譜在諸兄末。豈敢越分。天生曰。衆議旣決。豈可逆也。一官曰。前大哥在日。諸公在上。弟不敢置喙。今日蒙舉爲首。應有一番整頓。上下分明賞罰。雖親疎無異。偷徒如前。無上下之別。無賞罰之令。弟決不敢承此座。天生曰。不意吾弟年紀雖輕。議論大有經濟。杲卿曰。經濟豈在年紀。周瑜十三歲。尙爲都督。迨至赤壁。專師程普不服。及觀其調度。甘拜下風。今日吾弟所言。衆願折節。

相事。拱聽約束。一官曰。既承諸兄相推。但初八期亦太逼。恐備辦不及。我意且至十八日舉行。天生曰。如此最妙。今要備辦何物。一官曰。旗幟者。乃軍中威儀。不可不新。當一槩更換。並中軍帥旗一面。俾衆人咸知所尊。糧餉者。乃衆軍命脈。不可不積。專主要得其人。船隻器械。乃衆軍衛身以禦敵。不可不堅利。而時爲修葺。決策取勝。湏得籌畫佐謀之士。爭先破敵。全賴奮勇膽畧之夫。鼓勵則賞罰當明。榮辱則升降必慎。故令出俾衆知所尊。然後進可取。退可守。不但踞此撮爾之土。卽橫行天下。誰敢與敵。我今擇於十八日。承接統領諸軍。除佐謀督造主餉監守外。另選十八位作先鋒。衆曰。謹受教。一官曰。我今爲首。取名芝龍。吾弟芝虎。芝豹。芝堯。芝燕。其餘一十二名。芝鳳。芝彪。芝麒。芝豸。芝獬。芝鷁。芝熊。芝蛟。芝蟒。芝鸞等。各寫就放盒內。拈著者卽名之。以應十八日之數。天生向衆曰。據所言。井然有條。隨分遣備。各色旗號。並收拾器械物件候用。十八日。金鼓齊鳴。三聲砲响。中軍船上。豎起帥旗。芝龍卽以天生爲參謀。衷紀子大爲總

監軍。陳勳林翌爲督造監守。楊經李英管理。一應糧餉。杲卿爲左右謀士。自名芝龍。其胞弟芝虎。芝豹。大功弟芝莞。族弟芝燕。餘十三芝。各拈就名數。拜天地。祭海島。以及舊主思齊畢。三讓然後登座。曰。芝龍菲材。既承諸位推舉。惟天在上。可表厥心。外則君臣之分。不敢借私恩。以害公。內則兄弟之情。亦不敢假公威。以背義。倘有不及。仰賴諸公指示。若在行間。全仗諸公協力。河山帶礪。富貴與共。衷紀曰。公帥以正。孰敢不正。天生曰。衆人碌碌。全賴主公提調。芝龍曰。凡事豫則立。故天時地利人和。得一則可以有爲。衆曰。然。遂設宴慶賀。盡歡而散。芝龍既爲衆所推。統領諸軍。卽料理船隻。整頓器械。

天啟六年丙寅二月。龍集衆會議。曰。今諸務頗已就緒。豈可坐老其師。我欲領戰船十艘。快哨三艘。配坐前往金廈。一以觀邊境。二可取糧餉。不知諸君意下如何。衷紀曰。主君此舉甚是。夫人情則力倦。勤則思奮。劉先主之所以泣髀肉生也。芝龍卽令杲卿衷紀調撥船艘。並選精壯勻配。杲卿二人前去派定。開單

送閱第一號先鋒。芝虎。芝燕。第二號先鋒。芝鸚。芝豸。第三號援勦。芝彪。張泓。第四號援勦。芝獬。李明。第五號衝鋒。芝蛟。芝鶴。第六號中軍主帥參謀。天生。臬卿。左右親軍。芝豹。芝熊。第七號護衛。芝堯。芝蟒。第八號護衛。芝燕。陳衷紀。第九號遊哨。芝麟。陳勳。第十號監督。芝麒。吳化龍。每船各配六十人。哨探。船仔二艘。芝鳳。芝鸞。各配二十五人。悉給發口糧一月。擇三月初三日出師。其餘林翌。楊經。李英。高貫。方勝。傅春等。領諸軍看守寨柵。芝龍看畢曰。調撥得宜。但不知先往何處。衷紀曰。今南風已發。呂宋船以及暹羅咬暗吧各港皆回。可從澎湖下。緩緩坐風。半逆半順。挨至甘吉等候。芝龍依其議。至初三日連舟出港。行二晝夜。初五早。龍又令人上桅觀望。望者回報曰。看前面之山。不是南太武。便是北太武。南太武係漳鎮海衛地。北太武係泉州同安地。龍曰。夜來南風駛上。爲是。遂傳令各船火砲軍器勿得參差。初十日犯金門。十八日犯廈門。四月杪下犯粵東之靖海甲子地方。時太平日久。人不知兵。衛所雖有指揮千百戶。水澎金門遊擊。欽依把總諸官。悉承

蔭襲寬衣大袖坐享君祿。其所轄軍士亦應操點卯而已。故芝龍得肆志。遇船一鼓而擒。登岸搶掠殆盡。其畧有紀律者不許擄婦女屠人民。縱火焚燒。斬艾稻穀。比乘風橫行。羽檄飛報。沿海戒嚴。當事者咄咄一籌莫展。惟查鄭芝龍係泉州府庫吏鄭紹祖之子。六歲時曾受知府蔡善繼擲石不責之恩。卽起善繼泉州巡海道。招安芝龍。善繼抵任。又奉巡撫朱欽相檄。差旗鼓黃昌奇係泉州府禮房。有口才。與紹祖共事。迨善繼爲海道。委之齎諭。出海招安。時鄭芝龍統船隨風馳逐。適逢雨水不順。失於取成。富者渴糶。米價騰貴。遊手好閑。悉往投之。芝龍將奪來船隻。分配駕駛。因而日盛。邊將望風披靡。不敢與敵。偶糧洗諸船於湄洲。忽報海道差官到。芝龍延之上船。昌奇曰。數載違別。果然一表魁梧。眞將軍也。龍曰。流落海外。久離鄉井。凡諸親友。有失候問。今日何幸。逐波濤而屈臨至此。執手至官廳。敘禮獻茶畢。昌奇曰。老拙與令先尊共事時。將軍纔有六七歲。頑耍丟石。擲著太守烏紗帽。本府自贊將軍非凡。將軍尙能記憶否。芝

龍曰。兒童時事。影響畧知。昌奇曰。現任海道。卽當日將軍所擲之太守也。龍曰。阿海道就是當日太府。昌奇曰。然知將軍揚名海外。恐爲沉迷。專遣老拙前來相勸。有諭在此。芝龍拆其諭曰。自爾齡歲時。儀表可愛。豈料壯年海濱寄跡。使聞之惻然。諒情非得已耳。今特遣旗鼓黃昌奇前來宣諭。及爾部屬人等。幸勿久戀迷津。須當速登彼岸。本道當爲力請。賣刀買犢。永作聖世良民。從此安插。復業歸農。坐享太平和好室家。出言於衷。幸其聽之。此諭。芝龍觀畢曰。海上弄兵。原非本意。因寄跡東洋。受困倭人。迫而成之。今既承道憲嚴命。豈敢固執。以負德意。自與諸將領商之。芝龍心感善繼之德。遂傳集衆頭領曰。我想飄飄海外。虛度歲月。總無了局。今道憲招安。意欲就撫。不知諸位心曲何如。衷紀曰。主公就撫道憲。決然垂青。我等並無夙昔之交。雖今日藉主公餘庇。倘後來道憲陞轉。官勢羅織。有司不諒。那時進退維谷。乞假我船隻。仍回臺灣。同李英等。觀看主公得意紀等再來相尋。未遲。不知主公允否。龍曰。衷紀兄所言亦是一著。

豈有不聽之理。臬卿子大陳勳等一十三人。齊向前請命。欲與衷紀同去。龍卽撥大小船六艘。糧餉薪蔬。布帛器械。俱各滿足。分支過臺。芝龍統船十二艘。計八百餘衆。同昌奇入泉州港。詣轅門。去衣帽。龍與芝虎芝豹等二十人背細泥首階下。蔡善繼令釋其縛。慰撫之曰。爾原是有家子。生在公門。况又容貌堂堂。雖爾父已死。汝應立志。以圖上進。光耀門閭。何忽作亂階。飄流海外。而暴棄至此。倘非本道。豈能瓦全。今旣翻然而悟。貴於自新。本道應爲汝詳請上憲。通行府縣。安插得所。芝龍曰。此實迫於倭番。不得已也。非芝龍敢萌此不肖之心。善繼曰。誰能無過。第患知而不改。今爾能改。自是完人。將來功名未可量也。龍等叩首稱謝出。守候軍門。安插回文。豈料巡撫朱欽相染病甚重。一切事務。悉暫閣起。月餘方愈。檢閱文書。見鄭芝龍已招安。立批該道卽爲安插。並將船隻軍器。追存造冊報繳。善繼見批。卽著昌奇將鄭芝龍所帶人衆。開造籍貫住址。以候發文行縣安插。一應軍器船隻。另造冊以便繳報。龍許諾。造完卽繳昌奇去。

芝虎說龍曰。虎不可失威。人不可失勢。今當事舉動。不過欲散我等黨羽耳。黨羽散。將來禍福未定。不如乘今夜潮退。揚帆而去。龍聞言。俛首不荅。芝豹曰。三哥所言誠是。不可錯過。追悔莫及。龍曰。逃。負道憲一片好意。芝虎曰。不提道憲還可。若提道憲。早該去了。龍曰。何說。虎曰。道憲書歎。如此安插我們。以爲恩莫大矣。安望其有格外乎。況汝又未授有官職。倘後來有事。衙門深遠。那時呼應不靈。將奈何。龍頓悟曰。若非吾弟提醒。幾乎爲其所誤。遂囑芝虎等。密傳收拾。於是夜三更。於船上放砲三聲。隨潮而去。芝龍卽將船隻人衆。駛到圍頭外灣。泊善繼聞報。知龍仍逸去。憤曰。這輩小人反覆不測。真難憑信。既不受德化。則當以法處之。隨撥文行各衛所府縣。整備以防劫掠。另具文申請軍門。時朱欽相內擢起程。新撫朱之憑尙未蒞任。勦撫之議。因此耽延。鄭芝龍得以從容。將各船燂洗。整頓帆蓆索路。軍器旗幟。乘此北風。遂下粵之海豐。攻打嵌頭村。又犯甲子靖海二所。

崇禎元年。戊辰正月。芝龍從粵回閩。銅山沿海戒嚴。全隊泊漳浦之舊鎮。朱之憑檄驍將都司洪先春。會把總許心素。陳文廉等。合勤。之憑字勉齋。進士大興人。芝龍偵知。令芝豹領船五艘敵先春。芝虎領船三艘敵文廉。芝彪領船三艘敵心素。龍與芝鳳等。率大隊從中接應。又著芝鵬各領快哨三艘。作遊兵救援。遂進師。相遇於連江將軍澳。先春揮船合進。互相攻擊。自辰至酉。衝突數十次。未分勝負。會潮泛漲。風起流逆。心素文廉二船。被流所脫。不能成隊。先春首尾受敵。無奈収入舊鎮。檄銅山、懸鐘、陸鵝、鎮海。指揮千戶把總。調撥精壯軍士。前來配駕。另弔附近沿海鄉勇。各出備捕。芝龍以先春収入舊鎮。亦不追趕。就鳴金収軍。泊陸鶯外嶼。忽細作報洪先春。調各衛所軍士配船。並鄉勇齊禦。不日出兵。龍亦整船揀將。欲決雌雄。芝豹向前獻計曰。洪先春奉巡撫差遣。便於調撥。何不將計就計。破他。龍曰。計將安在。豹曰。乘彼在舊鎮。調撥軍士鄉勇。我帶一旅。分爲兩隊。登岸。扮作鄉勇。前去策應。哥哥卽統大隊攻擊。俟將交鋒時。我在岸上。兩師

殺起。彼則水陸受敵。一鼓可擒。龍曰。此計甚妙。可乘今夜人靜。悄悄帶衆登岸。須要小心。不可露出圭角。豹曰。自然相機而行。哥哥亦速整舟師來。芝豹將海豐搶來鄉壯旗幟。豎起。挑選二百人。乘黃昏帶芝麟上岸。時洪先春調來銅山懸鐘二所軍。卽配在船。其附近鄉勇。令其接隊屯割候齊。日則放砲陞旗。夜則定更伏路。提調周密。芝豹於是夜領師登岸。天明至監墩造飯。食畢。緩緩而行。至黃昏到舊鎮。見調鄉勇先至者。咸安頓無混。分其半。與芝麟曰。汝往洲尾屯割。我在此安營。若問爾是何鄉來者。汝可應是浮南橋。若再問爾鎮海衛軍可來否。汝可應其隨後亦來。若問汝姓名。說是楊德。若問汝同來者是何鄉。汝說是湖西黃默。倘外面有信。彼船出港。當看我這裏連珠火箭起。便一齊喊殺。尋岸邊船隻。毋論大小。搶併合攻。須謹慎在意。不可孟浪誤事。芝麟依令往洲尾。凡所過問者。悉照前答之。先春見船隻收拾完備。諸軍陸續將齊。惟鎮海途遠未到。正調撥分配間。忽瞭望砲響。快哨飛報賊船至。先春卽發令各起鎮。乘潮

落沖出。再至港口。卽遇芝虎。虎站尾樓上。高叫洪先春。今日誓必擒汝。春見虎船隻。語狂言妄。隨催釐各船圍攻。曰先擒此賊。以挫其銳。指揮間。聽見岸上砲聲不絕。響殺連天。快哨飛報。有賊從岸上殺來。先春疑惑未定。而芝龍大隊至。春無奈向前督戰。芝豹芝麟。殺散鄉勇。搶併魚船。艦仔。搖旗擂鼓。從舊鎮港出。隨先春船後。合攻殺來。春首尾受敵。坐潮而遁。諸船無帥。咸星散焉。芝龍大勝。會同豹麟。亦不追趕。鳴金收軍。令芝虎領船五艘。灣泊石頭。以作犄角。又令芝豹領船五艘。泊港口。以備先春復來。自領全隊舟師。隨潮至舊鎮。犒賞諸軍。另著芝莞登岸。安撫附近鄉民。禁飭騷擾。先春走到甘吉。回望芝龍不追。其神方定。見南風微起。卽令駛上金門。投盧遊擊。再整船勦捕。遊擊盧毓英。原籍山東。衛蔭襲百戶。少年猛勇。箭有穿楊之能。兼精武藝。因日本倭番。統船犯閩浙沿海地方。總制胡宗憲。題山東參將戚繼光前來征勦。繼光素知毓英猛勇。詳請隨軍。由浙入閩。屢建奇功。陞千戶。迨興化陷。繼光奉令恢復。卽著指揮使馬飛。

龍統船。毓英副之。從福州港出。水陸合勦。光由陸路至浦尾安營。選百人帶臨時硬欲去偷城。臨時硬者。係竹打通鋸斷。每節共串之繩索。頭上另縛一橫樑。未用時。放鬆則軟。欲用時。將索推緊則硬。如一枝竹然。將頭上橫樑。掛住城堦。人可攀援而上。光帶此。令大隊掩旗息鼓。隨後而進。看火箭爲號。便倚梯攻打。行十餘步。光將手按百人胸前。內脈浮跳者。卽發回。如此數按。至興化府城下。只有自己與大旂李明二人。側聽譙鼓三更二點。遂將臨時硬掛住城堦。口含刀爬上。伏候巡更來。擒刺之。取其衣帽穿戴。敲鑼擊柝。緩步挨巡。凡遇者悉砍死。抵府署前。鼓方交四。倭番酣飲。咸熟睡焉。二人偷登鼓樓。將打更者殺倒。令李明下去附近處。放起連珠火箭。將所帶火藥。點燒房屋。喊殺。自把樓上大鼓。剗孔爬進在內。李明火號放起。火藥亦發。倭番睡夢驚醒。不知兵從天降。朦朧中互相砍殺。不攻自亂。城外大隊。見城內火箭連發。光焰燭天。掌號放砲。喊殺蜂起。雲梯齊泊。倭番兩難相顧。惟爭開四門逃竄。繼光復得城池。撲救餘火。安

撫百姓。立即整軍追捕。倭番奔下夾板。乘潮而遁。將出口。又逢馬飛龍督舟師至。夾板砲聲轟天。哨角蜂門。飛龍揮諸船。且避其鋒。統英向前。高叫曰。養軍千日。用在一朝。調我們前來。原是合勦。豈有陸師殺來。水師反繼其走。他如今是傷弓之鳥。速當進兵。以火攻之。再無不勝。好漢者跟我前進。其船首冲。飛龍聞英言。遂不敢退。亦即發令鼓噪助威。一齊攻擊。統英將火箭噴筒火朗盡放。倭番雖精砲火鳥鎗。其奈山上日夜被追。下船又逢此勁敵。終有膽戰心驚。砲發悉不準。故各船無不失措。兼之統英坐上風。乘勢所攻。火器咸粘船上。况倭番船係打僑油所造。粘著者火盡發。火借油力。風助火威。首先二船火起。倭人救之不息。各跳水死。其餘夾板望見。無心戀戰。惟逃而已。此役統英首功。擢指揮。轉陞遊擊。大有聲名。召守金門。時巡撫朱之憑。接洪先春初敗請兵。立飛檄令盧遊擊帶船。與洪先春合征。統英正在遣員知會。忽洪遊擊奔投。哭訴致敗情由。英曰。量此小醜。不難平也。長兄寬懷。隨整頓本轄舟師。同先春進勦。偵者報

芝龍。龍集諸弟曰。盧遊擊雖稱宿將。素未逢勁敵。况今老矣。無能爲也。謂芝虎曰。汝帶雙帆船五艘。扮作商船。陸續審泊島美浯。芝莞汝帶小魚船三艘。前往東鎮一帶。釣魚哨探。若盧遊擊船出。卽飛報芝虎。以便合攻。分撥去後。龍帶戰船八艘。出泊陸鵝候敵。其餘船隻。令芝鵬。芝燕等。盡藏散處。看我退師出。冲擊則彼可擒。統英自負昔日威名。大意欺敵。一見芝龍船。僅數艘。卽揮軍冲擊。芝豹率二船接敵。未幾合卽退。龍鼓全隊齊進。互相攻打。來往冲突。奈風稍逆。龍亦退下。英見其連敗。乘勢追趕。芝虎得芝鵬報。尾其後。順風而來。大叫勿趕。有吾在此。龍見虎船已到。卽揮諸船轉戰。英聞後有賊船。遂同先春禦之。芝鵬等見龍師退至港口。亦合出齊冲。統英船隊遂散。芝虎。芝豹環擊英船。英身中五箭。負疼死戰。豹將搭鉤搭住。芝虎一躍過船。連砍數人。豹亦乘勢跳過。大喝落艦者不殺。統英遂被芝虎所獲。龍見二弟俱跳過。統英船。隨合櫓前來。鳴金收軍。龍忙過船。喝虎曰。休得無禮。改容向英揖曰。舍弟鹵莽。誤犯威顏。冀將

軍汪宥。英曰：敗將惟有死而已。將軍何必加禮？芝龍曰：將軍朝廷命官，龍安敢不敬禮？非龍敢拒將軍，實不得已耳。英曰：曾聞將軍業已招安，而又逸出，今將軍不殺統英，意欲何爲？龍曰：某之受招安者，實感蔡道憲前日之恩，故不論輕重，諭到卽歸。但道憲書狀獎厲無別，不過分散安插而已。因此大衆失望，不得不逸去。英曰：以將軍之才貌，應爲干城重寄，豈肯碌碌無聞，難怪將軍其然？龍曰：苟一爵相加，應爲朝廷效力。東南半壁，卽可高枕矣。英曰：英不才，無力保薦，當爲將軍刀揚。龍致謝，帶芝虎等過船，令衆船鳴金鼓送盧將軍回師。英當被獲之際，自知必死，不料芝龍加禮相待，心實感激。次日船進廈門，見都督俞咨臯。大猷之子陳說戰敗情由，以及芝龍始末衷曲。咨臯曰：老將軍所言雖是，但我們武將只管征勦，至招安非所職掌。況將軍被獲發回，愈難言矣。英聞被獲放回之語，羞愧無地，曰：末將老而無能，故此被獲，但彼倦倦申意，又不得不爲之言。正古人所謂知而後言也。咨臯曰：將軍奉令征勦，今既如此，亦算失機。本都督

未便擅議。應自赴省聽候軍門處分可也。英作謝而起曰。謹遵諭退去。咨臬卽飛移軍門。統英亦起身。途次泉州。時蔡道憲已內轉。謹畱太守王猷。統英謁叙。猷問勝負。英備述始末。稱芝龍將才。因前受撫無職。空爲安插。恐勢官欺凌。故此逸去。倘當事假以一命。決可再招。弟細思若招此人。年少英勇。盡可用也。猷點首曰。將軍所言。甚得權宜。撫恤用人之要法。英遂赴省。但朱之憑已接俞咨臬報文。內有云。盧遊擊舟師戰敗。被獲放回。辱身辱國。莫此爲甚之語。之憑正欲修文覆咨臬。而臬已親至會見之。憑憑責臬須會師。刻期撲滅。豈可延縱。貽害地方。咨臬卽飛檄千戶馬勝。百戶楊世爵。統船二十。前去勦捕。勝與世爵出泊鎮海衛。爵謂勝曰。芝龍在舊鎮。我們之艘。分爲兩隊。明早我乘潮起。直入海內。擣其穴。彼必然情急死戰。俟潮退。誘其出港。公督十艘合擊。彼必星散。一戰可以成功。勝曰。此議甚妙。遂與世爵分船。各叮照應。芝燕芝鸞。適在東鎮瞭望。鎮海有許多戰艦。卽著兩個能幹軍士。作漁父。坐小艇帶鮮魚數觔。混入船內。

以賣魚爲田。偵探消息。尙隔里許。各相喚爭買。二人望尾樓上插五方旗者。攔賣之。故意叫苦。海面不寧。難作生活。今幸大師進剿。我們就有性命。但不知老爺是誰。軍士曰。我這船是馬老爺。那船是楊老爺。極出名會打仗。始末皆說。二人聽畢。收了魚錢。飛駕從連江還舊鎮回報。芝龍方知是馬勝楊世爵奉令前來。芝虎聞說大怒曰。亦不必煩哥哥動身。弟自領船十艘。擒此二賊。龍曰。馬楊二人是千百戶中之最驍勇者。吾弟未可輕視。虎曰。哥哥何長別人志氣。若不先擒此賊。誓不爲人。龍曰。吾弟既欲前去。須著芝豹同行。凡事要相機而動。不可恃恃血氣之勇。虎應諾。卽領船十艘。同豹乘潮落出港。天明到將軍澳前。搖旗擂鼓而進。馬楊二人遇之。笑曰。狂奴來尋死。發令迎敵。自己至未。火烟蔽空。往來冲擊。不分勝負。龍見虎悻然而去。虞其有失。自帶船六艘。前往觀敵。馬楊二人正在酣戰之際。忽見虎後添船。未知幾多。遂爾怯戰。被芝虎冲過。持火罐擲去。火遂發。世爵同軍士救無及。俱赴水死。馬勝見世爵船中起火。轉舵欲救。

芝豹尾後趕擊。虎又迎敵與戰。發斗頭砲。將勝船打穿。延著火藥。發桶火。馬勝情急。抱銅砲沉於海底。虎豹揮船攻擊。龍又合擊。連沉船三艘。餘艦星奔。龍方鳴金收軍。仍回舊鎮。馬楊所統之船燒沉五艘。敗壞六艘。其餘傷殘者。回報失機情由。兪咨臯知楊馬二將陣沒。卽咨副總兵陳希范。刻日進剿。偵卒探報芝龍。龍曰。希范酒徒耳。一鼓破之。遂整船出。相遇於杏仔。芝虎首冲其船。豹繼之。人莫敢禦。范坐潮遁。芝莞芝豹等合攻。楊六楊七船不敢前。洪應斗四面受敵。勢窘。發火自焚。張選舉砲煩銃赴水死焉。兪咨臯接飛報。調閩安興化。永寧。銅山。陸。鵝。懸鐘。鎮海。金門。衆指揮千百戶諸船齊到。聽令出師。龍偵知。集諸弟會議。芝蛟勸龍且避粵東。龍曰。咨臯膏梁紈袴。徒讀父書。虛有其名。何必遠避。芝虎曰。弟願爲先鋒。龍許之。整船以待。兪咨臯調軍已齊。以指揮張挺桂。千戶林盛二人。領船各五艘爲先鋒。指揮楊國杜。李應龍。千戶吳虎。傅圭。各領船五艘爲合後。咨臯自坐大煩船。一豎帥旗。爲中軍提調。又令指揮黃勝。胡如海。黃庭。

李廷圭。千戶周之士何世雄。林勳。姚應科。百戶王飛熊。李夢斗等。各坐船一艘。爲中護衛。冲鋒以遊擊商世祿爲監督。接應調撥已定。擇日祭江出師。芝龍在舊鎮。日則差芝虎。芝燕等。輪流駕大船十艘。快哨二艘。於陸鵝將軍澳瞭望。如有敵情。即便飛報。忽厦門細作探兪都督。于六月初八日出師。龍卽諭諸弟曰。明日此敵。惟王飛熊。林盛。李夢斗三人。深識水務。兼有膽畧。當先除去其餘。碌碌羣雞。不足介意。令芝虎爲副將。芝彪。駕船十艘。爲先鋒。又著芝豹。芝蛟。芝鳳。芝豸。芝獬。芝鷲。芝鸚。八將。各坐一船。乘夜潮。駕出青水沿。然後回頭。約明日午時。從東鎮殺來。又令芝堯。芝麒。芝燕。芝蟒。四將。領船各四艘。作左右救護。自領芝熊。芝鴛。共船六艘。居中策應。是夜三鼓。龍統衆出泊陸鵝。天明。咨臯大隊至。列陣飄颺。砲聲振天。烟焰如雲。芝虎恃勇。率諸衆冲船。與林盛。李夢斗等。互相攻擊。自辰至午。雖各損傷。卻未分勝負。芝龍見不能取勝。又望芝豹之船。未見影嚮。無奈親督諸船。亦齊冲入。忽孫雄船被芝熊尾送一砲打沉。咨臯見

雄船失。亦催船齊籠圍攻。將及酉時。芝豹大船已過東鎮。聞砲聲不絕。順其風潮趕來。咨臯見後面。又有敵船將至。急傳令與商世祿帶領船隻分禦。世祿奉令。方指揮轉舵。欲去迎敵別船。諸將不知是要分軍。誤爲退師。各轉舵。一時全軍閏動大亂。咨臯制按不住。被芝虎芝熊芝堯芝燕四將乘虛奮擊。王貴林盛二船發火。芝豹芝蛟又從後殺來。臯首尾受敵。兼之潮起風逆。各星散而遁。咨臯亦退。芝龍揮軍急追。又連擊壞船三艘。至浯嶼天昏。方鳴金收軍。

崇禎元年六月初九日。俞咨臯遁入廈門。不得連隊。而軍失紀律。快哨又報芝龍大隊。咸屯島美浯嶼。急傳指揮傅圭領船十五艘。前去南山邊青暗一帶灣泊。防其突入廈門。百姓驚慌逃竄。咨臯亦不登岸。卽停水仙宮前。芝龍至五更水漲。吹角進師。圭整船迎敵。芝虎擂鼓爲首。圭船稍怯。龍乘勢趨其大隊齊攻。圭大敗。臯急催師進接。已無及矣。悉回舵星奔。龍追至海門收軍。號令不許登岸。搶掠。卽退出廈門港宿夜。天明仍將舟師收回舊鎮。咨臯走至三叉河停泊。

申報欲再大會師合勦。工科給事中顏繼祖論俞咨臯疏曰。鄭芝龍生長泉州。凡我內地之虛實。了然胸中。加以歲月所招徠。金錢所誘餌。聚艇數百。聚徒數萬。城社之鼠狐。甘爲爪牙。郡縣之胥役。盡屬腹心。鄉紳偶有條陳。事未行而機先泄。官府纔一告示。甲造謗而乙訛言。復以小惠濟其大奸。禮賢而下士。劫富而施貧。來者不拒。而去者不追。故官不憂盜而憂民。民不畏官而畏賊。賊不任怨而任德。一人作賊。一家自喜無恙。一姓從賊。一方可保無虞。族屬親故。擊楫相訪。虛往皆得實歸。恍若向現任官抽豐。偶或上岸買貨討水。則附近戚里。牽羊載酒。束帛承筐。惟恐後也。真耳目未經之奇變。古今曠見之元兇也。誰醞釀以有今日。則大將軍俞咨臯。無所逃罪矣。咨臯七尺魁梧。自是將種。奔馳水陸。効有微勞。只因以吳淦夫爲兒女壻。淦夫晉江人。庚戌進士。綫索相通。狼狽相依。遂至藐簡書如弁髦。視桑梓如秦越。丙寅招撫之議。實傾賊囊以充私橐。敢於孟浪主張。爾時按臣周昌晉及藩臬諸臣。多訝其非策。而舊撫諸欽相憐。地方疲困。不

樂觀兵。姑聽其言。收楊六楊七以爲用。豈知撫寇者。必未撫之先。曉以利害。示以兵威。使彼搖尾而乞憐。又必既撫之後。散以原籍。領以的保。使之樂業而安生。而咨臯招之海。仍置之海。首從無分別。商民任刦掠。故今日授撫之職。卽前日作賊之人。且也殺人。可以不死。家享巨室。良田之樂。而身被黃蓋。腰金之貴。人皆有所利。而爲賊何所懲。而不爲賊乎。去年春間。羽書絡繹。咨臯抱頭三山。次起觀望。及標船標兵。陸續先發。咨臯始出。副將陳希范。嗜酒有癖。占風無智。泊舟銅陵之內港。流連杯酌。哨探報驚。屈被鞭笞。賊已迫而纜未解。無怪九十餘之戰艦。千餘人之壯丁。盡投烈焰。而葬魚腹也。最可痛者。把總洪應斗。張選舉。奮不顧身。手刃賊級數顆。賊以火攻應斗。選舉以火攻賊。賊鋒稍挫。奈希范之揚帆遠遁。楊六楊七之袖手旁觀。應斗自知不免。發火而自焚死。選舉勢窮。抱銅炮自溺於海底。有心人咸爲流涕。希范既以身免。猶誣應斗以未知著落。天日在上。將誰欺乎。此恤典宜急。以慰忠魂。至撫臣朱之濂。嚴檄楊六楊七。而

杳然無蹤。咨臯始縮舌無辭。撫臣劾希范並及咨臯。人皆謂二將必伏斧鉞之誅。而錢神有靈。冰山是倚。白簡已入長安。希范尙揚揚自得。儀從鼓吹。放銃開門。咨臯則掩耳偷生。聽強寇蹂躪內地。游戲於閩安海澄石碼之間。以至賊突入鎮門。離漳郡僅咫尺。非縣令曹履泰。劉斯球。臥薪嘗膽。保障於外。巡道朱大典發令指揮。彈壓於內。斗大孤城。幾乎斷送。而漳亦岌岌乎不保矣。閩事尙忍言哉。粵艘不通。歲荒米貴。小民枵腹。莫必其命。而咨臯反委官駕船買穀。名爲給食於兵。而實則齎糧於盜。漳民事欲鬻其肉。而寢其皮。淳夫雖一手障天。曲庇咨臯。而先帝明旨。於撫臣疏中。直以攻堡燒船。傷兵損將。詰其招撫之效。安在。並究其釀禍之責。安所逃罪矣。復以按臣疏中。專責咨臯。以策後效。償前失矣。荏苒居諸。於今八月。不聞咨臯有尺寸之豎。豈謂賊稍離汛地。遂可驕語驅除之功乎。賊避北風。非懼咨臯。閩粵輔車唇齒之勢。粵危則閩不得獨安。賊若再順風爲陣。臣有以知咨臯之束手無措。此在咨臯之罷斥宜早。希范之逮問。

難寬也。疏上。下廷臣會議。僉咨臬卽解任。陳希范聽處分。於是芝龍縱橫沿海。當事者莫敢問焉。秋七月。新巡撫熊文燦接泉州府王猷條陳時事。稱鄭芝龍兩次大勝洪都司而不追。獲盧遊擊而不殺。敗僉都督師於海內。中左棄城逃竄。約束其衆。不許登岸。不動艸木。是芝龍不追不殺不掠者。實有歸罪之萌。今一時勦難卒滅。撫或可行。不若遣人往諭。退沿海外。仍許立功贖罪。俟有功日。優以爵秩。文燦卽批巡道鄧良知酌議。良知接批。卽傳王猷問曰。貴府所詳招安鄭芝龍一事。撫臺業已批下。著本道酌議。遣人招安。但查舊按。前道係差黃昌奇去者。今者昌奇已死。不知欲差何人。猷打恭曰。卑府此詳。原有其故。前日盧遊擊被獲。鄭芝龍業將衷曲。一一吐告。逮後歷觀芝龍行事。實有受招之意。今勦既不能行。日見猖獗。將爲東南所患。故卑府詳請。今撫憲既批允。以卑府管見。還該令盧遊擊去也。其事方濟。良知曰。貴府所言誠是。但盧遊擊此時在省候旨。如何得去。猷曰。須憲臺稟請。一可以救拔盧遊擊之危。二可以造生靈

無數之福。一舉兩得。良知是之。隨飛稟巡撫文燦。文燦接良知稟內稱芝龍就招意。既已吐露於盧遊擊之耳。今可著其前去。成功之日。許贖前罪等語。文燦立弔盧遊擊面詢曰。盧統英查汝履歷。屢建勞勳。堪稱宿將。爲何反遭此小寇所獲。英稟曰。罪弁奉令出征。敢不竭力。奈鄭芝龍年少猛勇。船艘最堅牢。統英所統軍士。未經戰陣。一見卽潰。故罪弁獨力難支。所以被獲。此等情由。還求憲天救拔。文燦曰。今有泉州王知府詳文招安。巡道稟請。委汝前去。若芝龍肯招安。本軍門自爲汝救解。英曰。招安芝龍。固是不難。但芝龍以前撫未加官爵。恐遭勢宦凌辱。是以逸去。今欲再去招安。若無官爵。恐不能服芝龍之心。憲天爲國爲民。必須酌議妥當。庶罪弁可去。文燦曰。芝龍不過一小寇耳。欲加大職。難以題請。若與之職小。他未必如意。統英曰。凡事當相經權。苟有利於社稷。春秋許之。今日招安鄭芝龍。不但安民生。且爲國家得人用。文燦曰。本軍門給爾令牌。前到泉州。與道府相議。酌量而行。統英叩謝。出領文牌。下泉州。先見知府王

猷致謝提拔大恩。次及招安事。猷曰。將軍此去。自然成功。英曰。芝龍自然受招。弟去招撫。尚有一事最要者。未妥。猷曰。請明其說。英曰。前見撫臺。弟亦面陳。若無官職。難買芝龍之心。撫臺著弟前來。與公祖並道尊商量。猷曰。弟前文業已詳明。著其退師海外。將功贖罪。俟有功之日。另優以爵秩。況今李魁奇併了陳衷紀。楊六楊七叛去。肆行烏洋。褚綵老劫掠沿海。劉香仔擾害惠潮。及南澳地方。將軍此去。諭其招安。擒滅諸盜。撫臺自然特本。加以重爵。爲朝廷股肱。豈不勝於遊蕩波濤乎。英曰。公祖所諭極是。足以服芝龍之心。遂隨王猷謁巡道。猷入。將所議招安始末。陳明。良知大喜。立傳統吳。莫謝救拔。畢。良知曰。撫臺發文前來。與本道同知府商議。王知府所回之話。甚然有理。汝可前去。事妥之日。本道自然申請。爲解前愆。英曰。今日得起白骨而肉者。皆老大人之賜。世世銜結。遂辭起身。竟往舊鎮。先差人通知。芝龍隨遣芝鵬。引接到船。各相致意。龍曰。今日何幸。得將軍駕臨。實慰芝龍素願。英曰。弟老而無能。前荷將軍不殺。回到中

左。被僉都督申報失機。邇蒙泉州王府尊。詳請撫臺。撫臺委弟前來招安。業將將軍衷曲。一一剖明。甚是歡喜。著將軍退師海外。立功之日。定然保題。決不負將軍歸誠之意。龍拱謝曰。此皆將軍游揚之德。異日自當厚報。須煩將軍婉回。通行各處。庶使將士便於採買糧食。英曰。此自然之理。但將軍亦當嚴飭諸人登岸。毋得放縱。以累名譽。龍曰。謹受大教。盡歡而散。九月。芝龍舉其衆降。差芝燕芝鳳帶金銀幣帛。同統英入泉州城。先見王猷。次見鄧良。知代芝龍陳始末。願拜門下。繳上厚禮。各大喜。卽行文本府沿海衛所。許芝龍軍士登岸採買。又爲申請軍門。內稱芝龍傾心向化。情願自新。立功贖罪。從此沿海地方。得以寧靖等語。交統英上省。英至省。投繳文燦。文燦卽傳英進問。英一一代芝龍稟上。願充轅門。犬馬報效。所有福建以及浙粵海上諸盜。一力擔當平靖。以贖其罪。並呈重禮。文燦大喜。收之。立卽通行全省。準芝龍招安。候旨定奪。遂以義士鄭芝龍收鄭一官功題。委爲海防遊擊。又委統英爲監督。督芝龍軍平諸盜。立功

之日再爲題請。毓英齋軍門檄諭同芝鳳回泉。見府道府道亦爲英喜。囑其速督芝龍立功。英星馳到舊鎮。會芝龍。龍詢鳳燕同道。府口氣並觀軍門題稿大悅。致謝毓英。卽整頓船隻。以便征勦。英曰。將軍此行先平何人。龍曰。陳衷紀等。原有八拜之交。今爲李魁奇所併。當誓師先除此賊。則公私可以兩盡。英曰。將軍情義深重。調度有方。眞令人感激服。龍隨差快哨出洋。偵探魁奇住處。李魁奇者。漁父也。泉州惠安人。從幼出入湄洲沿海。深識水性。身藏海底。半日不起。口能轉氣。眼見諸物。年二十九。兩臂有七百觔之力。糾合諸漁船。劫掠商艘。適會集澎湖。候截呂宋洋艘。其陳衷紀等自與芝龍分別。復往臺灣。因衆咸沾疫症。及知芝龍不意逸出。不能前進。後諸人畧痊。方統船過來聚首。不料至澎湖。遇李魁奇。奇卽揮船圍擊。陳衷紀楊天生陳勳等。原雖猛勇。終是新病纔好。安能敵奇。新出之犢。遂爲所傷。僅存李英同。通事何斌一船。仍回臺灣。故此李魁奇自霸橫行。目空羣盜。

崇禎二年四月。奇正率諸船。在遼羅地方。候劫商艘。鄭芝龍得報。令芝虎。芝豹。爲先鋒。芝彪。芝鵬。爲應援。自領芝鸚。芝豸等。同盧毓英。爲合後。時彪。虎。燕。豹。四船齊到。各逞夙威。兩相攻打。守金門之哨船。忽聽砲響。亦駕船從城仔角出。而芝龍大隊亦至。魁奇寡不敵衆。就轉舵欲遁。適南風起。龍一船牽舵乘勢冲下。芝蟒持火罐拋過。魁奇忙將木棍打落水中。芝豹藉風合擊。趕將搭鉤搭住。被魁奇一刀洗斷開去。芝麟又將火朗噴筒燒來。魁奇遂將舵擺開。悉爲橫風吹散。不提防芝虎船從後趕殺。聲如巨雷。大喝死賊。今日決難饒汝。搭鉤搭住。執牌躍過。魁奇接敵。互相交鬪。奇夥合併。虎逞力支禦。勢已危迫。幸陳霸。陳秀亦跳過。霸砍散環衆。秀一鎗刺倒魁奇。陳秀海澄人。後封武功伯。獻仙霞關投誠。陳霸南安不井人。呂姓。爲陳氏養子。人品肥矮。後封忠勇侯。踞南粵。入粵東投誠。芝龍乘勢連砍二人。餘悉伏艙。或赴水者。龍見魁奇被砍。遂大呼降者不殺。爾等原是良民。投順自然重用。是以所有船隻。咸落頭帆降。龍収其衆。令割魁

奇首級。設位哭祭陳衷紀等。然後回師。申報軍門。文燦接捷。知龍陣斬李魁奇。取其全夥。差旗鼓張彬齋諭帖銀牌。前到遼羅犒賞。並許轉題參將。巡道與泉府。亦差知事林旭齋銀牌羊酒犒賞。並安插魁奇黨。芝龍大悅。各答厚禮。具稟伸謝。六月。芝龍斬叛賊楊六楊七於浯州港。取其衆。八月。褚綵老掠閩安。文燦檄芝龍。龍追於南日。滅之。

崇禎三年庚午。夏五月。芝龍因憶火光中之異。修書遣芝燕駕船往日本。迎接翁氏。並其子回來。日本國王因顏思齊集船謀奪不成。從此加意防範唐人。而翁氏與芝龍脩爾別去。雖屢翹首雲山。其奈盈盈帶水。何惟日撫其子。喜子頗可人。又舉止異人。一日報唐船到。父女正在計念間。突聞呼叫之聲。翁翌皇出接。兩未謀面。詢其由來。方知爲芝龍差。欲接其女與甥回也。芝燕曰。奈與國王再三說無此例。豈不徒費其勞。翌皇曰。國王見書歡喜。抑有怒色。燕曰。國王見書甚喜。翌皇曰。見書若喜。再作商量。燕曰。自然還要懇求國王。難道就回也。喚

從人將所帶物件行李。悉遷上翌皇家住下。然芝龍自遣芝燕去後。偶間談間。見南風大盛。屈指芝燕到日本矣。旁有日本舊唐者。到芝龍面前言曰。到諒到矣。恐國王未必允從。芝龍曰。汝何所見。舊唐者曰。日本從來未有婦人入我國。國王焉肯特破此例。必用一計服他。然後可。芝龍猛省。爾言有理。可覓畫師。畫我形圖。駕駛無數艫。旛旌。飛揚軍威雄壯。令芝鷓帶好漢六十名。新盛亮甲器械堅利。乘此南風尾。過去聲言。若不依允。卽欲興師前來。鷓領命行。八晝夜到日本。芝鷓入港。將旗幟器械。擺列整齊。金鼓喧天。一時日本駭然。恐是侵犯之船。砲臺預放。以觀動靜。迨至落鎮。其疑方釋。芝鷓上山。將書畫圖送入國王收閱。集諸文武會議曰。鄭芝龍連發兩書。遣人前來。未知將何發付。輔國將軍啟曰。邇聞鄭芝龍兵船甚盛。今連發兩書前來。欲依他從。無此例。若不依他。恐一旦加兵。亦是費事。以臣管見。不如將兒子送還。其他婦女說從。無此例。則一舉可以兩得矣。國王大喜曰。此議甚當。立傳翁翌皇面諭。皇領命回家。與燕

鶚及女兒說知。九月北風起。國王回鄭芝龍書。送其子交芝燕芝鶚載歸。翁氏臨別之際。悲喜交集。喜者喜其父子相會。悲者悲未得見夫君。今反失其子。牽衣慟泣。芝燕芝鶚共慰之。勸曰。歸去商量。自當設法。再來迎接。隨解纜順風。十月到安海。芝龍望見其子儀容雄偉。聲音洪亮。屈指已七歲矣。迨憶生時。奇兆甚喜。延師肄業。取名森。字大木。讀書穎敏。但每夜必首翹東。咨嗟太息。而望其母。森之諸季父兄弟輩。數窘之。獨叔父鄭鴻逵甚器重焉。逵字聖儀。別號羽公。庚戌進士。每摩其頂曰。此吾家千里駒也。有相士見之曰。郎君英物。骨格非常。對芝龍稱賀。芝龍謝曰。余武夫也。此兒倫能博一科目。爲門第增光。則幸甚矣。相者曰。實濟世雄才。非止科甲中人。性喜春秋。兼愛孫吳。制藝之外。則舞劍馳射。章句特餘事耳。事其繼母顏氏最孝。於十一歲時。書齋課文。偶以小學洒掃應對爲題。森後幅束股有湯武之征誅。一洒掃也。堯舜之揖讓。一進退應對也。先生驚其用意新奇。

崇禎六年癸酉冬十一月。香仔老焚劫小程。芝龍統船擊之。香敗遁粵東。時諸賊咸稱其老。香姓劉。漳之海澄人。五短身材。性極驍勇。勾引無賴。駕小船出金門。劫掠商舡。突起猖獗。殺傷官軍。橫行粵東。碣石南澳一帶地方。

崇禎七年甲戌夏五月。熊文燦擢兩廣總督。十二月文燦檄惠潮分守道洪雲蒸。巡道康承祖。參將夏之木。張一傑。親到香船招安。被香畱困。

崇禎八年乙亥春三月。文燦會同閩撫鄒維璉。檄鄭芝龍統所轄船。收劉香仔。芝龍將新舊船隻。分爲三程。第一程芝虎芝豹爲先鋒。領船十艘。快哨四艘。第二程中軍坐駕芝龍同盧統英芝鵬芝蛟等。亦領船十艘。第三程芝彪芝鳳芝麟芝豸芝鶴芝鷗芝獬芝鸞。各領船一艘。爲援勦。擇日祭江出師。四月南風已發。芝虎等船不順。行稍緩。劉香在甲子。聞芝龍奉兩廣令牌。統船會粵師。不日卽到。劉香大怒曰。一樣皮毛。素無仇敵。何苦爲人作鷹犬也。他見我等前歲小程之役。稍避其鋒銳。彼就揚揚得意。吾誓必擒此。方快我願。卽令李虎三楊韜。

陳玉林武帶船前去田尾洋防禦。又令其弟金同康、鍾李飛熊、張斌帶船來往救援。自領大隊，脅洪雲蒸共船迎敵。芝虎船行至十月方到田尾洋，與李虎三相遇。自己至申，互相冲擊。軍士各損傷，而未分勝負。遂兩收軍。次日又戰。適香督船至，合擊。芝豹、芝虎受困幾危。幸芝鵬、芝豸、芝麟、芝燕船到，冲隊救出。退十里停泊。是晚芝龍大隊到，詢問情由。天明芝龍率諸船列陣分擊。香出，洪雲蒸退敵。雲蒸大呼曰：吾矢死報國，亟擊勿失。亟擊勿失。香大怒，遂殺雲蒸。各飄颺互攻。終日會天晚罷戰。芝龍大隊泊赤湖，謂諸弟曰：今晚我等船灣在下風，半夜水轉，劉香必乘潮水冲來。汝可帶船往來飄駛，以防不測。芝虎汝可帶船五艘，在前灣寄鎮。如遇有警，可放起連珠火箭，以便前來接應。又發令凡有船隻浮水寄鎮，頭帆勿落，火礮預備。軍士衣甲在身。劉香船仍收田尾。虎三過船見香曰：鄭芝龍恃強，不識水性。今晚在赤湖，主公可點齊船隻，多設火器。俟夜半於起乘潮順風冲去。芝龍可擒。香曰：此計甚妙。遂各預備。至二更時分，潮起風

果微來。香加額曰。此天助我誅此狂奴。卽統全隊行。甫至半途。忽前隊瞭望報曰。前面一派黑影。恐是船來。虎三曰。他船灣在赤湖港。何得此處有船。令各船提防。聽我砲響一聲。齊赴殺進。芝彪見水漲二分。卽令鎖起浮水。徐行而進。遠望前面搖動似船。乃曰。不出所料。今果來矣。鎖帆俱起。安砲守候。聽吾掌號。一面攻打。一面放起連珠火箭。虎三一船先到。卽喝前面何船。芝彪不應。令掌開砲。直沖過去。芝虎芝豹望見火箭連起。砲聲轟天。隨督隊船先來。劉香大隊亦至。渾殺至日午。稍停戰。芝龍曰。劉香調度有法。虎三真个勇猛。芝虎聽見大喊曰。此賊有甚難破。俟吾擒他。一船破隊直入。手執籐牌。口含大刀。爬在船末。望香船將近。一躍過去。亂砍。香卽接戰。衆又合圍。龍遙見。忙督船往救。芝鷓一船從橫沖去。被香橫身。槓發出。裂開沈下。芝蟒船逼進。貼在斗頭上。拋過火罐。香船著火。虎三見香船發火。急來救時。不防芝豹從後趕來。發一門斗砲。竟穿虎三船尾樓。打死舵公。透入官廳。礙火桶而藥發。直從桅邊斗頭出。其船亦發火。

虎三救不及。情急抱銃溺於海底。芝虎與劉香見火大熾。難以脫身。互相亂砍。一並焚死。芝豹、芝彪又連擊沈船數艘。方揮大旗招降。遂鳴金收其部衆。僅走劉金三船投瓊州去。送康承祖夏之木張一傑等回粵。並發還擄掠婦女。具文申報。大痛哭芝虎、芝鵠身亡。令人廣撈屍首。五日不可得。停甲子所。延僧建七晝夜梁皇寶懺。祭奠二人。暨陣亡諸將士。然後班師。劉香既滅。海波不興。鯨鯢屏跡。實賴芝龍之威制。

崇禎十二年己卯夏六月。耶必即哩哥。駕夾板船。犯閩浙地方。耶必即哩哥者。荷蘭國健將也。力能舉鼎。兼精劍術。其國之人。白面紅鬚。鷹鼻貓眼。原無船艘。因永樂差太監王寶三下西洋。徧歷諸國。聲言取寶。實偵建文船。到其國。國人懇求船式。三寶慮其有船。則可渡海。騷擾邊疆。故意持一管壞筆。畫一个扁圈。中間首尾。直豎二三節。將筆毛刷開。亂畫幾畫。與他豈知荷蘭人性乖巧。就畫樣打造。所有筆毛。一畫安繩一條。爲船中索路。造成船艘。駕駛。比中國船加倍。

堅牢。且火器甚精。屢到中國。帶暎叻哆囉呢等貨物。貿易回。則停舟海中。一人坐在桅斗上。持千里鏡。四方遙觀。有船則將所佩小船五六艘。放下。每船坐六七人。俟船將到。圍籠。如我們伸頭禦敵。他將鳥銃吹打。一个並無虛發。是以海上最畏他。明季所謂防貓兒眼。卽此。是歲。統夾板船九艘。犯閩浙地方。官軍屢爲所敗。軍門仍檄鄭芝龍平復。芝龍接文。嘆曰。盧寧侯統英。惜已死矣。使其今日若在。則破此易易耳。遂著芝豹。芝彪爲先鋒。芝鳳。芝蟒爲左右援。自領芝麟。芝燕。陳秀。郭儀。陳霸等。中居調度。臨時又叮彪豹曰。夾板利害。非比我等的船。凡事當先觀方便。可戰則戰。勿得恃勇。徒自損滅耳。豹領令。去至湄州外洋相遇。互相攻擊。將及申時。芝龍船到環圍。迫戰。奈夾板船艘高大。兩邊遮蓋。堅固。火砲利害。無計可施。反失芝蟒。芝鶴二船。傷者甚衆。方鳴金收軍。入泊楓亭港口。卽喚芝豹。芝彪等。囑咐曰。夾板堅牢難破。須用火攻。方得取勝。汝可選帶慣水者。五六十人。小漁船七八艘。將大竹鋸筒。每人腰間背兩個。船中麻棕灌

油並硝磺引火之物。船頭以鐵鍊帶釘。彼船高砲遠。漁船小而撐快。直冲到彼船邊。將斧釘住發火。人跳下水。浮漾走回。二人隨選慣水好漢。備辦起火諸物。暨水船停泊。龍卽整師出敵。往來攻打。芝豹卽帶小船依計而行。果夾板船高砲遠。小船撐快如飛。到卽釘住發火。悉跳下水。或沈或浮。走回。芝彪又令快哨撈救。連燒夾板船五艘。餘敗遁去。

崇禎十三年庚辰。天下賊寇流橫。雖屢有斬獲。每報招降。然經畧無方。不能解散。降而復逸。故張獻忠煽惑於穀城。羅汝才並起。九營應之。合於房州。連陷湖南湖北岳鄂等處地方。復至澧陽。守道周鳳岐求救於七省參軍陳瓚。瓚卽檄蜀鎮總兵溫如微。領本轄兵五千。共萬餘人。於十一月十九日進援澧陽。與周鳳岐共籌制敵之策。二十夜。忽接常武告急。卽發鳳陽兵三千往救。又發衛營遊擊劉以泗。領兵割新州以禦水路。發茅剛營副將劉時早領兵割公安。以拒襄郢。布撥已定。二十四日。張獻忠大軍至常武。溫如微不敢守。棄城而遁。三湘

亦隨失。陳瓚等孤軍腹背受敵。十二月初八日。瓚將沅標兵三千。土司兵五千。牙兵五百。新募弓弩手六百。進復常武。初九日。過城子。鼈山鋪。獻忠用驕兵計。凡三戰而瓚三捷。獻忠合其衆再戰。瓚大敗。死亡殆盡。惟有蒼頭劉光瑞率兵數十人。護瓚逃遁六十里。而賊又至。光瑞同牙兵死戰衛瓚。光瑞被殺。瓚奔斗鋪。爲賊所擒。澧陽遂陷。周鳳岐亦被執。二十四日。解至公安。馬驛橋孫家園。見獻忠。忠勸瓚降。瓚怒目叱之曰。堂堂憲臣。肯從反賊。獻忠大怒。斷其手足。罵不絕口。割舌剖肝。鳳岐亦大罵賊。咸被殺。時賊或攜藥囊。著蔡。或賣卜星相。或爲緇流黃冠。或爲乞丐戲街。分布四方。偵覘虛實。互爲接應。流毒焚掠。勢若燎原。遇天星等七股。盡分隊入蜀。陷大昌。犯夔州。河南瓦罐子。一斗粟。諸盜盡歸。李自成有黃梅貢士吳卿上言。流賊奸宄。出沒尤甚。偵走日馳。二百里。酌酒耽色。渴睡不醒。若得能將勇敢。銜枚夜襲。賊不及覺也。今兵不殺賊。反以仇民。窮鄉男婦。匿林逃難。割頭獻功。以愚主將。主將以愚監紀。監紀不知。遂奏其功。此弊

踵行久矣。所當痛懲者也。崇禎覽疏是之。令朝臣各省撫按舉將才。是以芝鵬齋軍門薦本至京。恰合其機。先賂本省勢權縉紳。如吏部丁啓濬者。然後關通閣部。互相附會於崇禎之前。準授鄭芝龍南澳副總兵。以靖海疆。郎必卽哩哥統船前來。被鄭芝龍燒壞五艘。其餘船率領逃回。細縛見王請罪。王曰。勝負乃兵家之常。卿不必過於自損。遂赦其罪。國王之弟揆一王卽向前啟曰。我國船隻兵糧俱足。俟臣帶領一旅前去。與郎必卽哩哥報仇。王曰。御弟欲領兵前去甚好。但中國人物不少。未可恃勇。卿欲去。須相機於附近地方先踞一處。安頓船隻。收拾人心。庶得通知來往。積聚兵糧。養精蓄銳。窺其罅隙。進可攻。退可守。不致孤軍有覆敗之虞。揆一王曰。謹領諭教。卽挑選精壯。配駕夾板船十五艘。辭王出師。王率文武餞行。臨別又囑其步步小心。唐人多詐。揆一王頓首拜命。順南風。不論日月而行。亦是天意使然。一日看前面山甚高。揆一王問左右曰。不知此處是中國否。內有舊跟郎必卽哩哥軍士答曰。看此處水色。不是中國。

我等船尙在洋這邊。王曰：既是這邊地方，將船駛入去看，是何國。衆船得令，乘風而入。王持千里鏡照觀岸上，並無城郭，囑咐將船一條邊灣住，預備火炮以防意外。傳公子同蘭帶好漢一百名，每人長銳一，短銃三，各腰懸劍，駕船巡看。偵問是何國。公子隨卽帶人上岸，見鯤身有些舊址，卻無鄉村，仍下船過江登岸。行里許，方見有人蓬頭跣足，赤身猿肚，佩弓負箭。公子令人招他，他亦就來。語言不諳，徒以手相比畫，引到社。適通事何斌同李英在澎湖被李魁奇追趕，船隻走到鹿耳門打破，兩船人咸淹死，僅存何斌與一二水手，被水漂至大線頭救起。身被海石蠔殼傷壞，調養纔好，而又染病在此社裏。隨出來與公子相見。公子問何斌：此處何處？斌曰：名臺灣。公子曰：有國王否？曰：無。悉是散居。公子聞言大悅，就邀斌同往船中。見揆一王把終始陳說，王喜，厚待何斌，用爲通事。事無大小，悉以諮之。又問斌：此離中國多遠？斌曰：此處到澎湖四更，到廈門七更，共十一更。王曰：如此甚妙。此處既無統屬，我今就安頓在此。朝夕與斌踏看。

地里起築城池。爲永遠計。擇于七鯤身首。置城一座。用糯米和灰。磨甃堆砌。外附砲臺。對面赤嵌。亦起小城。王將帶來軍士。悉與新港社土番結姻。卽差夾板三艘回國報命。並請給糧餉。迨工竣。又慮港門寬闊。船隻易入。防患難周。隨將舊夾板六七艘。乘巨石灣曲迴旋。打船沉焉。凡船隻入臺者。必由砲臺前經過。若從別處。則觸沉壞夾板。其船必破。餘處水淺。今能如此策畫。固若金湯。但臺灣乃海外窮島。爲荷蘭國揆一王築城所踞。未足爲奇。乃有一座錦繡江山。普天人民。已受二百七十八年恩澤。誤用庸臣。重文輕武。門生同年。互相表裏。只知市私恩。有家致富。何肯布公心。爲國培元。朋黨凌嚼。民不聊生。致四方盜賊蜂起。當事尙不知悔。上下蒙蔽。有錢賄賂者。則保題之。當時有出粟賑濟者。則咸指他沽名市義。必有異志。合疏夾攻。是以最英明之君。被幾個草寇。擺弄得昏迷。大衆一至。相視束手而待斃耳。

崇禎十六年癸未。闖賊李自成設酒請革天王賀一龍就席間斬之。隨馳馬至

羅汝才營。汝才不知出來迎接，亦被砍死。遂得兩部人馬，共有百萬。據西安府爲長安府。進攻榆林，破慶陽。連張獻忠爲唇齒，還師西安過年。

崇禎十七年甲申正月，兵科給事中曾應遴薦山東登州副總兵鄭鴻逵緩急可用，詔益南贛兵三千，命達鎮守。又擢南灣副總兵鄭芝龍爲福建都督。是日賊夥牛金星獻策，命李巖、劉宗敏、李過等攻破大同。巡撫衛景瑗罵賊碎割，敏馳報李自成，成曰：「此關一破，便可長驅直抵。」畱賊黨李友等守西安城，率衆從禹門渡河。巡撫蔡懋得領兵接應，戰死。臨晉、河津、垣曲、絳州皆陷。二月十八日，進攻代州。鎮將周遇吉退守寧武關，率二百餘人從城上縋下，殺入賊營。賊大敗，退二十里，相持半月。闖宦按兵不救。三月初一日，城陷。遇吉統兵民禦敵，連砍數十餘賊，力竭被擒，勸降不屈，大罵遇害。妻白氏盡節，全城屠戮。自成嘆曰：「使守者盡如周遇吉，吾安得至此！」卽投牒於兵部約戰。三月十五日，自成至黎城。崇禎皇帝徵天下勤王，御史李邦華勸上南遷，帝怒曰：「朝臣平日所言若何！」

今國家至此無一忠臣義士爲朕分憂而謀及南遷夫國君死社稷乃古今之正朕志已決毋復多言又請太子撫軍江南給事中光時亨大聲曰奉太子南行將欲效唐肅宗故事乎諸臣遂不敢言帝復問戰守之策衆臣無一對者帝嘆曰朕非亡國之君諸臣實亡國之臣耳遂拂袖而起欽天監奏帝星下移總兵姜瓖通叛將白廣恩與太監杜勳降賊巡撫朱之憑自刎自成愈逼帝召諸臣相對泣下並無他策忽報昌平失守崇禎色變是夜賊犯平則門早朝帝對諸臣無言惟相向哭泣而已須臾賊大至報過蘆溝橋俄報攻彰義門城外三大營皆潰火車巨礮蒺藜鹿角悉爲賊有反轉礮攻城轟聲震地諸臣方侍班襄城伯李國楨匹馬馳闕下汗浹露衣內侍呵止之國楨曰此何時也君臣即求相見不可多得矣召入國楨跪奏守軍不用命此城難守叩頭欷歔帝命內臣協力守城內臣咸譁曰諸文武何爲我等甲械全無焉能守城十八日申時彰義門啟闖賊率羣夥而入帝召闖臣問曰卿等知外城破乎曰不知帝曰事

急矣。今出何策。俱曰。陛下之福。自當無慮。是夕。帝不能寐。同王承恩幸南宮。登萬壽山。望烽火燭天。徘徊逾時。回乾清宮。硃書諭內閣。命成國公朱純臣提督內外諸軍。夾輔東宮。命進酒。連沃數觥。嘆曰。苦我民耳。以太子永王定王分送外戚。令姬嬪各自爲計。忽報皇太后自縊。帝捶胸悲楚。繼報皇后亦自縊。入見公主。嘆曰。何生吾家。左手掩面。右手揮劍。斷其臂而去。少頃。去靴換朱履。綾襪。手持三眼鎗。出中南門。至朱純臣第。闔人辭焉。仍回營。登萬壽山之壽皇亭。咬指出血。書詔於衣袂曰。朕自登極十七年。逆賊直逼京師。雖朕薄德非躬。上千天咎。然皆諸臣之誤。朕也。朕死無面目見祖宗於地下。去朕冠冕。以髮覆面。任賊分裂。朕屍勿傷百姓一人。遂自縊。太監王承恩亦縊於旁。城陷。太監王德化率內官三百人。迎自成於得勝門。令仍舊職。時有官民進表云。比堯舜而多武功。邁湯武而無慙德之句。自成受朝賀。毀太祖廟。鑄永昌錢不成。尋崇禎於煤山。命以雙扉昇帝后于東門側。殮以柳棺。覆以蓬廠。莫有敢哭者。襄城伯李國

植跟蹤奔跪梓宮前。放聲大哭。賊黨執植見自成。植大哭不止。以額觸階。流血滿面。賊衆持之。自成好言勸降。植曰。三事從我。卽降。一。祖宗陵寢不可發。一。葬先帝后以天子之禮。一。太子二王不可害。自成允諾。爲易梓宮。帝戴翼善冠。袞玉。滲金靴。后袍服如之。以丹漆殯帝。以黝漆殯后。葬出貴姬墓側。植一人斬衰徒步。扶送葬畢。自殺。時自成下令。盤倉庫。向戶部主事范方。取倉鑰。方怒。令斬方。方神色不變。受刑。范方字介卿。號兩兩。泉之同安縣高浦所人。辛酉解元。因自成欲向方討倉鑰。方怒目叱之曰。此鑰乃朝廷之物。非爾賊所可問者。成怒斬之。時人嘉之曰。生爲真解元。死爲真主事。又拘國丈嘉定伯周奎。三夾不死。搬出銀七十餘萬。先時崇禎令各官助餉。奎以窮對。皇后私出銀五千。與奎助餉。奎只出三千。其餘二千私自肥己。陳演獻銀三萬金。三千珠三斗。其餘拷掠凌辱者甚衆。又脅寧遠總兵吳襄寫書。遣降鎮唐。通往山海關。招伊子總兵吳三桂。時三桂守山海關。接邸報。見陝西總督余應桂。上言賊衆百萬。非天下全

力當之不可請調左良玉、吳三桂、高傑、唐通、周遇吉、黃得功、曹友、馬科、張天祿、馬岱、劉澤清、暨王國寶、劉良佐、葛汝亮、及副將邱磊、惠登相、王光恩、孔希賢、金守亮等會師真定之間。督輔之外加一督師。如史可法、王永吉其人者。賜以尙方。懸公侯之賞。以鼓厲之。庶幾可滅之疏。

陳子曰。古今命將出師。未有二其權。可以成功者也。如唐之裴晉公。憲宗委以都督軍外事。予以便宜討吳元濟。故雪夜入蔡。宋太祖命曹武惠南征。李煜命之曰。江南之事。一以委卿。故武惠得抒其胸中秘器。遂定江南。故明之季。限以資格。動以掣肘。如用太監。又用監紀。此輩誤人不淺。際此緊急之時。尙欲督輔之外。加一督師。噫。苟督輔可用。何必督師。若督師可用。則又何必督輔。故韓信之拜諸葛之師。未聞尙有別人。宜乎天下瓦碎。上下蒙蔽。大事至此。餘無長策。徒有相對垂泣已耳。

吳三桂既見邸報。恐不日旨下。卽欲起行。遂操演兵馬以俟。後又見一報。廷議

山海關重地。若召吳三桂入衛。則山海關誰守。棄地亦非善策。知不果行。迨接三月十九日報。賊陷京師。皇帝死煤山。頓足望南慟曰。庸儒誤國至此。謀欲勤王。四月初二日。唐通至。出其父襄書。並誇獎新命。犒賞銀四萬兩。三桂疑惑未定。通說以運數既終。大事已去。父命當尊。且擇木而棲。擇君而事。棄暗投明。歷代有之。魏徵尉遲皆名臣。良將史冊昭然。非自將軍始。桂意頗順。送通回。自調兵馬。緩程入京。自成望通不至。疑三桂違命。將吳襄三千餘口。盡行誅戮。僅走其姪吳勳。中途傳襄凶信。三桂悲號切齒。遂駐軍。單騎奔遼東。見清世祖皇帝。請師。世祖允諾。卽調攝政王、豫王、肅王、同洪承疇統八旗兵馬。長驅而進。軍聲大振。唐通見李自成。言陛下何殺吳襄之太驟也。通費多少唇舌。說其歸降。業已拔營而來。今已殺襄。三桂聞之。豈肯甘心。必定關外乞師。將奈之何。自成令秘之。遣人急促三桂。至中途偵知三桂已出關求師。遂不敢往。馳回告自成。成忙令劉宗敏、祖光先、谷大成、白承恩等。立十二大營於城外。首尾相顧。以備禦。

敵又令李巖與唐通李牟等統兵八萬迎敵。二十一日相遇於一片石。通列陣招降。三桂咬牙指通罵不絕口。參將徐有容出馬逼戰。通迎敵未幾合。遂被有容刺死。李牟見唐通被殺。飛馬出救。被馬寶旁射一箭。牟傷額。幾乎墜馬。賊大敗。三桂急飛軍追趕。至永平復戰。殺賊萬餘級。李巖喪膽奔回。宗敏等不敢屯營。悉退城內。各自爲計。咸無戰志。攝政王督諸師環割城外。李自成與牛金星宋獻策等相議守禦。金星曰。滿洲人馬強壯。弓矢嫻熟。況吳三桂少年猛勇。我師連敗兩陣。已無鬪志。不如暫退陝西。養精蓄銳。再來恢復。今若遲疑。恐變起肘腋。悔之莫及。其姪李通亦曰。丞相之論極是。十個北京。不如俺一個陝西。退守爲上策。自成意遂決。二十六日。誅陳演。朱純臣諸勳戚。空御庫珠寶。自成先行。令祖光先谷大成等斷後。二十八日。大肆掠出城。夜焚五鳳樓。清世祖見連勝兩陣。又逢初夏。恐馬力疲倦。暫傳安養。忽見城內火起。哭聲轟天。知是賊潰。卽令三桂追趕。滿兵副之。親統諸王額真等分九門入。撲滅餘火畢。下令安民。

收拾倉庫圖籍。追諡崇禎爲懷宗。皇帝。皇后爲烈皇后。吳三桂追李自成至三十里。大殺一陣。奪其輜車無數。谷大成見桂追到。布成陣勢。三桂奮勇冲過。大成隊亂被殺。自成聞大成已死。趨軍從西北遁去。桂至定州報捷。京中臣民勸進。於五月初一日。擁戴世祖皇帝登極。國號大清。改元順治元年。封吳三桂爲平西王。洪承疇爲經畧。招撫江南。但江南諸臣於三月二十五日。聞京師陷。帝后殉社稷。齊集魏國公徐弘基第。以太子二王不知存亡。天下豈可一日無君。議立親藩討賊。時潞王福王周世孫各避賊淮上。鳳陽總督馬士英言福王是萬曆神宗之孫。秦昌光宗之姪。大行皇帝之兄。論序當立。可法大器執不可。屢議未決。四月二十七日。右都御史張愼言。戶部尙書高弘圖。詹事府詹事姜曰廣。吏部給事中李治。河南道御史郭維經。誠意伯劉孔昭。太監韓贊周等會議。可法大器後至。而孔昭贊周力主。如士英言。遂迎福王於儀真。燕子磯。五月朔至江南。初四日。監國御史祁彪佳曰。先受監國。其名極正。使海內聞之。方知

無倖位心。示謙讓也。今既發喪，宜登大寶，布告天下，爲先帝報仇。諸臣與魏國公皆然其議。乃於十五日卽位，詔以明年爲弘光元年。上崇禎諡思宗烈皇帝。後易爲毅宗正皇帝。王諱由崧，萬曆第三子，諱詢之長子。附禮部尙書余煜。上言曰：聞先帝諡思宗烈皇帝，竊以爲未安。按諡法道德純一曰思，追悔前過曰思。先帝英明天縱，神武性生，憂勤十七年，念念欲爲堯舜者也。時遭家不造，亂堵頻起，而所用之人，又皆忍於欺君，率致誤國。於先帝何咎焉？道德純一則似泛，追憶前過則似譏。於覲揚無當也。且唐宋以來，從未有諡思者。唯周之思王已劉殺君，而弟又殺之。漢之後主，闇弱任奸，以亡其國，何足述乎？諡法有功安民曰烈。今國破家亡，以身殉難，何烈之有？若激烈之烈，又非諡法之謂也。周之烈王，威烈王，漢之昭烈，魏之烈祖宗，唐之光烈帝，未嘗殉難也。他日出之史冊，將按諡法乎？不按諡法乎？故曰思烈二字，舉誤也。然則諡宜云何？先帝英明神武，人所共欽，而內無聲色狗馬之好，外無神仙土木之營，汲汲皇皇，臨難時則

又慷慨必合國君死社稷之義。千古未有之聖主。宜尊以千古未有之徽稱。恨考訂古今未足以奉揚其美。不得已而擬其似。當諡曰毅宗正皇帝。雖於內外賓服亦未甚切。然先帝懿美及臨難一段。不負宗社之氣。庶足盡之。忻誠伯趙之龍。亦言思非美字。弘光設四鎮。晉黃得功靖南侯。駐廬和。得功字潞山。每戰身自衝突。勁疾若飛。江淮呼曰闖子。曾爲羣商執鞭。往都經山東。值嚮馬。衆商俱逃遁。得功獨手提兩驢蹄禦賊。賊無不拔靡。其勇如此。時興平伯高傑駐揚滁。忌得功威名。伏兵劫功於土橋。屢戰事聞。以太僕寺少卿萬元吉監軍江北解之。始各罷兵。初傑因陝縣潼關不支。率其部下李成棟楊繩武等十三總兵統衆四十萬渡河。大掠晉中。鼓行南下。頓師邳泗間。既位列四鎮。忌黃得功威名。且得民心。率三百精騎襲得功。功甫至土橋。解鞍下馬作食。傑伏騎猝起。功角巾緩裝。出其不意。亟擐甲而飛矢雨集。所乘馬值千金。俄而矢中蹄。騎他馬馳去。傑卽遣兵戒之曰。必生擒得功。時有梟卒十七騎。追之且及。得功大喝反。

鬪發。腹間所餘七矢。殺七人。遂揮長刀。復砍三人。幸其軍到。獲免。從行百騎。皆歿。傑又將千人。襲黃儀真城。被黃守將邱鉞馬岱設守。不得入。岱開門出擊。盡殲之。於是怨愈深。萬元吉偕伊將張文昌李樓鳳調停兩間。意未解。會得功有母喪。元吉乘間說之曰。土橋之變。無論智愚。俱知其不義。今將軍以國故。親故遂。獨盛怒。是歸其曲於彼。而將軍收名於天下。得功稍和。元吉又令傑出千金。爲黃母贈。二憾之搆始釋。傑雖爲人抗暴。然慷慨識機變。可說而動。平日折節事僧德宗。曾問德宗以終身之事。宗曰。居士起擾攘。今歸朝廷。爲天將。爲通侯。此不足爲居士重。惟率衆從史。居士指可法也。儒家稱聖人。我法所謂菩薩。居士與之一志。並力可謂得所歸矣。傑之妻邢氏。饒有權智。一見史公。出至誠相待。亦勸高傑傾心。史公亦喜傑馴擾。大事有賴。命王相業監其軍。加李成棟賀大成王之綱。李本源。胡戎楨爲大將。連騎之任。專制河南。高曰。傑旣以身許公。再無亂心。封劉良佐。廣昌伯。駐鳳泗。封劉澤清。東平伯。駐淮徐。又調鄭鴻逵。黃

蜚鄭彩爲總兵。加鴻遠鎮海大將軍。守鎮江。彩守三叉河口。爲采石蕪湖備。六月。史可法馬士英奏北京李賊爲吳三桂出關請師攻破。遂封吳三桂薊國公。遣中書阮廷揚海運米十萬石。銀五萬兩。濟其軍。繼報清定鼎燕京。高弘圖等會議爲中國復仇。宜遣使通好。而難得其人。應天巡撫左懋第請行。加兵部右侍郎。以太僕寺少卿馬紹愉副之。並命懋第經理河北。聯絡關東諸軍。懋第曰。臣此行致祭先帝后梓宮。訪求東宮。二王蹤跡。並通兩國之好。責不敢辭。至於封疆重寄。非使臣之職。乞解臣經理職銜。且馬紹愉前臣曾劾罷。今豈可共事。請停其行。皆不許。懋第又請臣此行生死未卜。敢致一辭。臣望者恢復。而近日朝端行事。似少恢復之氣。願陛下時時以先帝仇恥爲心。瞻高宗之弓劍。則思成祖列聖之陵寢。何存撫江上之黎民。則思河北山東之赤子。誰恤更望廷臣。時時以整頓士馬爲事。勿以和議爲必成。勿以和成爲足恃。必能渡河而戰。始能扼河而守。衆聽其言。齎白金十萬兩。幣帛五萬匹。左都督陳弘範帶兵三千。

護行。懋第八月渡淮。十月朔次張家灣。止許百人入都。懋第衰服往館。鴻臚寺以不得赴梓宮。卽於館遙祭。是月二十八日遣歸。甫出京。至滄洲。追回。改館太醫院。懋第處之怡然。一說係弘範密通。欲身赴江南招降。故追懋第回。迨至乙酉閏六月。聞江南失守。拊心慟哭。其從弟懋泰先爲吏部員外。來見勸降。第曰。此非吾弟。叱之出。是月十二日。與從行兵部司務陳用極。遊擊王一斌。都司張良佐。劉統王廷佐。俱被殺。懋第萊陽人。辛未進士。父喪三年不入內事。母極孝。其絕命詞曰。峽折巢封歸路迴。片雲南下意如何。寸丹冷魄消難盡。蕩作寒烟總不磨。七月。報山東濟寧雍髮歸順。馬士英薦阮大鋮知兵。有旨賜冠帶。陞見舉朝皆駭。高弘圖請下九卿會議。士英曰。會議則大鋮必不得用。弘圖曰。吾非阻大鋮舊制。京堂必會議。於大鋮甚光明。士英曰。吾非受其賄。有何不光明。弘圖曰。何必言賄。一付廷議。國人皆曰賢。然後用之。士英疏言魏忠賢之逆。非闖賊可比。弘圖曰。諸人護持局面。於所愛而登之天者。曰先帝原無成心也。於所

惡而墜之淵者。曰先帝定案不可翻也。姜曰廣疏言。臣前見文武紛競。既慙無術調和。今見欽案掀翻。又愧無能豫寢。遂使先帝十七年之定力。頓付逝波。陛下數日前之明詔。竟成故紙。梓宮未冷。增龍馭之怨恫。制墨未乾。駭四方之觀聽。惜哉維新。乃有此舉。臣所守者朝廷之典章。所畏者千秋之公議而已。郭維經羅萬象。唐兆恆陳良弼。王孫蕃左光先。懷遠侯常延齡。太僕少卿萬元吉。兵部郎中尹民興等。各䟽諫不聽。大鋮召對。陳聯絡控扼。進取接應四策。又陳長江兩合三要。十四隙。稱旨用爲江防兵部侍郎。濟寧飛報。檄各處地方。薙髮投誠。甚急。可法請督師淮揚。詔其卽行。可法抵白洋河。行文四鎮備禦。招撫江南。副將唐起龍齋攝政。王書與可法有云。念累世之宿好。棄近日之小嫌。嚴整貔貅。驅馳梟獍。入京之日。首崇懷宗皇帝。后號謚卜葬山陵。悉加典禮。郡王將軍以下。仍其故封。恩典有加。耕市不驚。秋毫無犯。擬天高氣爽。遣將西征。傳檄江南。連兵河朔。陳師鞠旅。戮力同心。以報汝君父之大仇。彰我朝廷之厚德。不意

南中諸君子。苟安旦夕。不審事機。聊慕虛名。頓忘實禍。余甚惑之。夫國家之撫定燕都。乃得之於闖賊。非得之於明朝也。賊毀明廟之主。辱及先人。國家不憚征繕之勞。代爲雪恥。萬世仁人君子。當何如感恩報德耶。乃乘逆賊稽誅。王師暫息。卽欲雄踞江南。坐享漁人之樂。豈江淮以南。天塹足憑。遂不能飛渡耶。況闖賊爲仇明朝。未曾得罪於國家也。徒以薄海同仇。共伸大義。今若擁號稱尊。是天有二日。復爲勁敵。余將簡西征之銳兵。且釋彼重誅。令爲前導。夫以中華全力。受制潢池。而以江左一隅。兼支大國。勝敗之數。無待蓍龜矣。至於南州諸君子。賁然來儀。則爾公爾侯。列爵分土。自有平西王之典例在。惟執事實圖利之史。可法得書上聞。復其書云。突聞我大將軍吳三桂。借兵貴國。破走逆賊。殿下爲我先帝發喪成禮。梓宮歸葬。撫輯羣黎。且免薙髮之令。示不忘本朝。此等舉動。振古鑠今。凡爲大明臣子。罔不長跪北面。頂禮加額。豈但如明諭所云。感恩報德已耶。謹於八月。薄治筐篚。遣使犒師。並欲請命鴻裁。連兵西討。是以王

師既發。乃辱明誨。引春秋大義。來相詰責。善哉。推而言之。此爲列國君薨。世子應立。有賊未討。不忍其君之說耳。若夫天下共主。身殉社稷。青宮世子。玉石俱焚。宮殿飛灰。山陵鬼哭。宗社蒼生。數月無主。是瞻烏逐鹿。睥睨神器者。當不知有幾人。若拘牽不卽位之說。坐昧大一統之義。中原鼎沸。倉卒出師。何以維繫人心。號召忠義。勢不能支。乃舉祖宗之天下。拱手而擲之他人。不獨上以貽二祖列宗之羞。下以快亂臣賊子之志。是守經泥古。徒爲宋襄不擒。二毛之仁。其重遺貴國之憂。當不知又何如也。紫陽綱目。踵事春秋。其間特書莽移漢祚。光武中興。丕廢山陽。昭烈踐祚。懷愍亡國。晉元嗣基。徽欽蒙塵。宋高繼緒。是皆於國仇未復之日。亟正位號。綱目未嘗斥爲自立。卒以正統與之。甚至玄宗幸蜀。太子卽位。靈武議者疵之。亦未嘗不許以行權。幸其光復舊物也。又有若乘我國運中微。一旦欲移鼎東下。而以前導命元兇。義利兼收。恩仇倏忽。獎亂賊。長寇讎。不惟孤本朝藉力復仇之心。亦甚違殿下仗義扶危之初志矣。且契丹和

宋只歲輸金繒。回紇助唐。原不利其土地。况貴國篤念世好。兵以義動。萬代瞻仰。在此一舉。並乃手足之難。實同秦越。視此幅員。爲德不卒。是以義始。而以利終也。云云。高傑發總兵李朝雲。防守泗洲。參將蔣應雄。許占魁。許茂榮。李玉防。守徐州。九月。遣都督陳謙齎勅。印封福建都督鄭芝龍。南安伯。十一月。豫王進師宿遷。史可法赴援。拔營去。十二月。往北使陳洪範南還。稱清兵旦夕卽南下。馬士英惡之。曰。有四鎮備禦。何患焉。

宏光元年。清順治二年。乙酉正月。高傑率兵防河。至贛州。總兵許定國。享傑謀殺席上。以其衆薙髮投誠。

按高傑於前歲九月之十日。發旗。疾風折其旗。西洋炮自裂。應廷吉私謂其友曰。明年太乙在震。角亢司垣。始擊掩。逼壽星之次。法當蹶上將。吾懼阻衆。不敢眞言。許定國太康人。故總兵赦罪出。毀家養士。大掠京城。負其功不得封土。出惡言。詆高爲賊。高由是怨許。常曰。我見必殺。定國聞之。遂懼。

正月十一日。高兵至贛州。定國匿其軍之壯者。率羸卒於數十里外。跪馬首迎。高扶起之曰。許總兵奈何行此禮。定國頓首曰。知公怒請死。高曰。公累疏指我爲賊。何也。許曰。定國目不知書。咸假手於記室。入公之名。定國不知也。若以此殺定國。不亦冤乎。高索記室者姓名。許曰。彼知公之怒。先期已遁。尋之不獲。他先去。而定國不知。可見攝公之名者。非定國意也。高粗人見其屈服。不但不憾。且憐之。遂信無疑。中有千戶鹿馬。說定國有謀。高於馬前笞五十。送許誅之。遂殺。性約爲兄弟。定國飾美姝進。高屏不御。笑謂之曰。軍中未可事女子。且畜之。俟功成以娛老乎。高屯大營。離城二十里。僅隨驍健三百人。十三日入城。是日定國張燈盛席。厚禮興平伯。令其少弟飲。諸將於別所。婦女賓客雜坐歡飲。酒至半酣。許弟動靜失常。衆頗疑焉。對高密語曰。定國有謀。高推之以手曰。夫何敢。衆意亦遂坦然。三百人皆醉別所休息。寢興平伯於贛人甲第內。夜半壯士數十人踰垣而入。傑忽覺。索衛身鐵杖已失。猶奪人鎗刀。鬪傷脅。被執。定國

麟血南坐。日三日來。受屈辱於爾。今如何。傑大笑曰。吾爲豎子所算。呼酒來痛飲而死。明日。日中城不開。李本深王之綱等攻東門入。定國已渡河北去。吏部聞高實信有中原不可復之痛。定國少年猛勇。手攀簷前椽舍。全身懸空。能左右換手。走長簷數徧。顏色不變。曾定河南屬邑。值流賊奄至。箭發如雨。定國立敵樓。以刀左右揮箭盡兩斷。無一矢能傷其身者。有賊持版自護。定國射以鐵枝箭。貫入於版死焉。賊驚遁。高欺其老。聽其謾語。遂墜術中。左良玉憤馬士英竊權誤國。稱天子密旨討之。傳檄四方曰。大義之乘。炳於星日。無禮之逐。嚴於鷹鷂。天地有至公。臣民不可罔也。奸臣馬士英。根原赤身。種類藍面。昔冒九死之罪。業已矯妾爲奴。剪髮爲僧。重荷三代之恩。從爾狐窟白門。狼吞泗上。上會國家多難之日。侈言擁戴勸進之功。以今上曆數之歸。爲私家攜贈之物。竊弄威權。煬蔽聰明。恃兵力以脅人。致天子閉目拱手。張僞旨以襲俗。俾兵民重足寒心。本爲報仇而立君。乃事事與先帝爲仇。不祇矯誣聖德。初因民願而擇主。

乃事事拂兆民之意。何由奠厯民生。幻蜃蔽天。妖孽障日。竇官必先姻婭。試看七十老囚。三本敗類。居然節鉞。監軍漁色。罔識君臣。托言六宮備選。二八紅顏。變爲桑間濮上。蘇松常鎮。橫江之使肆行。攜李會稽。妙選之音日下。江南無夜安之枕。言馬家便爾殺人。北斗有朝。慧之星。謂英客實應圖讖。又有皇嗣幽囚。列祖怨恫。海內懷忠之臣。誰不欲食其肉。敵國向化之士。咸思操盾其家。本藩先帝舊臣。招討重任。頻年痛心疾首。願爲鼎邊雞犬。而無從此日履地戴天。誓與君側豺狼而併命之矣。分兵做三隊南下。士英懼。調劉良佐。黃得功。方國安。鄭彩。黃斌卿。同劉大昭。阮大鍼。朱大典。共禦於采石磯。史可法疏言。良玉原不敢與君父爲難。豈可調各鎮離汛。若北兵一至。宗社危矣。不知士英蒙蔽。至此不報。四月二十二日。豫王會肅王各進兵渡淮。史可法請救。弘光召諸臣問方略。諸臣皆請救淮揚。弘光亦以淮揚宜守。不可撤江防兵。馬士英厲聲曰。吾君臣寧死於清。不願死於左良玉之手。二十四日。豫王師猝至揚州。攻新城。可法

督總兵劉肇基翁萬裕楊鳳煇等禦之二十五日撤圍退二十餘里詐稱黃蜚提兵來援。可法縋人出詢。詭說撥兵一千入保城池。餘屯外作犄角。可法信之。開西門。遂中計。可法自刎。時左良玉正揮兵欲前。忽病死。子夢庚爲黃得功所敗。豫王屯揚州。沿江設渡。鄭鴻逵帥水師禦於京口。豫王令衆編筏。張燈向鎮江。別隊從老鸛河渡龍潭。探馬飛報北師編筏。將乘風而南。又報江中一炮。京口城壞四堵。楊文驪來報江中有數筏。因架砲城下。火從後發。震倒城半堵。早發三砲。江筏粉碎矣。士英將前二報搥打。而重賞楊使。自是警報寂然。五月朔日。弘光召對諸臣。無一言。王鐸特請經筵講期。弘光曰。且過端午。至夜半。有人書一對於長安門之東西柱。云。福人沈醉未醒。全憑馬上胡縐。幕府凱歌已休。猶聽阮中曲變。初九日。豫王令開閘放舟。蔽江而南。鄭鴻逵鄭彩棄鎮江而遁。初十日。放三宮淑女還家。午後召優人入內演戲。與內官韓贊周屈尙忠田成等雜坐戲飲。至二鼓。弘光率一姬。韓贊周隨之。開聚寶門出奔。百官無一知者。

十一日。馬士英詐稱奉太后旨。召守陵黔兵自衛奔浙。百姓共出王之明於獄。卽位武英殿。十四日。豫王至忻城。伯趙之龍與之明出降。安民畢。封之龍爲興國公。弘光是夜倉卒至太平府。百姓閉城不納。奔蕪湖。總兵黃斌卿已遁。匿於中軍翁之琪舟中。往就黃得功。得功泣奏曰。陛下死守京城。臣等猶可借勢作事。奈何聽奸臣之言。而輕出至此。今進退將何所據。此乃陛下自誤。非臣等之負陛下也。居兩日。將謀幸浙。劉良佐奉豫王命追至。且招黃得功降。功大怒。單騎馳出。大罵良佐背主匹夫。鼓唇舌以說他人。我黃將軍頭可斷。而膝不可屈。良佐大恨之。立令衆軍發弩。中得功喉。功嘆曰。吾恨無力擒爾。當爲厲鬼以殺賊。遂拔劍自刎。良佐揮軍劫其營。翁之琪戰敗。投江而死。良佐挾弘光而去。至江南。豫王置酒於靈璧侯之第。坐弘光於太子下。酒半。王問弘光曰。汝先帝自有子。汝何自立。既已自立。而不遣一兵討賊。於義何居。先帝遺體。逃難遠來。既不能讓位。又磨滅之。於心何居。光不能答。終席俛首。汗出浹背。豫王命貝世子

純率兵平浙。馬士英奉太后至杭。浙撫張秉貞迎太后入城。士英屯兵城外。潞王謁太后禮甚恭。英欲立之。潞王辭不可。禮部尙書黃道周奉祠禹陵在杭。疏馬士英曰。大臣倖從。早夜圖維。震陛承歡。起居定省。何至三輔遠於六飛。龍車遙於鳳輦。間關載道。險阻多嘗。此諸臣子之積愆。黔黎之巨創也。自五月十一日。距今越二旬矣。士林未知行在。而首輔馬士英擁兵自衛。迎懟西湖。士民詰問。空言聖駕在靖南黃。得功軍中。馬輔誠知聖駕所在。而輕離左右。則有不臣之心。誠不知聖駕所在。而托言厚載。以保其家人。則罔上苟偷。神人所共憤也。太后覽表。歔歔而已。忽報駐防豆腐濱總兵吳志達黃蜚戰敗。被擒不屈而死。貝子統兵至江陰。進兵嘉湖。馬士英仍自帶黔兵。潛奉太后渡江。至紹興。原任九江僉事道王思任請斬馬士英。疏曰。士英獨掌朝綱。知利而不知害。知存而不知亡。朝廷篤信。以至於此也。今事急矣。政事閣臣可以走乎。兵部尙書可以逃乎。不戰不守。而身擁重兵。口稱護太后之駕。則聖駕獨不可護耶。一味欺瞞。

滿口妄說。英雄所以解體。豪傑所以灰心也。及今猶可呼號泣召之際。太后宜速趣上。照臨出政。臥薪嘗膽。立斬士英之頭。傳示各省。以爲誤國欺君之戒。又遺書與士英。有叛臣至則束手無策。強敵來而先期已走。致令乘輿播遷。社稷坵墟。閣下謀國至此。卽喙長三尺。亦何以自解。以今上計。莫若明水一盃。自刎以謝天下。又有吳越乃報仇雪恥之國。非藏垢納汙之區也。職當先赴胥譁。乞素車白馬以拒閣下。士英得書。愧憤不能答。貝世子至。浙江鼎沸。各自爲計。獨潞王不去。曰。禦者無力。逃者非策。適足以殘生靈。不如降爲上策。庶百姓得安。二月十三日。舉城降。貝世子厚禮之。入城安民。率師至江邊。見波浪滔天。而無舟楫。難以飛渡。徘徊之際。見一白鬚翁。手執藜杖。竟從水中渡過。世子訝曰。人既可渡。豈我師不可渡耶。遣人下探。水僅沒脛。卽揮全軍渡過。登岸往試其深淺。汪洋弗可言。當時有火燒六和塔。沙漲錢塘江之讖。貝世子遂分兵追趕。是日移師紹興。將空其城。有鄭之尹子遵謙出家帑。糾集鄉勇。會張國維維。日事

急矣。無主不可以號召天下。魯王在台州。宜迎監國。遂與方逢年林廩卿宋之普陳亟輝熊汝霖孫嘉績鄭之尹等於閏六月望日。迎魯王監國於紹興府。王諱以海。字巨川。別號恆山。又一號常石子。太祖第九子。擅封山東兗州府爲魯王。王其十世孫也。崇禎六年七月。封王爲鎮國將軍。十五年兗州陷。兄魯王以派以珩以江及王長子三子。同日遇害。鎮國夫人張氏。以磁器觸喉死。撫臣題請下部議覆。應繼王位。冊使甫出門而北京陷。弘光立。移浙。王台州府。封方國安荆國公守嚴州。張鵬翬永豐伯守衢州。鄭遵謙義興伯。王之仁武寧伯。賜張國維上方劍。便宜行事。督師江上。維見諸師主帥各治其軍。疏請於王曰。尅期會戰。則彼出此入。我有休蕃之逸。而攻堅搗虛。人無應接之暇。此爲勝算。然必連諸帥之心。化爲一心。然後使人人之功罪。視爲一人之功罪。遂會方國安。率王國斌趙天祥湯斌李應世等。與貝世子大戰於草橋門。忽風雨暴至。火砲弓矢俱濕。各收兵。貝世子沿江築木城下營。對江相拒。夏清兵至杭州。黃道周會

櫻何楷郭朝汾黃景昉蔣德璟路振飛張家玉朱繼祚等逃入閩鎮海將軍鄭鴻逵總兵鄭彩俱撤師江口。而唐藩從河南逃難。至達彩請見。語及國難。泣沾襟袂。二人奇之。令副將江美鼇鄭陞帶兵衛之入關。達彩聞杭城降。撤全師回至閩省。會巡撫張肯堂巡按御史吳春枝禮部尙書黃道周南安伯鄭芝龍議立唐藩監國。唐藩諱聿鍵。性剛直。喜讀書。善文翰。巖巖千言。初封南陽。以父驥失愛於祖。端王兩姬謀奪嫡。未得請名。及端王薨。守道陳奇瑜知府王三桂始爲請嗣。後以統兵勤王。擅離南陽。被錮。被難。逃於江口。黃道周執筆爲諭曰。孤卽漢室再墜。大統猶繫人心。唐宗三失長安。不改舊物。豈獨其風俗醇固。不忘累世之澤哉。亦其忠義感憤。豪傑相激。使之然也。孤少遭多難。勉事詩書。長痛妖氛。遂親戎旅。亦以我太祖驅除羣雄。功在百姓。方十三葉。而屬彝驚。然睥睨神器。爲子孫者。誠不忍守文自命。坐視其陵遲也。二十年來。狂寇薦驚。孤未曾兼味而食。重席而處。北方二載。兩京繼陷。天下藩服。委身奔竄。孤中夜臥起。垂

涕縱橫。誠得少康一旅之師。周平晉鄭之助。躬率天下。以受彤弓。豈板蕩哉。今幸南安芝龍定鹵鴻逵二大將軍。志切匡復。共賦無衣。一二文臣。以春陵。踴躍之義。過相推戴。登壇讀誓。感動路人。嗚呼。昔光武昭烈。皆起布衣。所遭絕續。與大敵爲仇。而能正言舉義。躬承舊業。況今神器乍傾。天命未改。孤以藩服。感憤間關。逢諸豪傑。應卽投袂。知明赫之際。神人叶謨。上天所眷。顧我太祖。紹其子孫。猶未艾也。書曰。與治同道。罔不興。傳曰。多助之至。天下順之。得道者多助。自六月初二日。監國伊始。一切民間利病。許賢達條陳。孤將悉與維新。總其道揆。副海內喁喁之意焉。唐藩監國。正議出師。有艷翊戴者。咸請正位。方可號召天下。諸臣多言監國名正。出關尺寸。建號未遲。李長倩亦有急出關。緩正位。示監國以無富天下心之疏。惟鄭芝龍鄭鴻逵。亟請正位。不正位。無以壓衆心。以杜後起。遂定議。於閏六月十五日。共奉唐藩卽位福州。改元隆武。命禮部尙書黃道周草詔曰。朕以天步多艱。遭家未造。憂勞監國。又閱月於茲矣。天下勤王之

師既已漸集。向義之心。亦以漸起。匡復之謀。漸有次第。朕方親從行間。鼓舞率勵。以觀厥成。而文武臣僚。咸稱萃渙之義。貴於立君。寵綏之方。本乎天作。時哉不可失。天命靡不勝。朕自缺然。未有丕績。以仰對上帝。克慰祖宗。而臨安悉轡。遵讓無期。大小汎汎。如河中之水。朕敢不黽勉。以附衆志。而慰羣望。朕稽載籍。漢光武聞子嬰之信。以六月卽位。邵南卽以是年爲建元。元年。誕膺天命。昭烈聞山陽之信。以四月卽位。漢中卽以是年爲章武元年。立宗廟社稷。艱危之中。豈利大寶。亦惟是興義執言。繫我臣庶之故也。以今揆古。卽以是年爲隆武元年。其承天翼運。定難功臣。悉以次第進爵。分茅胙土。稱俟恢復。以勒勳猷。其翊運宣猷。守正文臣。亦以次第進級。別需來章。孝秀耆宿。軍民人等。俱依前諭。優給行所。在山川鬼神。除淫祠外。皆遣官祭告。以示朕續緒。爲天下請命之意。焉以布政署爲大內。改福州府爲天興府。以黃道周何楷蔣德璟蘇觀生黃景昉路振飛曾櫻陳洪謐林欲楫黃鳴俊朱繼祚爲大學士。入閣辦事。張肯堂爲吏

部尙書。李長倩爲戶部尙書。曹學僉爲禮部尙書。吳春枝爲兵部尙書。周應期爲刑部尙書。鄭璫爲工部尙書。馬思理爲通政使。鄭英爲錦衣衛都指揮使。鄭芝龍爲平鹵侯。鄭鴻逵爲定鹵侯。鄭彩爲永勝伯。林察張明振周鶴芝陳霸等各爲伯。分天建延興爲上游四府。汀紹漳泉爲下游四府。合兩浙兩粵滇黔晉楚地方。隆武凡有批答。皆親爲之。不假閣臣。且曾皇后性亦賢敏。頗知詩書。羣臣每召對。輒於屏後聽之。共決進止。隆武同廷臣共議戰守。定兵二十萬。自仙霞關起。宜守者一百七十處。每處兵多寡不同。約計十萬。演習操練。以便出師。遣兵科給事劉中藻齎詔往浙。熊汝霖曰。吾知奉吾君而已。不受詔。國維曰。同是高皇子孫。當此之際。豈可異視。而受前龍後虎之迫乎。遂勒手疏馳上。隆武曰。國當大變。凡爲皇子孫。臣庶所當同心併力。成功之日。入關者王。監國退守。藩服禮制昭然。若以倫序。叔姪定分。在今日。原未假易。且監國當人心奔散之日。鳩集爲勞。一旦南面正朔。鞭長不及。猝然有變。昏亡齒寒。悔莫可及。臣老矣。

豈若朝秦暮楚之客也哉。隆武覽疏。雖止問罪之師。然閩浙水火矣。馬士英欲謁魯王。張國維參其誤國十大罪。英懼不敢入。依方安國。時張國維督師奪富陽。八月復奪於潛。雖兵馬雲集。而各治其軍。地方反受騷擾。隆武以翊戴功。晉鄭芝龍爲平國公。加太師。鄭鴻逵爲定國公。林察周瑞張明振周鶴芝陳霸等。各爲侯。陳秀郭騰楊濟時施天福劉全張進等。各爲伯。以御史郭承汾巡按貴州。陳秀郭騰係芝龍舊將。命守二關。劉全係香胞弟。承汾字懋充。別號有水。泉之晉江人。癸未進士。至己丑歲。被可望所執。不屈而死。屍棄東郊。歷月餘。顏色如故。諸獸蟲不敢犯。總兵許盡忠暗稱奇。陰令家人黑夜瘞之。隆武召黃道周何楷曾櫻路振飛黃景昉蘇觀生何吾騶等諸文武入朝。會議戰守策。鄭芝龍首站東班。楷讓之曰。文東武西。太祖定制。今鄭芝龍妄自尊大。不但欺凌臣等。實目無陛下。龍曰。文東武西。雖古今來之定制。然太祖已行之。徐達業站東首。道周曰。徐達乃開國元勳。汝敢與達比乎。龍曰。以今日較之。我從福建統兵。恢

復。直至燕都。功亦不在徐達下。楷曰。俟爾恢復至北京。那時首站未遲。遂互爭殿上。隆武亦無奈何。各爲慰解罷。自此文武不睦。隆武聽知于潛富陽之捷。卽做淮陰故事。令人築壇郊外。拜鄭鴻達爲大元帥。率周鶴芝。張明。振。楊。濟。時。陳。秀。郭。職。陳。霸。鄭。陞。等。領兵五萬。諸葛倬等爲監軍。出仙霞關。往嚴衢接應。張國維。方國安等恢復浙東。鄭彩爲副元帥。率施天福。鄭聯。鄭斌。張進。朱壽。劉全。江美。齧等。領兵五萬。以張家玉爲監軍。道出五福杉關。連江撫楊廷麟。會楚撫何騰蛟合師。九月。張國維。方國安等。與貝世子對江相拒。屢戰未分勝負。王之仁上書監國曰。事起日。人人有直赴黃龍之志。乃一敗後。遽欲以錢塘爲鴻溝。天下事何忍言。臣爲今日計。惟有前死一尺。願以所隸。沉船一戰。今日死敵。猶戰而死。明日卽死。恐不能戰也。魯王遣都督陳謙入閩。啓稱皇叔父。不稱陛下。隆武不悅。下謙於獄。芝龍力救。監察御史陳邦芑。密奏謙爲魯王腹心。芝龍至交。今日若不除。恐爲後患。隆武信之。夜半出片紙。斬謙于獄。弘光時。曾差陳謙爲

使齋印勅到閩。封芝龍南安伯。勅內誤寫安南伯。謙教龍畱印換勅。謙回至浙。弘光已蒙塵。故龍與謙厚。謙繫獄。芝龍力救。不得以爲有虞。必經門首。然後免。冠請救。豈知夜半斬于獄中。有我未曾殺伯仁。伯仁實爲我而死之句。鄭鴻逵引其子肇基。陛見隆武。賜姓朱。芝龍聞知。次日亦引其子森入見。隆武奇其狀。問之。對答如流。隆武撫森背曰。恨朕無女。妻卿。遂賜國姓。賜名成功。欲令其父顧名思義也。封爲御營中軍都督。儀同駙馬。宗人府宗正。自此中外咸稱國姓。十月。日本國王懼芝龍威權。認翁氏爲女。粧奩甚盛。遣使送到安平。卽成功生母也。鄭鴻逵鄭彩各提師逾關。未及百里。上疏請餉。逗遛不前。大學士黃道周何楷。因與芝龍爭班位不睦。楷辭回。過烏龍江。被劫。截其耳而去。道周憤諸將不前。以其坐而待亡。不如身自出關。奏請以師相募兵。江西江南多臣門生。故吏。必有肯效死力者。且可連楊廷麟何騰蛟等。伺動靜作進取計。隆武允請。朝餞啟行。道周率諸門人。中書蔡春溶賴繼謹陳駿音。兵部主事趙士超毛至潔。

等並子弟千人。次萃源。作責躬詩一章。天地何高深。日月猶循環。星宿陳其巔。動靜恆無端。舉翼不能翔。而作醢鷄觀。大命一以至。不能復研鑽。鬼神欲告之。翕吸近告難。傷哉草木類。不得畱朱顏。道周沿途招征。至延平乏糧。駐軍上疏。請餉。隆武命芝龍助資。龍奏曰。現今兩師進兵動行。十萬餉且不足。焉有餘糧。接應此未經操演之衆乎。不與一粟。隆武無奈。惟給空割數百道應之。道周亦以割付鼓勵勸進。又得百人進師建寧。割崇安縣遣人通楊廷麟萬元吉等。爲聲勢。尋有以外交諸藩。飛書聞于隆武。武遣使馳示道周。周自陳疏曰。臣田無一畝。居只一椽。幸以是見憫於主上。見信於親友。然不能以是見諒於犬豕豺狼。臣於二十九日。退居後堂。有人持小書云。是舊按臣陸清源呈上手拆。臣錯愕展玩。有云東南立主。臣當元勳。臣驚欲死。念清源生平謹慎。何至有此。臣行素六十年。無險心齟語。爲兇人所仇。無奇功異能。爲要人所嫉。獨特一片肝腸。爲高皇列宗。與天下黎獻。共對白日耳。臣雖庸下。亦讀書至老。遭逢陛下。漁水

相期。猶一月之內。四疏乞師。何至以元勳微腥爲挾邪所謗。若至子弟慕義。勤王。雖天性使然。亦恐臣孤身隻手。陷身絕域。每一相見。涕泗漣洳。當二十六日以前。溽暑未收。毒水四下。臣兵自延過寧。渴而谷飲。病者八九。一日下操十隊之士。呼半不起。遂損去健將陳伯輿。念其雄畧。十射九破。千觔之力。盡于盆水。四顧環堵。何能不哀。今稍稍平復。遂相對勸臣出關。嗚呼。此唱唱者亦臣子也。顧曾讀書受朝廷之寵眷。而攄憤至此。今在廷諸臣。不滌腸剖胸。誓同分膽共薪。而滄滄泚泚。望影射沙。欲何爲者。陛下不屑爲昭烈。臣亦不屑爲孔明。陛下不屑爲宋高宗。臣亦不屑爲李伯紀。取法不高。則庸佞狎來。視人太卑。則奸豪四至。古今讒賊。偏中于高明。近代人才。沈淪于苟賤。惟陛下垂察。隆武覽表。馳手割慰之。遂出崇安分水關。秋七月。道周師至廣信府。聞徽州破。遣將守馬金嶺。集紳衿父老諭勸。捐助得萬人。乃整部署分道進兵。遊擊黃奇壽戰捷於牛頭嶺。遂營之。其出發源者。參將王加封失防。伏兵戰死。遊擊李忠被擒。黃奇壽

聞報援之莫及。參將李瑛倪彪出童家坊。被馬步衝突亦潰。參將應士瑛從間道出援。屯高偃橋。道周遂馳疏請兵。畧曰。臣今年六十有二。才能智勇。不過中人。而自請行邊。拮据關外。譬之鷄然。風雨如晦。鷄鳴不已。卽有不寤之人。起而刀俎之。亦無可奈何而已。臣少而學道。於物無競。於人寡怨。直以出師之故。爲異志所排。寡識之人。羣起和之。千端百出。以阻其成。旁勾曲引。以幸其敗。或叩關門。數日不達。饑疲之衆。寧死中野。臣何所營而坐困於此哉。臣遭會風雲。甫及一月。五疏求去。直以皇上洞燭。遐邇嘗鑑。臣于言語形跡之外。所以再再焦曉。瘁毛鍛羽。以爲朝廷守一日藩籬。非曰能之。亦各盡其義而已。今敵之來。日以壓境。衆之附日。以攜志。蠢冥何知。惟利是視。貪生怖死。則前後異致。信州閭巷。鷄犬方集。今復翻然欲舍而去已。據徽人來者。咸云敵一百六十騎守婺境。自海口煖水焚掠殆盡。煖水距廣信百餘里。臣師屯八都者。僅千五百人。皆邨落新募。月食一兩之卒。其東出馬金嶺者。僅七百餘人。又千二百人西去。饒撫

馳收未回。所餘帳下千二百人而已。臣自八月以來。東弭台寧之釁。西消金嶺之孽。精力瘁於文告。歲月馳於期會。未有一智一謀。佐手於其內。一臂一力。助於其外。空以老瘁一意報主。爲愛己所憐。異己所笑。今事勢甚急。可亟命方國安以一萬之衆。從嚴州出老竹嶺。直搗徽州。乘其西馳。可以破敵。卽不然。亦可解信州之危。成牽制之勢。隆武覽表。無以應之。道周計窮。十二月。集門人諸衆議曰。敵人雖衆。虛聲耳。若延來春。則彼弓弛馬懈。可卽破也。奈糧餉不足。何。與其半途潰散。廢卻前功。不如決戰。以報朝廷。相持泣下。復進兵攻婺源。至童家坊。忽報樂平已破。信州士大夫各致書迓道周。道周以成師旣出。義不及顧。遂鼓勵諸門人。帥師千餘人以前。次明堂里。僅三百人。馬十四。糧三日。又移軍婺城之十里。天微曙。報提督張天祿率兵四至。道周策馬揮鞭。繼謹等督師鏖戰。叅將高萬榮請於道周曰。當引兵登山。憑高可恃。周從之。正移師間。一隊騎至。從間道突出。箭如雨。軍遂亂。道周被執。輿至婺源。張天祿親至勸降。周罵不絕。

口繼而門人蔡春溶賴繼謹趙士超毛至潔亦解至。周絕粒斷漿。作自悼詩八章。曰。昔時爲柳下。今日見薇陽。此道原無可。於生亦不傷。雲霓人絕望。金石鬼劑香。莫信惠運後。遂無日月光。一樂毅未歸趙。魯連不入秦。兩書傳白璧。隻手動青蘋。得止吾何憾。微名世所親。蒼茫樵採者。不易寫歸轡。二自我甘重繭。爲誰賦鼓刀。金生憐七獲。結侶失同袍。此事不經見。於心良獨勞。長年耽正則。垂老重離騷。三已發英雄嘆。仍多親戚憐。經營文謝後。可在股房前。夫子寧欺我。長文尙有天。春秋二百載。研淚紀新編。四求人何所怨。失道未忘愁。故主日初旭。餘生鳥白投。斷崖千尺網。一葦大江舟。狂稚看吾獨。馳驅答衆尤。五天步憑誰仗。狂瀾失一壺。麟心衝駟鐵。鳳掌落雕弧。干羽柔無力。旂常凍自枯。逍遙河上老。頗憶鄭大夫。六匡坐慙顏。閔抒籌負管簫。風雲生坐次。毛羽合飄飄。大廈難棲燕。江橫卻斷橋。可憐委佩者。晏晏坐花朝。七問言誰敢。信屢卜轉多疑。截指畱軍令。開心割子期。千金修駿冢。三尺斷螯旗。射兇當熊意。君王安得知。八

左右齊承貝勒。洪丞疇命侍者跪進茶一杯。道周接在手。躊躇未飲。左右懇曰。求相國用清茶一杯。周因聽清茶二字。遂擲杯於地。亦采薇周粟之義也。俗無菓泡

茶名曰
清茶

陳子曰。余戊午歲。會陳駿音於粵之韓江。年八十有奇矣。問及石齋先生事。駿音涕泗沾襟曰。我先生之罪人也。死無以見先生於地下。當先生至明堂里。知事不可爲。志決來朝。恐一生事業泯滅。遂將所有稟疏詩賦書禮。悉交駿音。連夜從間道還家。夫人偵知往索。詭應無有。辛卯夏。攜出姑蘇。欲梓行世。不意至杭之江口。是夜鄰家失火。音驚惶逸出。行李灰燼。既不得同時受難。名流後世。又不能表揚遺烈。以闡師德。誠先生之罪人也。語畢又哭。余亦惻然。故余知先生甚詳。且惜先生一腔眞血之不盡傳也。

原禮部尙書兼文淵閣大學士傅冠。從江西入閩。陛見。詢方畧。條陳稱旨。詔爲湖南總督。賜上方劍。便宜行事。督師恢復。至邵武五福關。餉告匱。軍不得前。屢

疏請不報。兵部職方清吏司江隨疏言。傅冠擁兵糜餉。玩敵擾民。冠連疏稱不才。告辭權。隆武詔杖隨。尤冠謝事。遂住于泰寧縣。傅冠字元輔。別號寄庵。江西進賢人。初名元範。中萬曆丙午舉人。改名冠。中壬戌進士。至崇禎己卯。乞休歸里。弘光乙酉。闖黨王得仁入進賢。拔其家。取其積藏。殺其嫡孫傅鼎。故冠入福建。

明隆武二年。清順治三年丙戌。正月。貝勒檄至。弔道周赴江南。周復進水漿。臨發作葵派詩三章。示賴繼謹。蔡春溶曰。火樹難開眼。冰城倦著身。支天千古事。失落一時人。碧血題香草。白髮逐釣綸。更無遺恨處。慘髮爲君親。一搏虎仍之。野。投豺又出關。席心如可捲。鶴髮久當刪。怨子不知怨。閒人安得閒。乾坤猶半壁。未忍蹈文山。二諸子收吾骨。青天知我心。爲誰分板蕩。不忍共浮沉。鶴怨空山曲。鷄啼中夜陰。南陽歸路遠。限作臥龍吟。三途至新安。上元燈節。作三章曰。爲世存名教。非關我一身。冠裳天已定。得失事難陳。姓氏經書外。精神山海濱。

高懸崖上月。偏照夜行人。一世盡遺君父。我獨愛此生。焚香燒稿本。拔劍割薇蕪。苦乞西山士。遠辭東海濱。荷鋤與賣藥。難作古人情。二羹沸猶餘。鼎魚空守暮。磯依然城廓在。髣髴人民非。溪淺鬚眉照。山深薇蕪肥。黃冠黃海裏。望望未曾歸。三又見魚龍百戲。世事不競再絕粒。十八日過新嶺。弔金正希詩四章。曰愛爾才名盛。昔時欲依鱗閣共匡持。蕭蕭風雨鷄鳴日。千古令人誦馭支。一續經溪口萬重山。球爾尙差旬日間。自是岱華須破碎。嶺雲終古不開顏。二旌聽灘頭飛鳥斜。傷心何處動悲笳。英雄運盡無良算。身亦輕來陷左車。三殘碁垂手已難工。又是論人成敗中。但說丹心無所用。一時張眼念藏洪。四正希諱聲原。字子駿。休寧甌山人。隨父客嘉魚。遂籍焉。戊辰進士。授庶常。官歷脩撰。乙酉古城起兵。抗北師被擒。送江南。與參軍江天一同日斬天一字文石。歛之寒江村人。晚年有澄清志。與正希舉義。師敗。天一呼曰。吾與金公同舉。不可使公獨死。挺身追及金翰林。自呼曰。我參軍江天一也。遂並執之。衆廷臣與諸當道帥。

師不前。不但恢復無期。而恐失備禦。蔣德璟疏請行關。確察情形。相機督戰。隆武聽之。環至關。竟以疾去。二月。隆武下詔親征。以兵部尙書吳春枝畱守。吏部尙書張肯堂。與郎中趙玉成。同籍金陵。疏言。臣等生長海濱。請以水師千人。從海道直抵君山。襲取金陵。以迎陛下。隆武大喜。遂催芝龍造艘。龍佯諾。亦不果。隆武行。駐蹕延平。道周至金陵。幽于禁城。既而改繫尙膳。監諸當道。與故知者。悉承貝勒意勸降。周曰。吾既至此。手無寸鐵。何曾不降。勸者曰。欲降須薙髮。周失驚曰。君薙髮了。噫。幸是薙髮國打來。卽薙髮。若穿心國打來。汝肯同他穿心否。勸者慙退。道周閉目。次日見玉梅盛開。索被襪不得。愴然作詩四章。示諸子。洪承疇承貝勒命親詣尙膳。監請見。道周喝曰。青天白日。何見鬼。耶松山之敗。承疇全軍覆沒。先帝曾設御食十五。痛哭遙祭。死久矣。爾輩見鬼。吾肯見鬼。麼。遂閉目。有欲南回者。蔡賴趙毛。各有家報。請命道周。周不作書。但署蔡書。皮。蹈仁不死。履險若夷。有隕自天。舍命不渝。又署賴書。皮。綱。常。萬。古。性。命。千。秋。天。地。

知我家人何憂。又斷粒計有十四日。復進水漿。夜聞鐘聲。感諸舊事。書十二章。吳炳從江西至。延平陛見。擢吳炳爲福建布政司。提調棘闈。以編修劉以烈爲主考。詔如兩都例。各省士子得與試。取中舉人葉瓚等二百一十七名。三月。賜姓成功。條陳據險。控扼揀將。進取航船。合攻通洋裕國。隆武嘆曰。驛角也。封忠孝伯。賜上方劍。便宜行事。掛招討大將軍印。魯王遣柯夏卿曹維才入聘。隆武加夏卿兵部尙書。維才光祿寺卿。遣都御史陸清源齎手書出浙東。報王曰。吾無子。王爲皇太姪。同心僂力。共拜孝陵。吾有天下。終致于王。取浙東所用職。盡列朝籍。無分彼此。貝勒諸王見道周抗節不屈。益重之。令人再勸。承疇亦遣門生往勸。道周書一聯。史筆流芳。未能平鹵。忠可法洪。恩浩蕩。不思報國。反承疇。粘疇署前。疇見笑曰。庸儒不識時務。母使彼沽名。而反累我。遂啟諸王。出道周于曹街。周從容自若。望南謝君恩。望東謝親恩。坐於舊紅氈。引頸受刑。乃壬子日也。同時受難者。漳州賴繼謹。與蔡春溶。侯官趙士超。六合毛至潔等。黃道周。

字幼平。一字石齋。漳之漳浦縣。銅山所人。以易登壬戌進士。閣部路振飛至其地。勒銅山三忠臣于風動石上。一黃道周。一陳瓚。一陳士奇。奇字平人。任四川上川南副使。士奇率兵屢敗張獻忠。遷淮揚巡撫。徐而朝議。恐奇懦。不知兵。以龍文光代之。已交代。出重慶。忽獻賊大至。瑞王素知奇名。畱共守。奇毅然應之。曰。四川乃我舊撫。今日獻賊大至。豈盡新撫之事。推委以負朝廷乎。遂與瑞王督軍民共守。城陷。奇罵賊不屈而死。瓚字亶州。事見前。有客過陳子。陳叙石齋先生事。見而嘆曰。先生忠則忠矣。若爲人謀國。旋轉乾坤。則未敢爲先生許。陳駭然曰。公何言。先生舉動光明。柏節松操。千萬年後。流芳青史者。舍先生其誰客。曰。子獨未聞魏徵。寧作良臣。莫作忠臣之語乎。况甲申之變。天崩地拆。此乾坤何等時。先生何不麻衣痛哭。四鎮之庭。貞誠以感。使若輩知有君。先生何不連進諫章。痛哭流涕。請除君側之奸。以回弘光庸主之心。至其自序。召至江南。見雜沓無可共事。請祭禹陵。出居浙東。寂無一言。任馬阮蹂躪。徒作夢高皇語。

謂卿舍我去。且對曰。朝廷舍臣。非臣舍朝廷之語。又製一衣。刺大明孤臣黃道。周于裾。語弟子南都必敗。當以識吾屍。噫。東南半壁。多士濟濟。何謂孤臣。果識其敗。明係袖手旁觀。蹈文人舌筆欺愚。後世繼又失策。不奉其君于豫章。居中調度。同楊廷麟徵湖南之何騰蛟。東川之曾保英。西粵之何魁楚。鎮黔之李定國。運籌備禦。策畫糧餉。而如在蜀者。請入蜀。在吳者。請入吳。乃姑息從事。偏安閩土。正蘇老泉所謂惟賢者能致不賢。非不賢者能致賢也。故能容人。然後能用人。雖汙身降志。士君子亦當先受其過情。何不降志相從。以保其社稷。而爲過激。附會作光道學。殺陳謙。不出一言。致中漁人之利議。親征不二其行。作離盜跖之漸。輔佐王猷。未有其人。折衝禦侮。未有其人。以出師爲兒戲。稱江左多門生故吏。必有應之。是薄其君父。德澤不施於天下。重其縉紳。恩惠可結于門黨。一木欲支大廈。毛錐欲去禦敵。過建水稱五月渡蘆。弭金鬻仿六出奇能。又表稱不屑爲孔明伯紀。不但不能曲突徙薪。抑且不能作焦頭爛額。春秋責備。

是誰之咎。故張國維激憤曰。誤天下者。文山壘山也。陳曰。公之論固是。但時勢不同。亦責人所難。先生孤掌難鳴。獨木難支。况天命有在。亦不得已之極。思惟有盡其臣衷而已。客曰。子之言謬矣。夫武王伐紂。夷齊叩馬而諫。諫不聽。然後去。首陽聞譏。周薇不食而死。未曾以不諫而去首陽也。盡臣節者。夷齊耳。陳曰。不然。公之評先生若何。客曰。先生特博學鴻儒。繼道統。尋乾坤死地。實讀書之名。全生平之節而已。貝勒世子大駟。舡隻開堰入江。張國維遣王之仁統水師。半渡襲戰。會南風大起。之仁揚航奮擊。國維又督諸軍渡江以應。大捷。適陸清源齋手書報王。並齋詔至江。犒師。時馬士英依方國安。挑國安殺清源。且爲檄數隆武罪。國維聞之。嘆曰。自我戕毒。禍不遠矣。忠孝伯賜姓成功。叩陛辭回安平。隆武曰。卿當此有事之際。何忍舍朕而去。成功頓首曰。非成功敢輕離陛下。奈臣七歲別母。去秋接到。並未一面。忽爾病危。爲子者心何安。以其報陛下之日長。故敢暫爲請假。稍愈。臣卽兼程而至。隆武允成功馳驛省母。準假一月。成

功謝恩出。歸安平。貝勒因江上之戰。不得取勝。怏怏不已。招撫江南經畧洪承疇。與招撫福建御史黃熙胤獻策曰。唐藩雖然稱帝。但兵馬錢糧。悉出鄭芝龍手。不如密書賂彼。若全舉版圖。許以王爵。則彼自棄暗投明。福建可不勞一矢。浙中諸醜俱散。貝勒大喜曰。二位所論極高。計成開清第一功也。宜速行勿滯。一面按兵。一面著熙胤同承疇修書入閩。芝龍因廷爭拂意。雖奉詔諭。口應心違。四月。隆武見諸師不前。責芝龍攬權。逗兵龍免冠頓首曰。臣武夫賦性戇直。不能逢迎。今既見疑陛下。安敢負此重擔。情願角巾私第。以終聖世。隆武曰。朕之大事。悉以委卿。豈疑卿乎。但人有言。不得不爲卿道耳。固畱之下。詔切責兩師。倘畏縮不前。有國法在。鄭鴻逵鄭彩雖出關。仍上疏請餉。逗遛如前。芝龍接承疇熙胤書。許以三省王爵。決意投誠。不通其弟鴻逵子成功。卽馳札泉州。召熙胤子志美謀復書。有遇官兵撤官兵。遇水師撤水師。傾心貴朝者。非一日也。之句交志美。美密遣老蒼頭。送出浙江。與承疇熙胤廷臣會議。出江西。依楊廷

麟未果。鄭芝龍疏稱海寇狎至。今三關餉取之。臣取之海。無海則無家。非親征不可。拜表卽行。隆武手勅畱之曰。先生稍遲。朕與先生同行。使者奉勅至河。芝龍已飛航去矣。且密諭與守關將。施天福。郭壘。陳秀。周瑞等。撤官兵。貝勒以長江未易渡。遣一旅從紹興別道。奪盤山關。以分其勢。守關總兵盧若驥。會諸將堅壁死守。屢攻不下。相持兩月。適韓固山平左。夢庚川降將劉孔昭爲鄉導。清兵齊集。若驥兵寡糧匱。遂議決戰。大開關門出敵。後營副將周茂首先冲殺。被箭傷死。若驥復收殘兵入關。諸將見勢逼。援無。請投誠。驥忖人心已離。夜半率子弟親隨三百餘騎。棄關從溫州渡舟山。韓固山統大軍定台溫福寧。師會福州。魯王知國安殺清源。恐閩發兵問罪。遂抽師令國維西禦。起禮部尙書余煌兼兵部尙書。代國維督師江上。因此江上之師單弱。余煌字武貞。浙江山陰人。天啓乙丑狀元。入史館。直言忤時。以禮部尙書假歸。弘光累徵不起。貝勒世子平浙時。整衣冠欲死爲義師。鄭咸一救之。勸其共事魯王。招撫經畧洪承疇。

黃熙胤接芝龍復書。遂啓貝勒。貝勒揮南北岸軍齊進。用火砲攻方國安營壘。適國安食。一砲擊碎其席。並厨竈。無有完者。安嘆曰。此天奪吾食也。又見北岸兵勢強盛。于五月二十七夜。與馬士英阮大鍼潛劫魯王。而南。次日諸帥聞知。各潰散。鄭遵謙移資入海。獨王之仁一軍不動。國維與之仁相議。抽兵五千分守各營。之仁泣曰。壞天下事者。方荆國也。北岸屯師數十萬。倏然而渡。孤軍何以迎敵。之仁有舡。可入海。公兵無舡。速自爲計。國維不得已。乃進旅追扈魯王。王爲國安士英所困。欲挾入關獻功。適守者病。王得脫。登梅聞國維至黃石巖。傳維遏防四邑。維提師行。凡欲過之橋。業爲國安斷矣。不得進。貝勒師將至。紹興督師余煌放城中婦女。出匿山谷。正衣冠。北向叩首。出東門。渡東橋。赴水死。陳亟輝。鄭之尹。王思任。吳存魯。陳潛。夫葉汝衡。高岱等。皆死之。張國維聞義。烏破。衆勸維入山。維曰。誤天下者。文山疊山也。一死而已。報貝勒師至七里寺。國維正衣冠。南向再拜曰。臣力竭矣。從容赴闔池死。興國公王之仁。載其妻妾。二

子二婦。幼女諸孫。盡沈于蛟門外。捧所封勅印。北向再拜。投之水。獨至松江。峨冠登岸。百姓駭愕聚觀。之仁從容入見。內院洪承疇自稱仁係前朝太師。不肯身泛波濤。願來投公。死於明處。勸雍髮不從。於二十四日。慷慨就刑。永豐伯張鵬翼守衢州。部將秦應科爲內應。鵬翼戰死。樂安王。楚王。晉平王。督學御史王景亮。知府伍經正。推官鄧巖忠。署江山知縣方召。皆被殺。馬士英阮大鏞方國安。方逢年等。擁兵數千。疏請入關。隆武以其罪大不許。士英計窮。遁入台州山寺爲僧。阮大鏞二方皆雍髮投誠。徐而士英被獲。解至。與刑部尙書蘇壯。貝勒俱令隨內院辦事。守關將施天福等。接芝龍密諭。遂聲言乏餉。枵腹。難以禦敵。盡撤兵四潰。掠至建寧。按院鄭爲虹與科道黃大鵬閉城。發倉庫犒賞。歡聲而去。一郡得全。貝勒師至漁梁。郭曦陳秀獻仙霞關。貝勒從容躡嶺。鄭爲虹按浦城。百姓請降。虹曰。不可。再請。虹執決不可。衆背虹獻城。擁爲虹見。貝勒令之跪。虹仰天大笑不屈。貝勒嘉其從容節操。不忍害。勸其雍髮。爲虹曰。負國不忠。辱

身不孝。忠孝俱虧。生我何爲。寧求速死。髮不可薙也。明日復令見。責其輸餉。虹曰。清白吏何處得金。百姓爭欲代輸。虹以民窮財盡答之。大罵。奪刀自刺胸臆。見殺。隆武知仙霞失守。芝龍又去。獨立無靠。遂決意幸懣。於八月二十一日啟行。從者惟何吾鵬。郭維經。朱繼祚。黃鳴岐而已。二十三日。貝勒至延平。知府王士和縊死。詢土人知隆武由汀州欲遁江右。遂遣總兵李成棟領師追之。貝勒提大師至福州。禮部尙書曹學佺奔鼓山。向佛前問休咎。甫拜下。見繩一條。佺急取袖之。馳回家。將書案四立。改爲棺。整衣冠題壁云。生前一管筆。死後一條繩。投筆自縊。通政使馬思理縊死。侯官縣貢生元綸不食死。閩縣民趙卽拜辭父母自縊。指揮使胡上琛飲藥死。一妾同死。齊巽不屈被殺。永福武舉趙子章死。貝勒入城安民畢。遣韓固山領兵平興化。泉漳等府。獨安平。鄭芝龍所踞。軍威甚盛。船隻齊備。不肯順授。固山馳報。貝勒遣投誠兵部尙書郭必昌持書招之。其畧曰。吾所以重將軍者。以將軍能立唐藩也。人臣事王。苟有可爲。必竭其

力。力盡不勝天。則投明而事。乘時建功。此豪傑事也。若將軍不輔主。吾何用將軍哉。且兩粵未平。令鑄閩粵總督印。以相待。吾欲見將軍者。商地方故也。芝龍得書大喜。厚待必昌。遣員同必昌進降表。其子成功勸曰。吾父總握重權。以兒度閩粵之地。不比北方得任意馳驅。若憑恃險設伏。以禦。雖有百萬。恐一旦亦難飛過。然後收拾人心。以固其本。大開海道。興販各港。以足其餉。選將練兵。號召天下。進取不難矣。龍曰。稚子妄談。不知天時時勢。夫以天塹之隔。四鎮雄兵。且不能拒敵。何況偏安一隅。倘畫虎不成。豈不類狗乎。成功曰。吾父所見者。大槩未曾細料機宜。天時地利有不同耳。清國兵馬雖盛。亦不能長驅而進。我朝委係無人。文臣弄權。一旦冰裂瓦解。釀成煤山之慘。故得其天時。排闥直入。剪除兇醜。以承大統。迨至南都。非長江失恃。細察其故。君實非勸亂之君。臣多庸碌之臣。遂使天下英雄飲恨。天塹難憑也。吾父若藉其崎嶇。拒其險要。則地利尚存。人心可收也。龍曰。識時務爲俊豪。今招我重我就之。必禮我。苟與爭鋒。

失利。一旦搖尾乞憐。那時追悔莫及。豎子渺視。慎母多談。成功見龍不從。董其衣跪哭。曰。夫虎不可離。山魚不可脫淵。離山則失其威。脫淵則登時困殺。吾父當三思而行。龍見成功語繁厭聽。拂袖而起。成功出。適遇鴻逵於途。告以始末。逵壯之。功遂密帶一旅。遁金門。鴻逵入。芝龍語及成功。少年狂妄輕躁。不識時務。始末鴻逵曰。夫人生天地間。如朝露耳。能建功立業。垂名異世。則亦時不可失也。吾兄當國難之際。位極人臣。苟時事不可爲。則弟亦不敢虛鼓唇舌。况兄尙帶甲數十萬。舳艫塞海。餉糧充足。輔其君以號召天下。豪傑自當嚮應。何必委身於人。此弟深爲兄所不取也。芝龍曰。吾弟所言。眼前之事。非長途計耳。甲申之變。天下鼎沸。亦秦失其鹿。故清朝得而逐之。業已三分有二。若以小丈夫之氣。振一旅而敵天下兵。恐亦不量力也。不如乘其招我。全軍歸誠。正棄暗投明。擇主而事。古來豪傑。亦往往有行之者。清朝正未必忍相棄耳。鴻逵曰。既吾兄志決。亦不可不爲之慮。芝龍曰。人以誠心待我。我卽以誠心應之。何疑焉。吾

弟靜聽。俟吾單騎往會貝勒。看他如何相待。再作商量。鴻逵曰。吾兄已有成算。弟亦將奈何。惟有洗耳聽佳音耳。龍令李業師周繼武等。超選好漢。盔甲鮮明者。五百人隨從。刻日往省面貝勒。又差往金門。尋成功同行。功不從上書。有從來。父教子以忠。未聞教子以貳。今吾父不聽兒言。後倘有不測。兒只有縞素而已之句。芝龍見之。嗤其狂悖。卽喚季子渡同行。貝勒得必昌復命。隨勅府縣接應。凡所過驛站。供奉威儀甚壯。塘汛飛報貝勒。卽差官過烏龍江。遞茶遠接。又令文武郊外相迎。龍見貝勒相待殷勤。滿心歡喜。進城見貝勒。貝勒握手歡若平生。且恨相見之晚。龍請擅立唐藩之罪。貝勒再三安慰曰。此足見將軍之經權有方。可爲則爲之。不可爲。則擇主而事。况兩粵未平。海濱地方。非仗將軍熟識。未可一旦而奏膚功。今日得見。實朝廷之福。將軍休疑慮焉。龍頓首稱謝。遂雍髮大開筵宴。賞錫倍厚。貝勒密與諸內院議曰。聞芝龍平生桀黠多智。多持兩端。今大隊不來。而單騎至此。實有觀意。古云擒賊擒首。若縱之去。恐有意外。

之慮。以貽生靈憂。不如乘夜詔其陛見。挾其北上。則蛇無首。其餘碌碌無能爲也。諸內院曰。殿下所見甚明。命督撫連日筵宴。至第三夜。內院到鄭芝龍寓所。傳有旨意。欲公陛見。而詢方略。以平兩廣。守至天曙。卽與芝龍同上北京。

明隆武二年。清順治三年。丙戌秋八月。總兵李成棟奉貝勒命。領兵追隆武。隆武駐蹕順昌。偵報延平追騎將至。遂率曾后等倉皇上馬。惟忠誠伯周之藩從。駕給事中熊偉率兵五百餘隨行。中途后鞭墜地。之藩不令士卒。自下馬檢獻。親爲帝后前驅。帝后不名其官。惟呼我兒。權同父子。適隆武口渴覓茶。之藩以小桶汲之進曰。願陛下下一統。隆武喜。飲至袍袖俱濕。抵行在。二十七日薄暮。之藩辭欲出教場提調備敵。隆武不允。令其護衛。至三鼓回宿。五鼓上朝。到行在門首。忽聞嘈囂聲。未敢突進。停足聽之。方知帝后角口。嘆曰。此何時也。倘敵兵突至。將奈何。天明隆武出視事。見之藩勤勞。加之藩總督御營。問諸輔臣。僅黃鳴俊朱繼祚二人。何吾駒郭維經悉逸去。至關帝廟前。成棟追兵到。羣呼問曰。

誰是隆武之藩挺身應曰。我卽是也。問欲何爲。之藩詭認殆欲脫主難耳。羣矢齊射。之藩鏖戰。胸膛連中八箭。隨中隨拔。去手擊死數十人。忽腦後中兩箭。墜馬被殺。時秋曙正盛。羣屍敗腐。獨之藩越九日夜面如生。鄉人奇之。收葬於汀之羅漢嶺。隆武與后等奔至三元角。成棟追兵又至。熊偉抽劍督二十餘人。向前與鬪。偉爲箭傷喉。墜馬死。隆武與后逃入汀州府堂。腹飢。從者市湯員三進。方舉筋。成棟領騎兵衝入。揮箭齊發。隆武與后嬪諸人悉爲射死。朱繼祚黃鳴俊俱遭擄。隆武帝后死於汀州府堂。乃順治三年八月二十八日。諸家紀事。悉書隆武被執。送福州斬於市。但時有錦衣衛陸昆亨從行。眼見隆武帝后戎裝小帽與姬嬪被難。昆亨脫出。百姓收羣屍。葬於羅漢嶺。豎其碑曰。隆武母立光華太姬諱英忠烈徐娘娘之墓。後昆亨歸鄭爲口述云。故特表出。搜龍槓書萬餘卷而已。書內夾有馬士英阮大鍼方國安方逢年連名請駕出關。欲爲內應疏。按其月日。在已降後。馳送貝勒。擒士英國安父子與逢年皆斬。大鍼時方遊

山聞信自投崖下死。亦戮屍。李成棟平汀郡等府。示令如有不遵制薙髮者滅族。傅冠寄泰寧門人江亨龍家。龍子養源見示嚴切。勸冠薙髮。冠不從。養源懼。百口爲冠累。遂將傅冠昇出。冠自吟曰。憤血已成空。往事徒回首。國難與家仇。永訣一杯酒。幻影落紅塵。倏忽成今古。名望重如山。此身棄如土。夜宿溪頭冠。私起欲投淵。爲守者覺而止。又次石牛關。欲搶頭死。爲送者攔護。過羅漢嶺見新墳。問輿者曰。忠誠伯周之藩墓。拜之泣曰。聞道延津簇羽騎。翠花飛越五雲迷。汀州艸色空迎輦。誰覆周郎裹革屍。至汀見李成棟。棟親解其繫。延之上坐。勸曰。公大臣也。若遵制薙髮。棟當保公攀麟。冠詫曰。自冠裳以來。曾有禿頭宰相否。棟曰。公髮種種。與禿何異。但稍加銚。以掩衆目。便可報文。冠厲聲曰。汝知千古有文文山乎。我鄉先進也。我頭可斷。而髮不可薙也。棟自是不復言。然禮待甚厚。飲食與共。廣西巡撫瞿式耜。與兩廣總督丁魁楚。兵部尙書呂大器。李應茂等。聞隆武受難報。設位以哭。並會議立君。承繼大統。式耜曰。桂王相貌雄

偉舉動端嚴。賢而當立。於冬十月十四日立桂王監國。以肇慶府爲行宮。丁魁楚兼大學士。呂大器兼中樞大學士。瞿式耜吏部右侍郎兼內閣大學士。掌銓事。正會議戰守。防設險要。忽太監王坤請桂王暫還梧州。坤崇禎十六年間。曾督餉宣府。甚作威福。北京陷。依弘光。欲督餉閩粵。改名肇基。不果行。而弘光遁。坤入閩。隆武不用奔粵。依桂王。奉迎趨媚。王信惑之。後爲定閩王劉錫胤所逐。時有隆武舊相何吾騶。蘇觀生遁至粵東。亦聞桂王賢而貌奇。欲到粵西。以元老共立。舟次三水縣。聞爲式耜所立。恥不預其議。卽返棹羊城。適輔明侯林察載唐鄧諸王航海至廣。觀生與吾騶黃士俊會。布政使司顧元鏡等共議迎立隆武之弟諱聿鏐入城卽位。改元紹武。頒詔布告。桂王亦遣兵科給事中彭燿至廣宣諭。觀生惡之。遂潛殺燿。令陳際泰率兵攻肇慶。桂王亦遣兵部右侍郎林佳鼎督師出禦。相遇於三水縣。戰而佳鼎失利。是晚韶州兵至。合廣兵復攻佳鼎。鼎平地未有溝柵之固。惟與僉事道夏四敷分頭鏖戰。全軍覆沒。報到了。

魁楚議不卽位。無以壓人心。而號召天下。乃自梧州迎桂王。於十二月十八日。卽位肇慶府署。改元永曆。以晏清爲吏部尙書。瞿式耜爲吏部尙書。兼內閣大學士掌銓事。何三省爲戶部尙書。黃奇遇爲禮部尙書。曹燁爲兵部尙書。黃日晟爲刑部尙書。非濟爲工部尙書。郭之奇爲詹事正詹。加巡撫御史王澄化爲兵部右侍郎。督師至三水。連營守峽口。以扼廣兵。何騰蛟爲總督鎮衡州。呂胤錫爲巡撫治長沙。焦璉陳邦傳各督兵分守粵西。孫可望鎮守雲南。李定國鎮守貴州。太監王坤爲司秉筆。當芝龍暗撤兩關守兵。永勝伯鄭彩遁踞廈門。迨聞隆武亡。隨率舟師會閣部熊汝霖。迎原監國魯王子舟山。王封彩建威侯。弟聯定遠伯。進取福寧諸縣。並陷興化府。王進彩爲建國公。聯爲定遠侯。季弟斌鎮南伯。建寧鄉紳密通。接駕踞城。起議原吏部主事林垓潛匿山中。散家資募兵。奪據福清縣。貝勒遣副將滿進忠領兵來攻。垓率衆迎敵。戰敗奔入城。追兵緊。門不及閉。回身復戰。中箭數十。死立不仆。進忠見而奇之。拜乃仆。平和縣人。

曾慶等與詔安合詔起兵。立德化王朱慈燁據將軍寨。陷大田順昌將樂三縣。鄭聯陷漳浦縣。知縣洪有禎不屈死。貝勒督舟師出攻海壇。鄭彩率衆迎敵。戰北。遂奉魯王退居廈門。徐而復上舟山。閣部熊汝霖死。疑爲彩害。賜姓成功。潛師涪洲。聞隆武帝后凶信。設位令軍民掛孝。望北祭。繼又突報其父被貝勒挾而北上。從涪洲回安平。會閣部路振飛曾櫻萬年英等。擇日起兵。誓師有本。藩乃明朝之臣。子縞素。應然實中興之將。佐披肝無地。冀諸英傑共伸大義之句。用招討大將軍印。稱罪臣國姓成功勤王。出家帑犒師。以洪政陳輝爲左右先鋒鎮。楊才丁鎮爲親丁鎮。郭泰余寬爲左右護衛鎮。林習山爲樓船鎮。柯宸樞楊朝爲參軍。兼統領隨征。杜輝爲總協理。振飛字太平。北直人。乙丑進士。原爲閩撫。依成功。後從永曆死於粵東之陳村。年英字靜齋。湖廣黃州府。原台州通判。隆武詔至台州。浙右張國維方輔魯王監國。各官遲疑。而詔不開。英挺身曰。此吾君也。豈有不開之理。遂開讀。隆武聞其事。擢英爲兵部職方司主事。迨隆

武亡。依成功爲參軍。宸樞福建泉州府晉江縣人。隆武曾授以參軍。督軍出關。屢有奇謀。杜輝字功參。泉之同安馬鑾人。後降清。授粵東水師總兵。甲寅之變。又從吳三桂爲湖廣水師左將軍。謀再降清不密。被三桂姪應奇所覺。夜馳兵至。圍擒絞死。時金門乃定國公鄭鴻逵所據。廈門爲建國公鄭彩同弟定遠侯鄭聯所據。其上海壇南日南北二加舟山等島。悉係魯王遣萬安侯周瑞。平彝侯周鶴芝。定西侯張名振。阮美等。分守其下。諸島如銅山。係朱壽所踞。南澳係忠勇侯陳霸所踞。惟安平塊土。莫能展其所爲。徒訓練士卒。整飭船隻。飄遊於鼓浪嶼。或入海澄。或出鎮海衛。以觀其變。

永曆元年清順治四年丁亥正月。路振飛萬年英。誤聞何吾騶黃士俊蘇觀生。顧元鏡等。同隆武逃遁於粵東。辭成功。泛海往就之。功曰。先帝當日在汀州。業已受難。故衆散。何能脫身至粵。恐是好事者。假此爲名。未可深信。但公既有所聞。而欲去。余安可阻。以失爲臣子一片孤忠熱血。遂令備資斧船一號送之。時

同行有北直進士朱昌時。原金衛指揮使常壽寧等。後舟次粵之虎門。遇輔明侯林察方。云是隆武之弟。何吾騶等共立爲紹武。被總督兩廣佟養甲同總兵李成棟。由惠州晝伏夜行。於去年十二月朔日被城。紹武被擒。非隆武也。振飛等不敢前。復隨林察回廈門。依成功。二月韓固山奉貝勒世子命。統騎步兵等突至安平。鄭芝豹、芝鵬等懼兵威不敢戰。斂其衆。揭家資子女於巨艦。棄城出泊外海。成功生母倭婦翁氏手持劍不肯去。強之再四。亦不行。清兵至翁氏毅然拔劍割肚而死。成功聞報。擗踊號哭。縞素飛師前來。而固山見船隻塞海。亦不敢守。棄之回泉。功殮其母。收整城池。與芝豹、芝鵬等守之。四月成功復合鄭彩、楊耿等衆入海澄。破九都。七月鴻逵見成功遠去。虞有鞭長。書說成功。凡事當先固本。而後求末。今汝安平彈丸之地。無長江險要可恃。倘韓固山率大隊復來。一旦反救不及。將奈何。宜速回師。助汝一旅。合攻泉州。暫作安身。然後蓄兵養銳。窺其罅隙。舉兵旁掠。成功令其將看守海澄石尾港。八月從九都回二

十二日會鴻逵師於泉之桃花山。鄉紳沈佺期、林橋升、郭符甲、諸葛斌等相率起兵應之。佺期字雲又，別字復齋，泉之南安人。癸未進士，屢遷都察院御史。後以醫行世。卒于臺灣。橋升，丙子舉人，屢遷光祿寺卿。泉之晉江人。符甲，癸未進士。晉江人。南京主事，戰死七日不變色。鄉人異而葬之。斌，字士倫，監紀催官。泉之晉江人。泉州提督趙國祚，每輕視成功，率驍騎五百步兵一千五百人，分爲兩隊。一出塗門，一出東門，直冲營壘，成功令洪政、陳新二將統衆禦之。自辰至午，冲突相拒。鴻逵料不能勝，遣林順夾攻，功亦令余寬出奇兵截殺。祚兵遂潰。追至城下，鳴金收軍，成功合鴻逵衆，每攻城，咸爲溜石寨。參將解應龍所援，成功請於鴻逵曰：「解應龍在溜石寨作犄角勢，此城難攻。」叔父可督兵攻城，應龍必來援。姪遣水師一鎮，桑一筠，全杜輝暗襲其寨，另著郭新、余寬暗伏其寨中。途俟彼回救，齊起來攻，擒之必矣。鴻逵曰：「可隨掌號進兵。」應龍果來援，至中途，忽流星馬飛報賊攻寨甚緊，龍卽回師，伏起戰死。而溜石寨亦爲杜輝所破。軍

聲大振。國祚加意防禦。日夜巡督城內。已故鄉紳郭必昌之子顯。欲爲內應。謀洩。國祚差兵往擒。惟有空室。衆駭異。顯有愛姬春姊。利顯母黃氏珠珥。投國祚。乞揀所藏皮箱一。願首告。國祚許之。遂指後園井中旁石是門。祚令人下。攀開。果一大穴。全家在焉。共一十三口。收而殺之。春姊拾皮箱。亦爲衆所殺。並累及原閣部黃景昉。又西門守將楊義。與諸葛斌通爲援。適國祚召義守東門。斌不知。是夜率衆臨城。斌與副將蔡參等全軍俱沒。祚於是夜禁益嚴。不敢喘息。功督砲環攻。又令洪政陳新余寬郭泰等領衆架雲梯齊上。國祚百計禦之。不得下。漳州城守王進聞泉被圍。繼報溜石寨失。解應龍戰死。頓足曰。城危矣。吾當往救。漳州總兵楊佐阻之曰。各有汛地。且未奉總督令。勝敗干係。是誰擔之。進曰。公言差矣。賊今從中截殺。制臺之檄。安能飛過。倘徒坐視。一旦城破。賊勢愈熾。吾城其能保乎。此謂唇亡則齒寒也。公善守城池。吾當往救。遂將騎兵五百步卒千人。分爲三隊。第一隊令總領旗趙英同左哨千總楊得功。會同安營遊。

擊廉郎。聲言攻取安平。安平是彼巢穴。勢必回救。此倣攻魏救韓。以分其勢。吾自領一隊。相機而動。其餘一隊。著右哨千總李玉。同遊擊祁光秋作援兵。先遣人稱本領統領大師。合潮州援兵數萬。即日抵泉郡。破賊解圍。並直搗其穴之。成功聞報。見鴻逵曰。王進接連潮師救援。不日即到。泉郡堅而未易破。倘以一旅扼五陵而攻安平。則首尾受敵。鴻逵曰。如此奈何。當且暫退。成功曰。安可退師。可令楊才張進先去刺圍守據。林習山與杜輝整備。瓶隻泊潯尾以防不測。叔父可督林順洪政等急攻其城。姪領郭泰余寬據營五陵。作兩邊救援。逵曰。可。王進至大盈。偵知各處聯營把守。大路不得進。進一時計拙。繼探有小路。從南安縣出。發令遣人夫備草束接應。詐稱欲取安平。著楊德功董之。自帶馬步。乘夜由冷水井過何坑。出南安。突至泉州城下。與洪政戰。政敗。國祚于城上遙觀。知救兵到。以此亦四面吶喊。虛作相助勢。鴻逵心虛。急遁金門。而成功亦退安平。泉州圍解。入城進見國祚。請救遲罪。祚謝曰。非公來速。此城危矣。進恐

成功乘勢取漳，卽辭祚回師。成功因報鴻逵從潯尾遁，亦就不援。卽將楊才等兵抽回，把守五陵要口。自歸安平。後偵知王進儻以一千五百人解圍，甚追悔。隨使洪政余寬二將領兵從小路埋伏青石宮。又令楊才郭新二將領兵埋伏刺園。另令張進帶兵接應五將去後。不日回說王進已過二日矣。總兵李成棟奉命平粵，以李發代之。待傅冠復加禮。十一月二十一日，冠與發對奕方罷，發閱文書謂曰：今部文到，欲收公矣。冠欣然起曰：早畢吾事，公之賜也。遂整衣冠向南拜曰：臣負罪無狀，死不足贖。復回向西拜曰：祖父暴骨，惟冠之辜。羞見先人於泉下，坐地引頸受刑。令人執刀，無一應者。又懸賞例，亦不忍下。有從征知府李蘭友家丁張福出，受賞施刃，以冠首函寄汀州府獄。觀者莫不墜淚。是夜悲風震瓦，暴雨漲河。二十二日，家人傅國禎家負骸稿葬于汀之羅漢嶺。與忠誠伯周之潘相對，公首在獄中，夜屢吐白光。如囚之有冤者多見之。訴皆驗。獄吏朝夕焚香祀之。忽一夜，吏夢公辭曰：兩年受爾殷勤，我欲還矣。吏神其事，白

于令不數日。公之子果乞骸骨歸葬。已奉清旨來汀。始得合身首殮之。徧體皆黃金色。有舊衣二件。棄墓側。風雨經年。帛色尙如故。道傷而奇之。咸曰。此相公衣也。見者拜之無敢動。後爲寧化賴子取去。蘇觀生何吾騶於前歲十二月。在明倫堂講書。被李成棟率輕騎間道。晝伏夜行。砍門而入。紹武踰牆匿。王應華家。俄而墜城出。爲追騎所殺。觀生自縊而死。何吾騶顧元鏡等降。總督佟養甲安民畢。卽令李成棟統騎兵到三水。王澄化退守峽口。王坤請永曆西走。式耜奏曰。二地乃祖宗之土地。守之則可以設計破敵。使英雄志壯。若輕棄而走。不但上負祖宗。且失天下志士之心。永曆不聽。遂乘輕舟上西峽而去。從行者惟瞿式耜一人。成棟至肇慶府。進師梧州。永曆奔桂林。巡撫曹爨降。瞿式耜請建都設禦。令丁魁楚屯兵岑溪。成棟遣人招之。不肯降。乃伏兵與戰。矯敗退籐江。伏起。魁楚中箭死。成棟揮軍逼桂林。王坤請幸楚。式耜請駐全州。疏畧曰。半年之內。三四遷移。兵心民心。無不惶惑。我進一步。人亦進一步。我去速一日。人亦

速一日。若去而不守。愚者亦知其拱手去矣。請留守桂林。李成棟帥至。值焦璉自全州來。督兵合禦。成棟逼戰。璉奮勇冲陣。棟方退。桂林得全焉。成功因攻泉不克。回安平。有原浙江巡撫盧若騰進士葉翼雲舉人陳鼎俱至。謁成功。功待以上賓。每事必諮之。又得海澄人甘輝身材五短。猛勇絕羣。漳浦人藍登武藝精熟。南安人施琅機畧暢曉。與其弟顯貴及邱縉林壯猷金裕等朝夕操演部伍陣法。並令堆積糧餉于安平。

永曆二年。清順治五年。戊子夏五月。成功統林習山甘輝等犯同安。守將遊擊祁光秋協防遊擊廉郎合領騎會九都鄉勇出禦。甘輝挺身出戰。守備王庭坐馬失脚被斬。兵潰。成功揮軍至城下。光秋與郎急抽兵入城。與知縣張効齡議曰。賊兵勢大。恐孤城難守。不如與公今夜乘其無備。開門遁去。然後請師恢復。公意如何。齡曰。食君之祿。守君之土。分所當然。今賊雖衆。吾當與公嬰城死守。漳泉二處。必發兵來救。豈可棄城以自取罪。郎曰。公所言者守經。弟所言者行。

權賊兵勢大。水陸雲至。兵傷已過半。卽有一二健勇亦傷弓之鳥。是兵卒不足恃也。地方平坦。城垣低矮。一旦四面環攻。砲器火藥甚少。是城廓不足恃也。縱能禦之。而援兵遲至。倉廩無積。是糧又不足恃也。有此數難。當達權暫退。再作商量。弟豈不知食君之祿。守君之土耶。效齡聞言。如夢方醒。曰。非公剖。幾乎誤矣。約二更卽率騎兵各飽食。同效齡開西門遁。百姓知文武棄城去。天曙迎成功入城。功出令安民。不許搔擾。民賴以安。功以葉翼雲爲同安知縣。勸諭追徵。以助軍需。陳鼎爲教諭。傳告諸生。起義勤王。忽報輔明侯林察自廣東逃回。因與蘇觀生等共立紹武。曾禦永曆於三水。後兵鎮虎門。廣東破。不敢歸永曆。仍回閩見成功。詳陳瞿式耜等擁立桂王始末。成功加額曰。吾有君矣。遂設香案。望南而拜。尊其朔號。卽修表遣原隆武中書舍人江于燦黃志高二人。從海道入廣稱賀。並條陳時勢。卽以邱縉林壯猷金作裕三將守同安。自領大隊舟師。至東山候永曆旨。以便會合恢復。提督趙國祚知同安陷。飛報總督轉題。奉

旨遣佟鼐李率秦陳錦督師恢復各處地方。七月初三日檄到邱縉等聞報。卽與翼雲陳鼎議戰守策。翼雲曰。今新君登極。我藩主志存勤王。以一城托我等。自當竭力禦守。邱林二將軍。可督兵守大盈嶺。以扼泉師。金將軍守苧溪嶺。以扼漳師。翼雲等督民兵守城。一面通知本爵。出奇兵於五陵。從中截殺。以分其勢。一面飛請藩主回軍救援。不知諸公意下如何。金裕等應曰。公籌畫得宜。謹聽尊命。卽出兵守要口。佟鼐督師至。邱縉林壯猷列陣以待。被領旗黃有信率驍騎衝突。佟鼐等同提督揮軍齊進。邱縉中五箭。林壯猷獨力難支。遂遁入城。金裕聞邱林敗績。空守苧溪嶺無益。亦斂軍回。與翼雲陳鼎分門死守。佟鼐等於八月十六日曉夜攻擊。雉堞平地。城遂破。邱縉林壯猷金作裕各巷戰力竭死。翼雲當城未陷時。謂陳鼎邱林三將曰。余今雖未死於君事。卻得死於明土。亦吾輩之幸也。迨至被擒。解見從容自若。與陳鼎俱不屈被殺。佟鼐等以人民同力堅拒。傷士卒甚多。發令盡屠戮。血滿溝渠。秋八月。成功在銅山整頓船。

隻訓練士卒。候廣西永曆信到。忽接葉陳邱林告急請援文。卽整大隊舟師回救。奈北風甚發。難以駕駛。五日方抵金門。偵報同安已破。諸將戰死。葉陳不屈被殺。全城屠戮。功痛哭遙祭。情動三軍。遂移師鎮海銅山。漳浦守將王起俸謀降事洩。棄家從舊鎮入銅山。成功受降。加俸總練使。同柯宸樞聯絡銅山等處募兵措餉。詔安縣五都人林日灼鼓衆拒之。功令甘輝往征。日灼旋滅。十月江于燦黃志尙同太監劉玉賚永曆詔到。晉封成功威遠侯。功拜受畢。厚待劉玉。遂興師。從雲霄白塔登岸。守雲霄將張國柱迎戰。被施顯貴所殺。遂率衆攻城。中軍守備姚國泰拒守。城陷。國泰巷戰。重傷被擒。功惜其忠勇。令醫治。用爲監督。粵東原大學士陳子壯。兵科給事中陳邦彥。同起兵船千艘。合攻廣東。因故指揮楊可觀。楊景燁爲內應。謀洩被殺。懸首城上。邦彥戰死。子壯遁高明。遣家人陳榮賚書赴成。功處請救。又原兵部侍郎張家玉。會故南海指揮安弘猷。訓導張治亦起兵襲東莞縣。殺典史張元鼎。知縣鄭鏊自縊。李成棟聞報率兵至。

擊斬安弘猷。家玉走龍門。糾眾遣閩將楊可樛。亦賣家書至。成功卽整師。欲從虎門入援。至靖海。聞二家俱遭難。乃止。子壯號集全。別號秋濤。萬曆己未。探花東筦人。守高明六個月。城破被執。不屈。引頸受刑。同時受難。刑部主事朱實蓮。字子潔。天啟辛卯舉人。邑庠生黃英。元晏。家玉字賢子。東筦人。崇禎癸未。進士。佟養甲遣巡道張元琳至其家勸蘿髮。玉冠帶出見。不允。元琳去。玉遂與師林洵謀起兵。破東筦。韓如璣自惠州來會師。成棟至。弘猷戰死。張治。張恂。尹斌。咸自縊。玉祖母陳氏。黎氏。赴水死。妻彭氏。大罵被刃。又率眾拔博羅。糧盡。眾潰。玉陡走十五嶺。集三萬餘人。攻增城。成棟往援。揮騎衝突。玉陣亂死。戰。項中三矢。傷一目。赴水死。割其首。顏色不變。其師林洵被執在獄。臨刑吟詩曰。願續當年李侍郎。遺言謝世報高皇。獨憐一片忠精骨。不死沙場死法場。張恂字壬和。壬子鄉薦。張治字台玉。程香縣人。安弘猷字叔壯。靈辟縣人。李成棟奉總督佟養甲命。提師攻桂林。復合平南定南靖南三藩勁旅。直趨武岡。劉承胤令其弟

承輔。永曆從間道奔靖州。大學士吳炳被執不屈死。三藩圍武岡。折矢招承胤。胤舉城降。部議以其放永曆西去殺之。永曆自靖州奔柳州。得何騰蛟。郝永忠。盧鼎。兵俱至。防禦始安。佟養甲督兵攻全州。何騰蛟率蕉蕙。郝永忠。盧鼎。合滇師。趙印選胡一清分道夾攻。養甲遁。永曆仍還桂林。諸帥不和。兵譁爭搆。成棟偵知。乘虛潛師至北門。式耜守城。騰蛟召諸將合擊。棟方退師。棟負平粵有功。而恥受制於總督。偶演戲。其妻張氏見而笑焉。張氏係陳子壯之妾。成棟抄其家。見張氏美麗。遂娶之。相從年餘。未見歡顏。今日之喜。必有由也。棟詰之。氏曰。爲見臺上威儀。觸目相感。棟令人取冠服自穿。氏起取鏡照之。棟躍起曰。眞威儀可觀也。遂萌反念。密囑標兵譁索糧餉。齊集教場。然後請養甲出城撫輯。甲不知是計。同棟行。甫坐下。衆兵鼓噪。同時剪辮。即飛書通粵西巡撫耿獻忠。亦剪辮。江西提督金聲桓同副將王得仁殺童巡撫。剪辮。反應之。共尊永曆朔。聲桓得仁咸是左良玉部將。李成棟隸高傑標下。且交好。故片紙至。卽從。永曆

命兵部侍郎萬翔。兵部職方司揭重熙。監局鑄印。封成棟。惡國公。養甲囊平伯。聲植。豫國公。得仁。建武侯。獻忠。兩廣總督。成棟。遣原翰林院檢討蔡之俊。賚衣。前往桂林。請駕幸粵。永曆下廷臣會議未定。瞿式耜疏言有云。駕若東幸軍中。將帥謂朝廷樂新復之土。而成棟亦有邀駕之嫌。號令既遠。人心渙散。臣恐不能制也。遂不果行之。俊還報成棟。棟具疏再請曰。夫天下乃太祖之天下。今日光復舊業。何爲樂新土。陛下若欲中興。須親統六師。行間指揮。俾諸將士奮勇。僇力。四方咸知有君。自當嚮應。豈可偏安粵西。優游度日。令天下豪傑寒心乎。此臣鯁鯁至計。非冀邀駕之功。遂令原給事蒙正發。再往南靖請駕。永曆方至肇慶。李成棟。率文武跪接如禮。永曆撫成棟背曰。朕今日中興。全賴卿力。決不吝分茅列土之封。棟叩首曰。軍旅之事。毋煩陛下深憂。臣自當竭力前進。第運籌帷幄。策應糧餉。豈可乏人。必須元老方可。請召瞿式耜。永曆允奏。隨加成棟。子李元胤。爲錦衣衛指揮使。提督禁旅。棟復上疏。速當發詔。通成功。連兵恢復。

召式耜使者三四去。而式耜固辭。且連上五疏乞休。不允。成棟無奈。陞辭回粵。出師。詔至廈門。成功拜接。遂大整軍伍。令芝莞統舟師。從虎頭門進。

永曆三年。清順治六年己丑。春三月。成功留黃廷。洪政守浦之羅山嶺。柯宸樞守盤沱嶺。自統兵馬下詔安。師屯分水關。修書遺楊乾生入潮州。通總兵郝尙久。久乃成棟。健將郝永忠。族姪。前因總兵車任重殺惠潮道李光坦。知府凌犀。渠海陽縣桂岳等。橫苛肆虐。百姓怨望。成棟偵知。密令尙久。聲言援漳。假道潮州。屯兵城南。時值元旦。尙久輕裘緩帶。從者僅數人。入城拜賀。任重接見。尙久禮益恭。尊爲前輩。並陳閩省求救之切。祈爲策應。夫役已便。刻卽起行。任重許之。尙久見任重不爲備。辭出。囑親信於萬所之轉灣抹角。虔禮歛散。其左右藏甲兵於內。整部伍於營。約聽砲嚮。立卽搶門。任重果不疑。出城回拜。中計被擒。並其衆。報成棟。棟會總督佟養甲。題爲潮州總兵。棟反。馳封尙久新泰伯。久遲疑觀望。迨乾生齎書至。尙久拒之。成功大怒。率衆欲攻潮州。值施天福引土著

黃海來見海說成功潮州有備急則難取。不如見畧諸邑。以緩其心。然後反擊。一鼓可得。功從之。分師旁畧。有海澄人陳斌。曾從永曆於粵東。師敗回海澄。與楊廣不睦。廣率衆圍之。斌負其三歲子於背。外掩以甲。腰懸鐵斧。手執大刀。突出殺至城門。門閉不得出。一手持斧砍門。一手執刀禦衆。衆逼之。斌怒。刀起傷人。人無敢近。碎門逸去。其勇如此。率衆來降。成功授斌爲後勁鎮。合擊許龍。時張禮踞達濠霞美二寨。糧甚足。楊廣朱堯唐玉勸功舍龍擊禮。願爲鄉導。功於是徹師攻禮。禮聞大隊至。棄二寨走青林。遣人乞降。功允之。授爲援剿右鎮。又令黃山爲帥。督諸軍從靖海破惠來縣。以汪匯爲知縣。正兵鎮盧爵守之。黃山復破黃山寨。成功回揭陽。會鴻逵。聞逵沉死。張禮心甚憐焉。以其無罪。遭殺。載其妻子歸安平府中養之。

永曆四年。清順治七年。庚寅。正月。成功至潮陽。知縣常望鳳投降。令洪旭督徵糧餉。和平寨不服徵。遣右先鎮楊才往攻。才破其寨。屠戮無遺。才不日亦暴病。

死。成功以林勇代領其衆。陳斌引黃亮來降。三月以施琅爲左先鋒鎮。弟顯貴爲右先鋒鎮。黃廷爲援勦右鎮。王秀奇戎旗鎮。甘輝親丁鎮。四月成功復至揭陽攻新埠寨。寨長乞輸餉許之。五月詔安九甲萬禮從施琅招領衆數千來歸。六月成功引舟師擊蘇利。風逆。反師圍潮州。陳斌燒斷廣濟橋。日夜攻擊。尙久死守。乞救于漳鎮王邦俊。俊亦奉恢復浦詔檄。隨統大隊騎步至長橋。把守羅山嶺。黃廷洪政不戰棄城遁。俊安民畢。偵知守盤陀賊衆拒險扼守不得進。邦俊以騎兵往來誘敵。令副將王之剛從盤龍小路度嶺。又令遊擊張勝由杜潯而過雲霄。合圍攻擊。宸樞分頭迎戰。至砲矢盡。全軍皆沒。邦俊復雲詔。進師黃岡。成功得報。不恨浦詔之失。大傷宸樞之亡。知救援至。遂退潮陽。黃亮乘虛同陳拔五李英等叛。攻行營。甘輝迎擊。斬采父子與拔五等方定。八月芝鵬至潮陽。說成功取廈門爲家。成功曰。彼船隻倍多。部將老練。取之不得。反結爲仇。芝莞曰。建國遠行。惟聯在廈。邇來橫征暴斂。民不聊生。取之正當其時。施琅曰。

征之未見爲是。當設計圖之。功曰：試陳可圖之計。瑗曰：聯乃酒色狂徒，無謀之輩。藩主可領四隻巨艦，揚帆回師，寄泊鼓浪嶼。彼見船少，必無猜疑。其餘者陸續假爲商船，或寄泊島美活嶼，或寄大担白石頭，或從鼓浪嶼轉入崎尾，或直入寄槎廈門港，水仙宮前。藩主登岸拜謁，悉從謙恭，然後相機而動。此呂蒙賺荊州之計也。功曰：此計甚當，但吾欲善取之，庶免殺兄之名。芝莞曰：不殺之，恐其部卒戀主，不如殺之爲是。建成元吉，豈非親兄弟乎？成功點首。選健將五百，令甘輝、施琅、洪政、杜輝四將統之，配船四號，其餘依計而行。成功於中秋夜舟到鼓浪嶼，聯方宴客於萬石巖，作徹夜歡。次早成功登岸拜謁，聯尙宿酒未醒，迨起梳櫛畢，出會。成功曰：師屢敗績，赧顏相見，倘吾兄見憐，以一旅相助，得片土棲身，終不敢忘大德。聯曰：吾弟何出此言？軍旅相助，分所當然，隨留小酌，快談雄劇，終日無倦。成功辭出，見聯不爲備，密令諸船陸續進港，與聯艦比，且約部署聽砲爲號，爭先過船，成功設酒於虎坑巖還禮。聯卽赴席，是日投壺角勝。

酣暢倍常。至戌刻方掌燈回。途次半山塘。杜輝等伏起刺死聯。聯之首級匿之。飛報成功。功於岩頂放砲。卽勒兵入城。佯搥胸頓足曰。誰殺吾兄。仇不共戴。哭甚悲哀。令兵守聯輿。彩宅門云。非吾令不許擅入。出示曉諭。有人報說者賞千金。並卽安民。市井無驚。其諸將船業爲施琅洪政甘輝杜輝等所困。知聯死。陳倖藍衍吳豪等咸歸焉。繼而彩將楊朝棟王勝楊權蔡新等率全隊舟師來降。功以棟爲義武鎮。勝爲水師總統。舊將藍登來見。授爲援勦後鎮。又遣洪政持書折矢。出招鄭彩。當彩欲行時。曾囑聯曰。國姓帆船來往宜備之。聯曰。少年乳臭。虛名而已。何足介意。彩曰。弟言謬矣。切不可。以少年輕之。細觀調兵。甚有經濟。聯掀髯大噓曰。吾兄行兵半世。何作此懦想。兵船糧餉。勝彼十倍。安敢正視。彩曰。饑虎不可爲鄰。吾提師遠出。弟當留心防範。切不可。以爲戲。迨至接聯被殺之報。嘆曰。是吾之咎。托非人也。迨洪政至。彩曰。吾年老氣衰。細觀諸子弟能繼志者大木耳。大木成功字吾願全師解付。令弟斌同政回廈復命。成功大悅。遣官

符接及相見。歡愛如初言及聯事。成功大慟。彩將兵船悉交成功。功見彩誠實。永無猜疑。待之甚厚。卒于廈門。蘇利值知功航船回廈。率衆攻破惠來。守將盧爵戰死。知縣汪匯不屈自刎。成功差洪政招閩安銅山南澳諸島。咸聽約束。功以輔明侯林察爲左軍。閩安侯周瑞爲右軍。定西侯張明振爲前軍。平彝侯周鶴芝爲後軍。自爲中軍元帥。用蔡福爲中司。中軍鎮每軍大小船一百號。凡有原鎮各分隸之。泉州人馮澄世字亨臣。隆武舉人。有機畧。潘庚鍾字道宣。壬午舉人。善謀策。紀舉國壬午舉人同安人。林兪卿。隆武舉人。漳州人。林奇昌。隆武舉人。蔡鳴雷。晉江人。弟子員。諸葛偉字士年。隆武恩貢。蔣德璟薦授翰林。待詔遷光祿寺少卿。薛聯貴字忠達。乙酉舉人。廣東潮州海陽縣人。後降清任江西糧道鄭擎柱。丁卯舉人。後降清鄧會。福州人。後降清授太原知府等爲參軍。整備操演。以侯進取。忽黃文從廣西問道。賚永曆詔至。因何騰蛟攻長沙。命馬進忠由益陽出。爲李赤心所殺。騰蛟不屈死。又南昌破。王得仁伏誅。金聲桓赴水死。守贛將高進庫爲前

導直趨信豐。諸將勸李成棟且退師。棟不允。相持會久。雨多。叛去。棟憤甚。命酒痛飲大醉。水漲甚。左右挽之上馬。馬失足。人馬俱沉。三日水退。棟立泥中。始知其死。杜永和舉全粵降。清廣西危迫。召成功舟師從虎門入。李定國督騎步兵。由三水出合攻。成功謝恩畢。用原總兵黃斌卿將黃大振爲援。勦前鎮守海壇。撥水師阮引何德陸師蓋登等。屬芝鵬鎮守廈門。自率諸鎮。配船百餘號。南下勤王。十一月至潮陽。時施琅與陳斌不睦。因功未進師。有首黃海如通。尙可喜。成功遣林習山襲殺之。宥其餘黨。分配各鎮。一時乃安。

永曆五年。清順治八年辛卯。正月成功舟師回南澳。以蕭拱宸爲中衝鎮。沈親爲護衛右鎮。令洪政施琅陳壘鄭文星等回廈門。二月成功引舟師至白沙湖。遇暴風。收入鹽州港。擢蔡進福爲內司水師鎮。施舉爲水師右鎮。三月至天星所。殺敗惠州援兵。攻其城下之。時福建巡撫張學聖按泉郡。偵知成功往粵東。立咨駐泉中路總兵得功。統兵乘虛襲廈門。得功隨統轄騎兵。先從五通渡過。

水師鎮阮引不戰而遁。芝莞聞報，席捲珍寶，棄城下船。島中鼎沸，成功妻董氏懷神主出，步行海濱。見船仔，招之曰：「我董夫人也。」舵工林禮泊岸，背夫人落船。夫人曰：「那隻舡是莞爺的，禮指以重載者是夫人，令泊其船。」芝莞見夫人忙請曰：「此戰艦也，不便居，請夫人到家眷船中，有人伏伺。」夫人知此船係芝莞積藏，識破機關，乃曰：「媳婦喜乘此船，今戰征時候，非此不可。」莞再三相強，夫人坐而不動，得功領五百餘騎，往來馳騁，百姓奔竄石洞。原閣部曾櫻人勸其出遁，櫻笑曰：「吾今日猶得正命清波，幸也。」遁何處？自縊死。曾櫻字二雲，江西人。丙辰進士，隆武亡，依成功。門人阮文錫、陳泰以僧龕擡下船，至金門王槐西家收殮。張學聖與興泉道黃澍原同安縣，張効齡督大隊至，適潮大漲，遂登五通山一望。波濤萬頃，而島嶼孤懸，海外險地也。顧謂澍曰：「此乃絕地，我若過去，船隻不繼，緩急豈能飛渡？實用兵之忌。」卽下山引師返，得功知後軍已退，不敢坐鎮，走回當港。遇鄭鴻逵將楊杼、素吳渤與戰，得功奮勇射死吳渤，杼素不敢迫，施琅聞

知。率陳璘、鄭文星等，從廈門港登岸，追趕至，得功戰少怯，計窮，遣人駕小船見鴻逵曰：「雖得此間隔，各盡其職，然亦無時不懸念公也。今得功奉令過島，未曾擾一草一木，奈欲退無舟可渡，得功必死于此，得功死分所當然，但恐此島人民萬不能全耳。且公兄在京，眷口在安平，其能安平，不如寬得功片刻，假渡而歸，一舉兩得，得功幸甚，即公亦幸甚。乞熟思之。」鴻逵動昔日之情，亦以爲然。故鬆高崎守假漁船數號，渡得功回泉。鴻逵初除天津撫院，鄭宗周坐營，轉隸都督孫應龍麾下，登萊之役，應龍失機，逮繫天津獄，復與大同巡撫張建拱同事。未幾，與芝龍平紅毛功，勳蔭錦衣衛掌刑千戶。繼晉指揮使，癸未授登州副將。甲申正月，曾應遴薦副將鄭鴻逵，緩急可用，詔益兵三千，命鴻逵鎮守南贛。至弘光嗣位南京，檄守采石磯。以右軍都督掛鎮海將軍印，時得功爲標下守備。當得功渡廈時，都督鄭德副將周王臣坐快哨飛奔，星火報成功，功即率大隊舟師回。於四月初一日到廈門，計得功已去五日矣。成功大憤鴻逵賣情，令一

應鎮將不許赴鴻達衙署。達遂移師出屯金門之白沙。成功親歷各要口。親祭閣部曾櫻。改廈門爲思明州。以鄭擎柱爲思明知州。督民夫築砲臺數處。撥勁旅防守。將董氏所乘芝莞船積藏金銀。搬充軍餉。初十日。成功大會文武。議廈門功罪。賞施銀琅二百兩。陳壩鄭文星銀各一百兩。芝莞以失機論罪。當斬。莞欲辯而成功已冠帶請旨。出隆武所賜尙方劍。斬莞示衆。諸將悚然。頃獻首階下。功令懸之街三日。方許收葬。並有本藩鐵面無情。爾諸勳臣鎮將各宜努力。苟不前進怯敵。本藩自有國法在。雖期服之親。亦難宥之。諭阮引何德各綱責五十。蔭登姑寬其罪立功。吳渤遣知州致祭。厚恤其家。于是衆軍股慄。無敢犯鴻達。在金門見成功舉動威嚴。執法無私。亦將船隻悉付之。擇白沙地方築寨。廣構亭沼。藝植花木。額曰華覺。笙歌自娛。成功見鴻達謝權歸隱。擢萬禮爲前衝鎮。陳朝爲後衝鎮。洪旭守廈門。族兄泰守金門。季叔芝豹同。施天福守安平。張進代李壽守銅山。陳霸守南澳。拒南洋許龍。礪石蘇利。鴻達後患足疾。至丙

申王進功。攻白沙寨。成功。合芝豹往救。進功退。功移鴻遠居金門。又按蘇利粵之饒平東界人。流落海豐。標掠海上。與碣石衛民構釁。爭殺不休。時有閩之同安人蘇秦。民潛出海外。請秦爲援。秦糾黨飛船而入。合民擊利。利降。秦遂入碣石。利依秦爲裨將。所戰必勝。秦喜利同姓。益親信重。秦偶沾疾。利刺秦自代。明末五虎亂潮之一也。後雖降清。心懷不軌。迨奉旨遷移入內地。利不遵。遂反。爲平南王尙可喜。用參將高亮福守備高亮禎。兄弟爲前鋒。一戰而滅。考之碣石衛舊誌。花都司有記曰。衛地二十五步。有強龍入海。必有隗囂公孫述輩。踞此二十秋。計利興滅足二十載。時日無多算。其應驗如此。亮福字倅素。亮禎字履初。海豐赤坡人。倅素當明季之時。潮民苦於縉紳。衆共舉劉公顯爲首。倅素其次也。餘馬茂素。黃文錦。魯瑞。黃義。呂雲璧。傅君禎。曾十千等爲九軍。倅素降清。授參將。許龍潮之海澄人。亦明末五虎亂潮之一。踞南洋橫行無忌。後降清。迨遷移奉旨入京。官內大臣。五月成功。見佈置得宜。將師移于金門之後浦。操演。

陣伍整頓船隻。以俟興師。七月太監劉九臯賈永曆詔航海。至成功跪接宣讀。請安畢。詢帝行在。方知駐蹕潯州。九臯又說去歲曹志建戰敗。新虎關失守。馬進忠又戰敗於瓜里。師退武岡州。桂林大震。督師于元華。滇鎮趙邦選。胡一清。焦璉。在平樂懷私情。按兵不前。以致全州不能守。嚴關亦失。十月寧遠伯王永祚與胡一清俱乏餉。入桂林。榕江一帶咸空壁。留守瞿式耜同張同厥被擒。不屈。又令爲僧。曰爲僧乃薙髮之漸。髮短命長。不爲也。絕粒。十一月十七日被殺。給事中金堡已爲僧。僧名金釋。上書定南王請葬瞿式耜。張同厥。吳江楊夔爲具衣冠葬於北郊之原。帝聞報。自梧州趨潯州。陳邦傳謀劫駕。帝遂冒雨而走。諸臣在後。多被劫掠。至南陵。從行者惟嚴起恆。王化澄。馬吉翔。龐天壽等。並議調孫可望。李定國。命師恢復。因此特差九臯後龍門渡海。來求藩土。督全師從虎門而入。攻粵東以分其勢。成功曰。君父有危。焉敢坐視。卽擇日整舟師行。甫趨過粵之表裏。遇颶風。船各飄散。成功收入潮陽港。篷索損壞。不果行。回札金

門後浦。左先鋒施琅從將曾德犯法當死。脫逃賂匿成功。左右琅偵擒之。功馳令勿殺。琅曰。法者非琅敢私。犯法安能逃。使藩主自徇其法。則國亂矣。促令殺之。但持令者乃德摯友。回而不述。執法前言。徒說爾欲以藩令脅吾。面叱殺之。語成功大怒。次日傳諸將入船。令右先鋒黃廷收琅。並父大宣。弟顯貴。交林習山守於巨艦。習山令副將吳芳看之。是晚有船訪琅者。曰。命不保矣。隨登岸去。琅急謂顯貴曰。危在旦夕。兄弟豈可俱斃。弟年壯。速當計脫。貴曰。兄雄畧勝弟十倍。且我有子。兄尙無嗣。吾與父當之。兄急行。勿多語。恐有漏洩。琅起伴喜。語吳芳曰。吾以藩主欲殺我。誰知欲令我備鎧甲。此易事也。取酒與芳歡飲畢。懇芳曰。伴我登岸往見當事。芳見琅舉動雀躍。又以父與弟在船。遂信焉。令人隨之登岸。琅曰。大路恐遇人不便。由小徑行。芳之隨者是之。至草仔埕。郎出鐵錐。錐死芳之伴者三人。走匿會厝垵石洞中。是晚成功聞報大怒。網林習山欲殺。拘吳芳妻子。令芳偵尋贖罪。二十一日出令。收大宣顯貴斬之。嚴禁船隻。

曉諭搜索。瑯匿數日。飢餓難當。乘昏奔其部屬左營蘇茂署。時茂頂瑯左先鋒。鎮缺。茂方晚食。瑯見激之曰。聞藩主千金高爵購我。細思賢弟與我最厚。特來相尋。免被他人邀功。茂曰。茂雖不肖。豈肯賣鎮主以求榮乎。且公投生。非投死也。茂雖死亦不肯爲。公幸勿疑。勅守門者秘勿揚。隨飲瑯。次夜令心腹備小船載瑯去安平。投施天福。依芝豹求爲排解。俄而成功。知往召瑯已逸內地。成功得回報。憤其叔父市恩放瑯。五月成功擢戎旗中協林勝爲援。勦右鎮。整大隊。領中提督甘輝。左先鋒鎮蘇茂。中衝鎮藍登。宣毅左鎮杜輝。援勦後鎮陳魁。左衝鎮郭義。右衝鎮藥祿。後衝鎮林明。前衝鎮統領余新。奇兵鎮楊祖。智武鎮藍衍等。從南溪登岸。漳州總兵王邦俊。率騎兵一千。步兵二千。列陣於磁竈。以待杜輝。藍登奮勇奪先。率衆藤牌盾抵箭迎敵。騎兵不能勝。矢將盡。少怯。余新楊祖出左。蔡祿陳魁出右。合擊。邦俊勢孤遂潰。入城堅閉不出。六月成功回廈。舊將黃興投見。授中權鎮。平和人黃梧來歸。卽授副將。以監督陳六御爲北

鎮管騎兵。九月成功復率衆入攻漳浦。王邦俊來援。被甘輝所敗。追至馬口。始收軍。提督楊名高接王邦俊國姓猖獗報。統興泉各鎮營進剿。成功偵知。令藍衍杜輝爲先鋒。以蘇茂郭義私過小盈嶺之左埋伏。楊祖蔡祿銜枚伏于小盈嶺之右。聽號砲三聲。各抄出夾攻。使彼首尾受敵。又令甘輝余新爲監陣接應。陳魁黃梧爲救援。自領林明劉功林勝等登山頂觀戰。名高知成功兵屯小盈嶺。卽以騎兵五百爲先鋒。分步兵三千爲二隊以應之。又以騎兵六百作二隊。爲左右救援。自領騎步三千迎戰。時冬十一月。天氣嚴寒。名高謂諸將曰。海賊赤脚。可乘今日凍慄擊之。遂進。遇於嶺下。兩相交鋒。勝負未分。成功令林明發砲。明連發三砲。而楊祖冲出。高分兵接禦。蘇茂郭義從後抄殺。高隊大亂。死者甚多。名高退回泉州。十二月成功乘勝旁畧諸縣。漳浦守將楊世德陳堯策字邦纘。係功之舊將。獻城投降。授世德英兵鎮。堯策護衛前鎮。林其昌爲漳浦知縣。成功見士卒繁多。地方窄狹。器械未備。糧餉不足爲憂。遂與參軍等潘庚鍾。

馮澄世蔡鳴雷林兪卿共會議。澄世曰。方今糧餉充足。鉛銅廣多。莫如日本。故日本每垂涎中國。前者翁太夫人國王既認爲女。則其意厚。與之通好。彼必從。藩主何不修書。竟以甥禮自待。國王必大喜。且借彼地。彼糧以濟。吾用然後下。販呂宋暹羅交趾等國。源源不絕。則糧餉足而進取易矣。成功是之。令兄泰造大艦。洪旭佐之。以甥禮遣使通好日本。國王果大悅。相助鉛銅。令官協理鑄銅。煩水曆錢盛甲器械等物。以原縣戶椽黃愷號龍劍。有口辯材能。用爲徵餉官。以督徵泉漳福興沿海地方。以資軍餉。英義阮駿自舟山來歸。令原船聽用。海澄守將郝文興遣人密款於成功。功允之。授興前衝鎮。

永曆六年。清順治九年。壬辰。春正月初二日。成功乘潮大漲。航船直抵中權關。郝文興迎成功入城安民。以黃維瓌知海澄縣事。有同安浯州人周全斌投謁。功問恢復進兵策。斌對曰。若以大勢論之。藩主志在勤王。必當先通廣西。遠行在會孫可望李定國師。連舟粵東。出江西從洞庭。直取江南。是爲上策。奈李成

棟已沒。廣州新破。是粵西之路未得卽通。徒自勞也。今且固守各島。上踞舟山。以分北來之勢。下守南澳。以遏南邊之侵。興販洋道。以足糧餉。然後舉兵取漳。泉以爲基業。陸由汀郡而進。水從福興而入。則八閩可得矣。功大悅。曰。此誠妙論。授全斌房宿鎮。初十日。功遣各鎮從江東入攻長泰。王邦俊率兵援之。相遇於溪西。俊失利。二十三日。俊復來援。敗回。二月初三日。功督令攻城。進兵鎮吳世珍奮勇先登。被砲打死。城不得下。成功密遣火器鎮何明鑿地道擊之。甫聞鑿。報總督陳錦提兵至。三月初七日。功移營江東。初十日。錦師札牛蹄山。相去僅五里。錦欲進兵。提標右營遊擊張玉諫曰。國姓少年英勇。詭計甚多。現札江東。未可陡進。且踞守于此。遣人密通漳鎮。另調一旅由長泰小路出。從中沖出。使彼首尾不顧。錦喝曰。皆是爾這班怕死的。虛糜君祿。養成禍胎。這樣螫賊。何足掛齒。本部院前在小盈嶺一鼓破之。本該割爾頭以儆慢戰之罪。姑念人暫且記罪。如若再犯。決難輕恕。錦實狙于同安之勝。不以成功爲意。十三日。率

諸軍冲營逼戰。功令蘇茂林勝迎敵。杜輝吳豪旁出合擊。錦軍大亂。退割于同安之鳳尾山。羞慙憤怒。偶食不如意。大鞭撻其奴庫成棟。棟恨。夜携匕首刺錦。割其首級。潛奔獻成功。功佯喜。厚賞之。次日會文武令收棟。棟稱無罪。功曰。爾殺主求榮。天下之大罪人也。本藩決不用此不義罪人。令斬首示衆。長泰守將李青聞錦失利被刺。十八夜棄城遁。功入城安民。以馮澄世爲知縣。擢黃廷爲前提督。黃山爲後提督。四月成功督大隊出圍漳州。割南院。凡各縣錢糧徵解軍前。陳錦當被庫成棟刺死。將首級盜去。次早方覺。追之不及。衆軍無主。各星散回汛。撫提會題。又得漳州緊報。隨馳調浙鎮馬逢知率兵援漳。成功會諸將集議。甘輝曰。逢知至。輝願領兵禦之。功曰。不然。凡行兵之道。豈可全恃勇力。當明彼此之情。今陳錦新喪。提調無人。撫提以素驍勇之逢知。著其前來。必以一當百。勿戰。縱之入城。然後圍之。城內多添人馬。必多糧食。外調既遲。內勢窘促。破之必矣。諸將拜服。即馳令自萬松關以及龍江一帶悉撤避。援兵至勿阻他。

但揚威而已。縱之入城。逢知果恃勇猛。率精銳馬騎一千步卒三千。飛馳至漳。灌口深青地方。無人敢敵。悉避之。待欲安營。忽四面搖旗吶喊。似逼戰狀。終夜如是。兵馬不敢卸甲。後路漫山徧野。連營屯割。惟有往漳一路無阻。甘輝前來邀戰。逢知因一夜不寧。人馬咸倦。不敢戀戰。且敵且退。走入漳城。成功襲其後。仍將城圍困。馬逢知退入。養精銳數日。領所帶精騎開東門直冲成功營壘。功令陳勝陳斌蘇茂蕭泗四將迎戰。自領甘輝周全斌陳堯策郝文興等。四面雲梯臨城。逢知無心戀戰。棄陣回城。邦俊出兵接應。死傷甚多。而外援遂絕。勢益危蹙。成功百計攻擊。晝夜不絕。逢知邦俊悉力堵禦。功不能克。巡撫宜永貴先接塘報。屢稱馬逢知所向無敵。統兵入漳。以爲圍解。迨後羽檄踵至。知成功用賺兵計。賺逢知入城。連逢知俱圍在內。攻打甚急。永貴遂集船二百餘號。倣擊魏救韓法。出攻廈門。功令甘輝爲帥。督水師禦之。相遇于崇武。輝大勝報捷。成功急攻城。逢知虞內變。將所帶之兵雜守陴堵。隨壞隨築。功屢犯損傷甚多。而

計亦拙。八月時值秋淋。張名振獻計曰。離城三十里有鎮門者。兩山夾岸。可將木石塞滿。激水灌城。功曰。此計誠妙。令甘輝周全斌陳堯策陳斌等督鎮諸監攻四門。自領張名振黃廷黃山蕭泗等至鎮門。令兵士將大木於象鼻列柵過獅頭。用壞船裝石。沈水堆塞。奈溪流湍洑。終不能蓄水。塞此崩彼。徒費衆力。百姓遭苦。但城內人民繁衆。蓄積無備。客主之兵既多。倉廩之儲告匱。遂奪民食。至不舉烟。徐而各戶絕粒。金珠寶玩。賤如瓦礫。皮紙樹皮。尋取殆盡。弱肉強食。死亡塞戶。獨有一家。見城被圍。不能脫出。虞有奪食。將所剩米春粉。做成塊。晒乾。疊起。外抹以泥。俟更深人靜。邏卒巡更過後。弘敲一塊。煮爛。如糊食之。得保全焉。又有公姑。餓甚。欲殺其媳食。媳知。逃歸母家。其父母問以歸之故。女述公姑意。父母曰。吾生汝。且不得食。反與彼食。隨殺其女食之。九月固山金礪奉命入閩。會新任總督劉清泰。統滿漢兵馳救漳圍。礪屯同安。與諸將議曰。國姓行兵有法。若以大隊齊進。恐墜術中。當分一旅。由小路出。長泰將步卒爲先鋒。從

中。殺。出。吾。統。騎。兵。從。大。路。攻。擊。彼。師。已。老。能。畧。挫。其。銳。氣。則。勢。如。破。竹。矣。此。圍。可。解。諸。將。服。其。論。依。計。而。行。成。功。知。金。礪。領。兵。至。攻。愈。急。令。周。全。斌。爲。帥。督。蘇。茂。吳。豪。黃。梧。楊。祥。等。鎮。前。去。禦。敵。相。遇。于。龍。江。之。東。吳。豪。黃。梧。首。先。冲。陣。砍。殺。全。斌。率。諸。鎮。應。之。忽。左。右。騎。兵。出。箭。如。雨。下。全。斌。分。兵。而。禦。正。酣。戰。間。流。星。馬。飛。報。有。兵。暗。渡。長。泰。小。路。抄。出。江。東。矣。斌。驚。爲。截。急。鳴。金。收。軍。礪。飛。捲。而。追。斌。退。陣。亂。橋。關。悉。爲。礪。奪。成。功。知。全。斌。敗。卽。令。甘。輝。陳。堯。策。楊。祖。蕭。泗。等。守。關。踞。橋。甫。至。瑞。香。亭。接。全。斌。軍。云。關。已。失。輝。不。敢。前。急。報。成。功。功。傳。令。撤。圍。輝。殿。後。屯。古。縣。金。礪。入。城。見。殘。黎。餓。殍。令。守。道。周。亮。工。發。府。縣。倉。米。煮。粥。賑。濟。但。餓。死。者。十。有。其。三。而。就。賑。者。下。咽。立。斃。又。十。有。其。七。枕。藉。街。衢。橫。列。閭。巷。發。收。骸。骨。計。有。七。十。三。萬。餘。衆。瘞。三。大。穴。一。碑。同。歸。所。一。碑。萬。安。所。一。碑。萬。公。所。其。收。不。盡。落。溝。陷。葬。及。自。埋。者。不。可。勝。計。金。礪。休。息。數。日。與。馬。逢。知。周。邦。俊。議。曰。郡。圍。雖。解。而。國。姓。現。在。古。縣。尙。有。顛。顛。之。心。倘。再。率。衆。由。三。叉。河。截。踞。江。東。橋。一。隊。

從赤嶺港登岸。豈不復如前轍乎。當急除之。以復海澄。公宿將。與士卒同甘苦。仍守城池。俟吾統一。旅破之。逢知曰。公妙算宜速行。莫使餘灰復燃。十月初三日。金礪督騎兵作三隊而進。成功令提督黃山領右先鋒。鎮廖敬護衛右鎮。洪承寵。禮武鎮陳俸。親丁鎮郭廷等。率火攻迎之。是早西北風。凡火箭噴筒鳥鎗營炮。其烟被風回反陣中。軍士一時眼迷。礪乘勢冲殺。諸軍皆沒。非輝與廷力禦。幾無遺類。成功退屯海澄。仍以郝文興王秀奇二將守之。成功出廈門。金礪回漳郡報捷。

永曆七年。清順治十年癸巳。三月成功遣張名振率水師船二百餘號北上。陳輝等爲援。四月金礪奉部文取海澄。劉清泰調水師出福興二港合攻。成功令林察周瑞周鶴芝阮駿黃大振等。前往海壇迎敵。察船泊湄州。遇颶風飄入興化港被擒。二十八日。金礪全師出剗祖山頭。郝文興飛報成功。功率大隊于五月初一日至海澄。令王秀奇郝文興陳堯策守鎮遠寨。又萬禮踞鎮遠寨。對峙。

爲援。甘輝黃廷守關。帝廟木柵。連接相應。就天姬宮起將臺。親登觀兵督戰。初三日。金礪率騎步數萬連營。與天姬宮相對。安火炮數百門。日夜攻擊不絕。木柵倒壞。士卒損傷。後勁鎮陳魁。後衝鎮葉章。請成功。令領兵冲營。功許之。初五日。辰刻。魁等乘炮烟冲出。被金礪伏騎齊起。葉章奮勇冲擊。戰死。陳魁箭傷全軍受困。甘輝黃廷望見。急開柵突圍救回。功令魁出載廈門醫治。以楊正暫統其軍。擢周全斌爲後勁鎮。初八日。金礪督衆攻營壘。砲聲振天。城垣隨壞。隨築成功。坐將臺。張蓋指揮。礪望見。令砲對臺齊攻。諸將見砲如雨點。勸功下臺。功曰。砲避吾。吾豈避砲。又勸功去蓋。功亦不允。甘輝情急。親翌功下。甫離臺數層。而座已被砲碎矣。礪欲攻城。悉爲鎮遠寨所援。議不擊鎮遠。其城終難攻。隨往取鎮遠。王秀奇等死拒之。短牆皆陷如平地。士卒無可容身。奇令掘地窩藏之。功乘夜遣火器鎮何明。率洪善等。將河溝邊。盡掘地道埋火藥。留藥心于外。以待礪將老弱民夫爲勢攻擊。別選精勇二隊飽食。乘五鼓聽營中號砲三聲齊

攻填濠緣城板柵成功。令按兵守禦。忽礪營連發三砲。郝文興請曰：是欲臨城。功不信。王秀奇曰：果是號約。宜防備之。甫傳令。而喊聲轟雷。雲集風擁。填平溝壕。齊倚登城。文興秀奇堯策全斌等勒兵。執斧木棍火桶火箭交擊。凡爭先登者。悉死城下。柵邊礪督後者再登。時東方將白。功令放地道。一聲霹靂。燒死無數。礪方退。又遇蘇茂甘輝等截殺。礪弗敢停鞭。領師回漳郡。自是海澄功守益固。十五日成功回廈門。大賞有功將士。以甘輝爲第一。六月甘督池士紳奉成。功令以蠟丸資帛疏。由陸路詣廣西行在。報殺陳錦敗楊名高捷。回同兵部侍。郎萬年芳。資永曆詔至。晉封成功漳國公。功受封畢。仍遣士紳與年芳從海道。進謝表。並會諸師恢復。功令馮澄世督收海澄城砲臺濠溝。以便出師。七月固山金礪回京。成功率率船犯海澄。用土人楊廣爲鄉導。攻烏丁埧。寨主陳鐵虎者。善用兵。寨又堅固。功督諸將用力填壕。爲飛彈傷足。遂退師出港口。見海水紅。毛閃爍。有大燭二門浮起。功急令撈之。名之曰龍燭。以副將楊廷統五百人翌。

衛。八月功屯揭陽。洪旭遣員報其父芝龍。差李德來報。封海澄公。勸其歸降。成功回廈。九月潮州總兵郝尙久。差心腹將楊清。時至廈門請救。成功惡其前至潮州。通伊叔南安侯郝永忠。欲令其會師。接李成棟。而尙久不從。致失機會。今一旦無故而殺道府。計窮請救。意欲不援。周全斌請曰。倡義原當納降。雖尙久有前日之拒。今已悔過來歸。若不往救。恐失天下勤王之心。功令陳六御爲帥。統楊祥。江龍。黃梧。蕭泗。吳豪等鎮。先入揭陽港。自督大隊繼進。但郝尙久自恃殺車任重有功。鎮潮而肆行無忌。百姓苦之。惠潮道沈時。潮州知府薛信辰。見其凌剝妄爲。每事與抗。久心憤甚。迨報劉伯祿代之。尙久集諸將議曰。本鎮屢建奇功。而守此城。前者國姓來通。本鎮若稍易念。則全閩去矣。今日太平。文官欺侮我等。況本鎮世受國恩。永曆現在廣西。舉義以應。豈不垂名萬世。諸將唯唯。毋敢逆者。于三月十五日。捉沈時。執薛信辰。剪辮。會黃錦。鄒鋈。梁猶龍等。奉永曆朔。稱新泰伯。踞潮屬各縣。惟吳大奇。許龍。各治兵不附之。陳錦。字綱。菴。王。

辰進士。南京禮部尙書。鑿辛未進士。官拜襄陽知府。猶龍字臨海。戊辰進士。福建參謀。俱潮州府人。奉旨以平南王尙可喜。靖南王耿繼茂。總兵劉伯祿。郭虎。班志等合勦。尙久偵知。虔城中有變。大興土木之工。於北之金山城頂。再築一寨。高聳堅固。中挖兩井。深百尺。源通韓溪。可飲。萬人不竭。又起蓋倉庫。堆積糧餉。薪炭食物諸類。以作永遠計。平南王尙可喜。靖南王耿繼茂。調高雷廉韶。以及南雄肇慶等營。暨饒平總兵吳大奇。碣石總兵蘇利。南洋總兵許龍。合圍潮州。尙久見圍緊。援絕。惑信巫術。而巫者每降神語。自當祐庇。會天雨暴漲。尙久虔灌城。請于巫。巫者降神。當用大鐵鎖數百觔。鎖蛟龍則安。尙久立令製造鐵索。巫曰。神退。諸巫讓之曰。何事不可言。而言此險語。汝當自理。鐵索成。尙久鳴鑼擊鼓。與諸巫送前巫者。沈之江。頃而起。尙久見令人救之。僥倖不死。愈深信惑。遂疏提防。親信領旗王安邦。見尙久昏迷邪術。不親軍旅。忖其必敗。密遣人投降。約書悉投南門外。關帝君袍袖裡。各以瞭哨往來相通。十一日。可喜督兵

攻城。夜二更從西南角雲梯上城。城中大亂。尙久知城破。急抽兵入寨。而大隊突至。門弗及閉。情急跳井。其子堯亦隨之下。潮州平。陳六御舟師甫至南澳。聞潮已破。不敢進援而還。十月原浙江監國魯王逃舟山。閣部熊汝霖與建國公鄭彩輔之。迨汝霖死。彩解權。周瑞等悉歸成功。兵微船少。而浙江舟師又出。張定國糾衆與禦。大敗。吏部尙書張肯堂。巡按朱天祐死之。魯王不敢守。與瀘溪寧靖王及益王孫等。航船至廈。遣黃門通知成功。集馮澄世潘庚鍾林俞卿鄭擎柱薛聯桂鄧會諸參軍議。接魯王禮。庚鍾曰。魯王雖曾監國浙右。而藩主現奉正朔。均臣也。未可以監國言。成功曰。此是朝綱。且論今日相見之禮。庚鍾曰。相見不過賓主。成功曰。不然。若以爵位論之。魯王尊也。况經監國。若用賓主禮。是輕之。輕之是綱紀混矣。吾當以宗人府府正之禮見之。則全祖訓。於禮兩全。諸參軍拜服其論。成功豎宗人府府正旗。請魯王相見。各慰安叙情。出。隨給屋請住。月送俸薪。又有鄉紳王忠孝字愧兩。泉之惠安人。戊辰進士。初除戶部主

事。至弘光授紹興知府。擢副都御史。隆武陞兵部侍郎總督軍務。賜尚方劍。便
宜行事。後依成功。至下未歲卒于臺灣。張正聲。戊戌進士。泉之同安人。官兵部
職方清吏司。郭貞一。庚辰進士。泉之同安人。官都察院右副都御史。謝元汴。字
途野。癸未進士。粵之潮州揭陽縣人。永曆授爲兵部給事中。尋削髮爲僧。辜朝
薦。字在公。粵之潮州揭陽縣人。戊辰進士。崇禎朝官兵科給事中。後依成功。至
甲辰年卒于臺灣。許璟。字得瓊。戊辰進士。興化府人。官潮廣參議。依成功。卒于
廈門。唐顯悅。興化仙遊人。壬辰進士。官尙書。以長女孫妻功。長子經。後依成功。
卒于廈門。張煌言。字旂著。浙江鄞縣人。壬辰進士。李茂春。字正清。漳州龍溪縣
人。隆武舉人。後依成功。卒于臺灣。蔡國光。字觀之。同安人。甲辰進士。林蘭友。仙
遊人。辛未進士。官副都御史。許吉瓊。泉州人。癸未進士。萬年。英薦漳浦縣生員。
劉玉龍。有才學。經濟。成功用之。其安插供給。與諸宗室禮同。悉以前輩重之。軍
國事輒咨問焉。成功遣李德回京。惟囑復以不聽吾言。致有今日。然既誤之於

前。本藩豈有明知故蹈。再誤于後乎。德不敢復稟。遂行。功令甘煇督率諸鎮。下粵之揭陽。以措兵餉。以足兵食。

永曆八年。清順治十一年。甲午。正月。成功因李德述其父芝龍所囑。如未投誠。先獻監國魯王之故。乃令楊致護送魯王從海道詣廣西。謁見以避之。王躊躇不欲行。功強之再四。王始揚帆。至表遇風。回居南澳。二月。芝龍復遣李德同。鄭賈二使。賫海澄公印。勅來閩。招撫。總督劉清泰亦致書成功。其畧云。幸一時曠蕩之恩。出自宸聰。懷柔之畧。眞千載一時矣。今天意所在。不待智者而決。川湖之捷屢奏。兩粵之叛盡歸。近而舟山遺跡。遠而全姜覆車。徒有荆棘在。足下以孑然一旅。孤懸海外。縱使樓櫓是憑。亦無分茅割地之實際。將謂踞島而守。終屬依山傍海之遊魂。今固山開鎮于漳濱。江南勁旅。北地滿兵。絡繹奔赴。餘波一日不靖。全師一日不班。無論揚帆擊楫。可以滅跡犁庭。卽安坐以折窺岸之謀。密布以塞通津之徑。想足下此中之生聚教養。萬不得以暫待久。以勞待逸。

以不足得有餘。不幾汪洋而成竭澤。遠樹而致焚林。此非不佞震喝之言。而確乎理勢之談也。若肯乘此毅然來歸。翻然號泣。召族黨部曲而諭之。各鼓化其心。以了立命安身之局。既不棄令親。萬里銜書之苦。亦以慰尊公數年欲斷之腸。上而朝廷之德意。下而不佞之苦心。可謂不相負矣。然更有爲足下思者。將懼投誠而孤注。何妨擁衛其子弟以歸。倘懷赴闕爲畏途。何妨請命於桑土而守。以不佞半生忠樸。見諒於聖明。皆能一一代足下剖心呼籲者。從此樹奇勳。以酬遇。拜爵祿而分藩矣。成功至安平。欸二使。以未有地方安插兵將爲辭。復了二使。並不受勅印。鄭賈回京。功乘招撫按兵。就福興泉漳四府。徵追糧餉。備辦船料等項。三月定西侯張名振。忠靖伯陳輝帥舟師。突入長江。奪船百餘號。犯天津。焚糧艘。次金山寺。設祭崇禎而回。四月有謗黃大振欲獻海壇投誠者。功信之。領甘輝黃廷陳堯策周全斌等鎮。聲言巡視。假道海壇。大振前接。功執之歸。賜鳩飲不死。絞殺之。以泉人戴捷爲援勦前鎮。統其衆。五月督餉官黃愷。

才能滑稽。任意科尅。沿海受其凌剝。百姓急迫。相率匍控成功。功撫慰之。立收
豐。殺以示衆。衆乃安。六月清封鄭芝龍同安侯。鄭鴻逵奉化伯。鄭芝豹左都督。
遣內院學士葉成格。理事官阿山。同芝龍第四子名渡。賚四府。安插兵將。勅命
入閩。八月總督劉清泰。再修書賚到云。賚到勅印。不佞既慶其事之確遵。令尊
於君臣之間。父子之際。實費大力苦心。但勅印久爲虛懸。其事勢既已垂成。何
必稍存芥蒂。且勅中歸順人數。具奏安插地方。會同督撫詳細報聞。何不斟酌
次第商及乎。今一拜一詔。不但足下可以特疏。不佞亦當補牘。倘必緩成命以
俟議。待家書而入告。在足下多一番形跡。在尊翁多一番躊躇。此不佞半夜代
籌。至愚至篤之論。想英雄豁達之見。亦不以爲其意之迂且賤也。不佞濡筆以
俟裁決。萬勿游移耳。所言取餉事。不佞亦效一得焉。今日聯異姓于同舟。化國
家于骨肉。則地方者。各有關係之地方也。人民者。各有聯屬之人民也。留得一
人。他日多一豢養。留一土地。他自多一生聚。況足下于桑梓姻友之間。更須調

護者。又無煩不佞之諄懇矣。不佞以侍從之舊人。偶蒞封疆。去就裕如。但得始終此事。自不貪以爲己功。祇可告無罪于尊翁握手時。則厚幸矣。餘何計哉。差官楊茂同李德周繼武來廈見成功。功詢其父平安。畢隨問此來情由。繼武曰。葉阿賚四府安插部文。太師差武等求藩主早歸順一日。則太師早受一日安福。成功點首而已。卽差呂太同周繼武李德入泉州。請葉阿二大人面議。九月初七日。渡舍到廈門。功出接見。抱痛分離之苦。致意降清之切。次早遣渡舍先往安平侯二大人。隨調甘輝王秀奇陳堯策萬禮藍衍蘇茂黃梧周全斌楊文燦吳豪蕭泗林明楊祥黃山黃廷蕭拱宸黃昭藍登黃大御鄭文蔡祿郭義等鎮。並水師諸將。咸往安平。列營數十里。旗幟飛揚。盔甲鮮明。密佈整黎鹿角。設伏據隘。好似鐵桶。成功同諸參軍然後進發。十七日。葉成格阿山到安平住報恩寺。其隨從精騎數千。步旅萬餘。漫山遍野。剗營瞭哨四出。各相提防。成功請先開詔書酌議。方肯薙髮。成格與山欲成功先薙髮然後接詔。互爭數日未定。

二十二日。功以葉阿無定見。再約二十五日。面會確商。二十四日清晨。兵馬悉撤。二大人不辭成功而回泉。功接報笑曰。忽焉而來。忽焉而去。舉動乖張。但因一人在北。不得不暫作癡呆耳。卽差林侯同渡舍尾。後抵泉。請二大人示下。並送厚禮。成格堅欲先薙髮。方許接詔。未薙髮非臣也。焉肯輕出詔書。功又差史讜入泉。再請二大人問其詔書未開。未知是何意見。且未知詔書中是何說話。薙髮之事。髮落豈能再長乎。成格立逐史讜出城。令撥什庫看守鄭渡。隨卽取討夫馬上京。讜回詳陳。成功與諸參軍議曰。觀葉阿二使。便知清朝無真心待我。蓋欲傲前日勒太師故態。賺吾接旨。乘其不意而擒。後見本藩佈置周密。甲兵雄壯。無計可施。忽然歸去。豈真有勅書哉。其奉差黃六表。聞葉阿二大人已回京。卽辭成功。功亦不留。表乞回書。功不允。六表跪懇再三曰。太師朝夕南望。豈有表等回都。竟無隻字可乎。功意稍解。信筆報其父曰。兒戊子年。差王裕入京。問候父親福履。以致父親被圍。王裕被擒。從此而後。隻字不敢相通。恐有貽

累也。至壬辰年杪，忽周繼武等賫父親之信。兒且駭且疑。既而李葉師等賫書繼至。兒疑信參半。乃差李德入京。實前傳聞父親已無其人。試往覘之。果有否。修稟聊述素志。和議非本心也。不然。豈有甘受招撫。而詞意如彼。豈有欲盡忠。而又能盡孝。此不待明言而可知矣。不意海澄公之命突至。兒不得已按兵以示信。繼而四府之命又至。兒又不得已接詔以示信。至於請益地方。原爲安插數十萬兵將。固圖善後。至計何以曰詞語多乖。徵求無厭。又不意地方無加增。而四府竟爲畫餅。欲傲前賺吾父故智。不出兒平日所料。遽然薙髮。三軍爲之衝冠。嗟嗟。自古英雄豪傑。以德服其心。利不得而動之。害不得而怵之。清朝之予地方。將以利餌乎。兒之請地方。將以利動乎。在清朝羅人才以鞏封疆。當不吝土地。在兒安民。將以綏民生。將必藉土地。今以薙髮爲詞。天下間豈有未稱臣。而輕削髮者乎。天下間豈有彼不以實許。而此以實應者乎。天下間豈有未相信以心。而輕削以髮者乎。天下間豈有事體未明。而可胡塗者乎。大丈夫作

事。磊磊落落。豪無曖昧。若能信兒言。則於吾父爲孝。若不能信兒言。則于吾君爲忠。人生在世。不過此忠孝二字而已。此八月十九日。李德周繼武等自京回。至中左。詔使抵省。渡弟同李德周繼武等與葉阿相議。欲照前鄭賈例。俟兒差人去請。然後下來。正欲差官往省敦請。報詔使已於念四日到泉矣。值其到泉的確九月初四日辰時。卽差李德同呂太往泉送禮。渡弟初七日來見。十一日卽回。兒囑其致意葉阿。約期相面。而葉阿於十七日。隨到安平。盛設供帳於報恩寺。乃葉阿不敢信宿。哨馬四出。布帳山坡。舉動十分疑忌。勅書委之草莽。成何事體。且奉勅堂堂正正而來。安用生疑。彼既生疑。兒安能無疑乎。兒再差林候送禮。回稱葉阿二大人。念五日的的相見。繼而周繼武來報葉阿二位決欲先薙髮。然後接詔。其詔亦安在安平署中。且薙髮萬分大事。非容易苟且。須與葉阿二位面議十分妥當。奉旨命下然後可。兒猶恐周繼武傳述失實。各書一稿爲據。再差史謙同渡弟進城。再請葉阿來安平面議。念九日葉阿逐史謙等

回。又接周繼武李德來稟云。武等念九早見二位大人。被他批留。仍差撥什庫催迫起身。不容刻緩。於午刻二大人先出東門。立喚德等齊行。德等稱說夫役未便。限三十早起身。三十日酉時李春吳文榜等來報。葉阿二位大人。於九月念九午回省去矣。蓋葉阿身爲大臣。奉勅入闕。不惟傳宣德意。亦得以奠安兆民。今百姓如此困苦。將士如此蕃多。在泉月餘日。目睹脫巾情形。未曾與兒商確。徒以薙髮二字相逼挾。兒一薙髮。卽令諸將薙髮乎。卽令數十萬兵皆薙髮乎。一旦突然盡落其形。能保其不激變乎。葉阿二位不爲始終之圖。代國家虛心相商。而徒躁氣相加。卽李德亦兒差也。不令之來。而挾之去。使臣如此行動。能令人無危乎。能令人無懼乎。況兒名聞四海。若使苟且作事。亦貽笑於天下後世矣。且吾父往見貝勒之時。已入彀中。其得全至今者。大幸也。萬一父一不幸。天也。命也。兒只有縞素復仇。以結忠孝之局耳。又據都督府行文各府。備辦馬料策大兵。李德周繼武來稟。孟兵部領兵已到仙霞。此卽是前日之部院。金

固山一攻一利。葉阿此番佈置。一刺一挾。前後同一轍也。兒此時惟有抹厲以待。他何言哉。兒本不敢具稟。緣黃六表痛哭流涕。必欲得兒一字回覆。姑詳悉顛末。統惟尊慈垂照。書畢。又與其弟渡書曰。兄弟隔別數載。聚首幾日。忽然被挾而去。天耶命耶。弟之多方規諫。繼以痛哭。可謂無所不至矣。而兄之忠貞自待。不特利害不足以動心。卽斧鉞相加。亦不能少移吾志也。何則。決之已早。而籌之已熟矣。今兄之心緒。盡在父親稟中。弟閱之可以了然矣。夫鳳凰翱翔于似之上。悠悠于宇宙之間。任其縱橫所之者。超超然脫乎世俗之外也。兄名聞四海。用兵老矣。豈有舍鳳凰而就虎豹者哉。惟吾弟善事父母。厥盡孝道。從此之後。勿以兄爲念。書畢。交黃六表啟行。功遂添設砲臺。大整舟師。以備征戰。遣林密督王秀蘇茂等五鎮。配戰艦五十號。護送監督林雲璿。賚勤王本。從海道詣廣西行在。並書會李定國合師。十月漳州總兵張世耀營中有樓。總劉國軒說其左營遊擊林世用歸海。用許之。軒至廈門。先見參軍馮澄世。世喜軒材貌。

雄偉遂留與談時事。大有經濟。世甚器重之。軒感世之知己。拜世爲義父。世引軒見成功功大悅。令軒秘之。速歸。看東門浦頭。若有連珠火箭起。便是兵到。卽當應之。回報世。川復說合魏。其志楊標合謀。國軒汀州府人。面帶棗色。雄偉絕人。胸藏經畧。不得于世。而知于漳鎮左營遊擊林世用。用委爲漳州城門樓總。樓總者。崑司城門也。後軒降清。授爲天津衛總兵。十一月初一日。成功令洪旭。甘輝。林勝。陳堯策。陳斌。戴捷等。坐快哨入海澄。連夜至浦頭。放號箭。國軒應之。世耀倉卒乃降。功得捷報。於初四日親到漳州。以劉國軒爲護衛。後鎮。魏其志。爲火武鎮。林世用爲木武鎮。張世耀爲監督。禮待知府房星輝。龍溪縣知縣周瓊。縣丞李馥等。各原職辦事。時同知通判缺空。後諸縣悉附成功。功以南靖知縣李奇爲同知。漳浦縣范進爲通判。成功既得漳州。遣甘輝。周全斌。陳堯策。鄒文興。諸鎮。分道統衆。旁攻屬邑。諸邑驚惶。咸歸附焉。而泉屬諸邑亦望風投降。獨泉州城守韓尙亮與施琅結爲刎頸交。卽教其開壕築臺。擁兵堅守。成功令

人說之不下。郝文興請爲先鋒領兵攻擊。成功戒之曰。善戰不如善守。彼恃其城堅固。若使四方悉歸。諒彼亦在囊中物耳。姑置之。毋損士卒。令甘輝統諸鎮取仙遊。輝至。仙遊縣陳有虞與城守率兵民拒之。輝令架雲梯四面交攻。城上周砲石火罐打下。一時不能克。反傷士卒甚多。輝大愠。快有神器鎮洪善獻計曰。此城乃葫蘆穴也。可用滾地龍破之。不可以精壯之兵驅之攻城。徒損士卒。輝大喜。卽揖問洪善求計。善曰。乘此年杪。元旦在卽。且緩其攻。而懈彼心。可令各鎮挑壕築塹。隄防周密。作久困計。此城東門外有三官堂一座。甚大。可以堆積餘土。就其內。暗開地道。作葫蘆口。直通城下。安放火藥火桶諸物在內。再用大竹通其節目。藏藥線作心。而透于外。然後推土填石。以塞其口。將兵馬撤開。燒著火心。火然藥發。城立破矣。輝大喜曰。此計大妙。煩爾監督。善領命。就于三官堂內調度。開鑿地道。

永曆九年。清順治十二年。乙未。正月初四日。洪善回覆地道已經完備。請元帥

發令。輝遣中協陳謙領兵馬爲先鋒。看今夜火發城崩。其勢稍止。乘便而入。其餘將士悉撤開埋伏。是夜輝令周圍掌號吶喊。城內疑爲攻城。各飽食登城。以備守禦。至二更善燒著火心。少頃霹靂一聲。如天崩地裂。烟灰蔽天。飛石徧野。城裂百有餘丈。兵民死者不計。少頃稍止。陳謙督兵進城。輝亦領各鎮砍四門而入。知縣陳有虞聞城破自縊而死。天明甘輝安民畢。先是甲午年十一月朔日。有箇不衫不履丐者。左手持雙快。右手執一碗。將快打碗從北門走過南門。如此者三日。忽然不見。人咸不解。多以爲狂。獨有林姓一人。忙挈家逃匿山中。及城破之後。方憶前日之丐者。乃異人也。持快打碗。而猶旋東西南北以起者。明是指人快快走也。但時人愚不知惜哉。

陳子曰。右都督黃廷統十八鎮攻粵東潮之饒平縣烏石樓。其石樓小而且堅。內請平和人朱亮爲師。指畫守禦之策。廷百計攻之不下。反失鎮將江龍。是時洪善亦在其間。廷令善開滾地龍。亮觀其攻打少緩。舉動可疑。訝曰必

用滾地龍法也。樓中人民驚惶。亮曰：毋憂。可周圍放缸盛水。他若果用滾地龍。其水必動。既而果見東南角缸水不時搖動。亮就動處令人鑿去。就他將所填火桶地雷盡行搬出。然後填塞其道。迨及發火。寂然無聲。不但不破其樓。而且助其許多火藥。廷知內有能人。遂撤師而回。故爲將者不在兵多。實在算勝。觀朱亮之謀度料敵。可見爲將之一班。惜其不用於世而泯沒也。

甘輝既得仙遊。遣人報捷。屯割城中。聞油潭里王志章有先知識。齋戒往謁。行弟子禮。問叩其平生功名壽算如何。志章書一帖示之。乃位至崇明。壽至崇明。八个字。輝拜受而寶藏之。輝後果位至中提督。永曆封爲崇明伯。從成功犯江南。由崇明縣而入。被梁化鳳所執。不屈而死。功痛惜之。輝措徵糧餉船料。携尙書唐顯悅全家出廈門。二月太監劉玉自安隆所奉永曆詔。從粵東龍航航海到廈。並詢邇來恢復事體如何。玉對曰：定南王孔有德征粵西。分師從衡州寶慶、永州而進。旋爲李定國所敗。帝於是稍安。但孫可望與李定國二人恃功驕

悍不睦。終非國家之福。成功日當此之際。內無賢相匡其君。而運籌帷幄。乏其人。外有驕將。兵無紀律。又不積儲糧餉。以足兵食。謀扼險阻。以圖恢復。而乃恃功互黨。致使英雄失望。人心瓦解。將何以望中興哉。玉頓首曰。藩主所言。可謂明見萬里。功又問龍門一路行走阻滯。若何。玉曰。乘間道鄉人相引。尙可往來。功時以事繁。而無專責。隨設六官。董理用潘庚鍾爲吏官。鄭擎柱爲禮官。洪旭爲戶官。陳寶鑰爲協理禮官。鑰字蓼崖。隆武舉人。係泉之晉江人。以張光啓爲兵官。程應璠爲刑官。璠浙江人。武進士。官都督。甚有機畧經濟之才。以馮澄世爲工官。常壽寧爲察言司。又設儲賢育材二館。令思明州知州鄧會勸學。取士得黃帶臣。洪初闢等四十人。次第轉六官之內辦事。或外爲監紀。或爲推官。通判不等。四月擢郝文興爲左提督。萬禮爲後提督。改王秀奇爲右提督。林勝爲戎旗鎮。黃昌爲援勤。左鎮黃梧爲前衝鎮。築涪州新城。五月南征。勤王總督林察周端等舟師次虎頭門。偵知李定國戰敗。涪州失守。不敢進兵。還師。功責其

遲滯失策。各戴罪立功。加都事吳慎爲戶官。議北上恢復。拜定西侯張名振爲元帥。忠靖伯陳輝副之。統二十四鎮入長江。加戶官洪旭爲水師右軍。北鎮陳六御爲五軍戎政。同行相機進兵。又遣中提督甘輝爲總督。王秀奇副之。領二十鎮爲北上應援。前提督黃廷爲帥。後提督萬禮副之。領二十鎮南下。甘輝舟師將至舟山。遇暴風。收入溫台地方。台州總兵馬信遣心腹將王英馳書幣交好約。降未果。輝仍將舟師出。令洪旭於舟山。由岑江口登岸。守兵無幾。不敢交戰。棄壘遁。報鎮將巴臣功。功山西人。勇猛機謀。遂分兵守禦。遣人請援。旣而張名振阮駿陳六御周瑞等。咸順風畢至。分道堵截。攻擊不息。六御遣監督李化龍招臣功。臣功村不能守。遂降。迨至回師。甘輝引見成功。功授臣功爲鐵騎鎮。改名臣興。六月孟兵部至福州。總督李率泰遣官賫書至廈門。說成功曰。激切再書。無非早定海上之議。早報聖明之念。以早結尊公父子忠孝之局耳。何足下舉動依然。毫釐千里耶。天下事情理與勢耳。尊公位列大臣之上。令祖母年

追風燭之期。念漳泉寸土。爲足下脈絡所關。卽祖宗廬墓所依。足下咫尺弄兵。荆棘其上。在尊公之魂夢。一刻未安。令祖母之寢食。一刻不樂。足下將泰然波濤之間。自謂功名富貴之計得乎。此情理之絕無者也。更有慮者。固山枕戈久矣。今大師駐馬於漳畔。勁旅露刃于泉南。有不能頃刻待。蓋不佞意主於撫。固山力主於攻。在足下夸浮恍惚。不佞焉敢執爲必撫。而止於攻。倘一攻而緩。撫局之成。猶可言也。一攻而遂成撫局之變。則尊公前後之綢繆。與不佞前後之挽回。俱無所用矣。此又勢之了然者也。足下家報所陳。皆足以啟羣疑之誹。而激聖明之怒。繕疏而入。幾費躊躇。然一片苦心。不得不爲足下所言。再爲披瀝。所云不知有父久矣。此言一出。不但傷天性之恩。且貽後世之刺。尊公身爲明季重臣。國亡而擇主。非背國而事仇也。足下前無顧命。今無共主。何得滅不可易之親。而從不必然之議也。古之求忠臣於孝子者。幾無據矣。至今猶屢執此三省相畀之說。胡爲乎來哉。今天下中外。帖然十載。而足下身羈海甸。猶欲招

徠之。以大一統之勢。誰敢取臣服之版圖。惟正之則。訾而輕議之。且從來無此廟算。無此邊籌也。卽如足下所云。亦可笑矣。無三省則舍我而忠於彼。將有三省卽棄彼而忠於我。此皆拂情影借之言。知非足下之心也。但念朝廷加恩一番。尊公經營一番。不佞來此區畫一番。天下事寧可瓦全。勿爲玉碎。足下或謀之族黨。或謀之老成。務爲開心見誠。勿得藏頭揜面。勿再以必不可告之言。必不可爲之事。徒費口舌。徒滋議論。而終於坐失機會也。不佞言至此。力已竭矣。他日見尊公於班聯之間。亦可告無罪矣。至進止之事。則有固山並諸大人。成敗之局。則關乎足下一門父子兄弟。不佞雖膺其職。其肯盡任其咎乎。惟足下裁之。功覽畢。掀髯而笑曰。彼欲以勁旅挾吾。吾豈懼一固山哉。厚待其使。答以葉阿二大人至京復命如何。然後再作商量。不報書。前提督黃廷師從揭陽港登岸。屯割桃花山。潮州總兵劉伯祿進兵救援。列營于鷹嘴浦。左戎旗林勝密令軍士每人要沙土一袋。填塞壕溝。砍柵破壘。伯祿果無備。二更倉卒而遁。廷

遂合南澳忠勇侯陳霸等衆圍揭陽。守將知縣棄城去。普寧亦繼陷。葉阿二大人至京復命。部議以成功驕兵無狀。反覆不定。置其父同安侯芝龍於高牆。成其胞叔芝豹於寧古塔。豹封澄濟伯。因護庇施琅。成功怒之。後見成功以馬得功事。殺芝堯。其令大嚴。不私其親。於是乘招撫。挈龍妻顏氏自安平入泉州投誠。移居京都。又令貝勒世子羅托統兵平海。貝勒世子至閩。成功偵知。遂集參軍並諸提鎮議曰。今日招撫不就。貝勒統兵已到。有何良策。左提督郝文興挺身曰。自古道水到土壓。兵來將對。此不易之理。今貝勒師來。焉可坐視。興雖不才。願爲先鋒。前去破敵。陳堯策曰。策自來愧無寸長。既左提督肯去。策願同行立功。以圖報效。馮澄世曰。二公所言。領兵破敵。其氣可奪。三軍固是爲將本分。但彼弓馬嫻熟。若欲陸戰。人馬馳驅。誠恐勝負未卜。况彼糧餉充足。四方雲集。萬一失其銳氣。不特人心搖動。而且軍威難振。以世管見。不如全師暫退。廈門堅守。各島養精蓄銳。修備戰艦。南北巡視。以待彼軍。若論彼兵水戰。非其所長。

況波恬浪靜之時。彼猶有頭眩暈吐之苦。安望其能禦敵。此乃保全軍士。以逸待勞之法也。未知諸公以爲何如。成功曰。戰者譬如逐鹿。未知得於誰手。退者可保無虞。澄世之言。實乃料人之至論。深合吾意。遂飛檄與兄泰。先將安平家資。盡移過金門安頓。毀其居第。墜其鎮城。

陳子曰。芝龍置第安平。開通海道。直至其內。可通洋船。亭榭樓臺。工巧雕琢。以至石洞花木。甲於泉郡。城外市鎮繁華。貿易叢集。不亞於省城。

又令杜輝傳諭泉屬士民。有願相從者。悉渡金廈兩島居住。令黃昭撥船接應。如不願從者。速遠避山中。恐遭兵馬蹂躪。空其庫藏。墜惠安同安諸縣城爲平地。又馳令與林俞卿林世用等。移家眷於海澄。擢漳州府城。成功斂兵回廈門。仍遣郝文興統其所部守海澄。擢海澄知縣黃維景爲察言司。察言司者稽察各文武得失。卽如通政司也。以丙戌舉人林昌爲海澄知縣。差張英督造高崎竹坑一帶沿邊砲臺烟墩。修拾燼船戰艦。通行南澳陳霸防備碣石蘇利南洋。

許龍二處會師。又令銅山張進整船宮仔前。以作南澳救援。令陳六御阮駿張名振等把守舟山。烏洋調洪旭甘輝林勝諸提鎮回師。旭次臺州港。總兵馬勝獻城降。同旭回見成功。功授勝中權鎮征鹵將軍印。九月左提督祥符伯郝文興病故。功哭祭甚哀。厚恤其子。令王秀奇代守海澄。十月張名振自長江直抵定海關。守關將張鴻德降。功授德前鋒鎮。十二月貝勒提師至泉。大獎韓尙亮堅守功。尋而擢尙亮海壇總兵。貝勒知成功退守金廈。墜倒諸城。笑曰海賊無伎倆矣。卽令府縣兼工修築城池。督造戰船。遣使賫諭到廈。招成功。功拒而不納。使者回。貝勒復易函致書。令再往。功厚待其使。以葉阿前議復之。不報書。永曆十年。清順治十三年丙申正月。平南王尙可喜撥左翼鎮右營徐有功統步騎。合潮鎮劉伯祿。恢復揭普諸邑。師札揭陽城。西屢遣騎哨挑戰。追之卽退。二十二日。援勦右鎮黃勝。殿兵鎮林文燦。前衝鎮黃梧。適在浦上操演。伯祿率騎兵過西門。左先鋒鎮蘇茂欲出兵與戰。金武鎮郭遂第曰。列陣過橋。勝則猶

可。倘若少怯。其橋又狹。難以退回。將如之何。黃梧曰。戰則必勝。何用退兵。茂以爲然。發令前進。對敵逾時。忽徐有功從旁冲出。合擊。茂陣大亂而潰。溺水死者。不計其數。黃勝林文燦二鎮咸亡焉。獨郭遂第全鎮。近橋。急回無失。前提督黃廷時守東門。聞報出兵。欲奪伯祿營。祿卽抽回兵馬。蘇茂黃梧纔收殘兵。廷卽申揭陽失機事狀於成功。功遣兵官張光啟按揭。察訪戰敗情由。二月。又令五軍總制張英。再督杜輝林勝諸鎮。往助黃廷。伯祿聞知。乃截港爲營。嚴禁各鄉接濟。如違。罪同叛逆。廷等兵衆食難。正躊躇間。忽成功諭到。調蘇茂黃梧杜輝回廈門。黃廷林勝下粵東。往偵永曆信。以便勤王。至碣石。攻蘇利。三月。陳六御報定西侯前軍總督張名振病故。成功以陳六御統其衆。水師前鎮阮駿偵定海關。造船五百艘。欲攻舟山。請援。功遣張鴻德馬勝協守。四月。貝勒得各澳般隻已備。令韓尙亮爲先鋒會攻。成功令林順陳等蕭泗楊祥林明陳澤七鎮。領大煩船十四艘。前往圍頭。坐上風以待。又令陳魁蘇茂陳輝陳斌四鎮。共配大

煩船十二艘。出泊遼羅。令兄泰率舟師應援。再令萬禮、黃梧、黃安、蔡文、林遜五鎮帶船十艘、快哨十艘、巡哨高崎、潯尾及圭嶼一帶。以防海澄諸港。仍檄南澳、陳霸、銅山張進爲備。又令翁天祐、王秀奇巡視廈門。韓尙亮等師出泉圍頭。相遇大戰。援勦左鎮王明、同信、武鎮、陳等冲艖入擊。沉船數艘。林順又合攻尙亮。急退泊圍頭。貝勒聞尙亮失利。亦率諸船而出。寄旋於圍頭。是夜忽狂風大作。凡滿兵配在船者。咸受顛播之苦。眩暈顛倒。支持不住。每迫舵工籠船近岸。舵工告以海船不比河船。況明日就要打仗。所有杉板業都佩起。今如此波浪。雖放得杉板。亦籠不得上岸。倘風若稍止。自然無眩吐之苦。旣而風愈狂。大雨又淋漓。濤浪滔天。船不成艖。或斷舵者。或拖舵者。聲震遍野。各爲飄散。船艖相觸。損壞過半。天曙回南方定。貝勒仍率韓尙亮等而退。時有船被風出金廈各島。被獲。見成功。功令割其耳鼻。斷其手掌。差船渡過。沿岸放回。貝勒遭風打回。船隻損壞。而廈門一時不能急攻。正在煩燥。有爲其說者曰。金門白沙寨係國姓。

胞叔鴻逵築隱之處。積蓄甚多。可統舟師。乘其無備。搶奪其寨。則金門難守。廈門自孤矣。貝勒大喜。令王進功爲帥。督舟師出。攻進功恐洩其謀。傳諸將曰。此去攻打白沙寨。將士各宜用力爭先。如得此寨。其中子女玉帛。咸錫爾等。若不用命者斬。將士得令。个个歡悅。奮躍上船。揚帆出港。甫到洋中。適遇洪旭領船巡哨。遂相迎敵。又遣快哨飛報成功。功令林順楊祥陳斌黃昌陳等藍衍楊祖入鎮出援。進功甫與洪旭酣戰之間。忽見兵艘齊至。恐被所困。隨揮諸船退入泉港。五月。黃廷等至碣石衛攻蘇利。利據險堅壁。廷因糧匱回師。六月。成功集文武會議。揭陽敗績。以蘇茂擅自出兵。不聽郭遂第之諫。以致黃勝林文燦諸軍覆沒。應以失機論罪。當死。出茂斬首示衆。責杜輝戴罪立功。罰黃梧鎧甲五百領。擢周全斌爲左先鋒。鎮郭遂第改名爲華棟。爲後衝鎮。撥黃梧入守海澄。代王秀奇出廈門議事。茂因縱施琅成功。偵知久蓄於懷。欲殺之。而無由。今偶有揭陽之失。借此斬之。諸將士不知其故。咸有後言曰。論茂揭陽之敗。無非天

意。豈戰之罪。雖不從郭金武之言。其氣可以吞敵。何至於死罪。况茂戰功。難以枚舉。非他人所可比。藩主如此施行。豈不令人寒心。成功知衆心不服。卽令厚殮。致靈養其妻孥。自作祭文。遣禮官陳瑞龍致祭。其父曰。謹以柔毛牲犧。致祭于統領左先鋒鎮蘇都督之靈曰。王恢非不忠于漢。然誤國家之計。雖武帝不能爲之赦。馬謖非無功於蜀。然違三軍之令。雖武侯不能爲之解。國無私法。余敢私恩斷不敢以私恩而虧國法。今廢私恩而行國法。卷言酬之神其格之哀哉。尙饗。於是三軍始定。貝勒雖恢復漳泉諸邑。獨海澄一縣。枕山依海。砲臺堅牢。烟墩密佈。帆船可援。因是屢攻未得下。多方誘降。而王秀奇等終不受招。忽成功以揭陽失利。斬蘇茂。而黃梧雖受鎧甲之罰。而心終不安。乘其撥守海澄之便。於六月十一日。遣心腹將賴玉。密通總督李率。率欲獻海澄投誠。率轉啓貝勒。貝勒大喜。檄提督馬得功接應。玉回報。梧因說茂之族弟蘇明曰。君知危乎。明曰。不知也。梧曰。本藩刻薄寡恩。百戰之功。毫無厚賞。偶爾失利。懸首竿

頭。爾兄揭陽之敗。實乃天意。今已被殺。爾能保其無事乎。明曰。如公所言。將奈何。梧曰。我已差人納款于總督。公若不去。禍必旋至。爲今之計。莫若相從投誠。方上策也。明曰。公戲我耶。抑有實事耶。梧曰。爾不信。我免冠示爾。明視梧鬢髮果剪。愕然曰。公母乃太急乎。梧曰。提督差官昨夜到此。我已將印剖繳去。故當面剪兩鬢示信。今乘王秀奇往廈之便。約今夜四鼓。馬提督到便獻城。遲則難於下手矣。明曰。果如是。吾當相從。但老母在廈。今若從公投誠。本藩豈肯干休。必然累及老母受刑。明誠千古罪人也。梧曰。智者達權。不可守經。公如不決。悔無及矣。明見梧左右雄壯。似欲相挾狀。無奈許之。同梧回署。出其印剖。亦剪兩鬢示信。乃詐爲巡視城垣。而勒兵以待。至五更城外。果報騎兵雲集。左先鋒鎮後協康忠領衆督禦。被黃梧所害。遂同蘇明開門迎降。提督總領旗劉進忠帶領騎兵首先入城。分守四門。天曙。梧明出見提督馬得功。功厚禮相待。出令安民。而市肆不驚。飛報貝勒。並總督李率泰。泰與貝勒各賚袍帽褂靴。令薙髮以

待貝勒以既得海澄則廈門可圖而收兩島無難事也。率泰亦云海澄係成功儲蓄糧餉之所。爲金廈門戶。今黃梧既歸命而獻海澄。足孤其勢。不日漳泉會師。以合攻兩島易也。卽將前欲封成功海澄公留下之印。會題授黃梧。命下准授黃梧爲海澄公。七月立五營駐漳州。平海梧薦施郎水務精熟。韜畧兼優。若欲平海。當用此人。卽遂改名爲獅貝勒。與率泰合疏保題施琅爲同安副將。尋而擢爲總兵。安插蘇明於漳平。後以明母在海。調明入京。授精奇尼哈番內大臣。成功亦以明爲梧所脅。非明本心。不殺其母。且給月餼以養之。當其時王秀奇之領兵張協。於晚間見黃梧出伏路之兵。悉係貼身親隨。而且舉動慌張。心甚疑之。遂乘潮落。差快哨往廈密稟王秀奇。說梧情狀。患有外變。當速爲備。秀奇接稟。業已三鼓。遂袖稟叩轅門。請見成功。功卽遣甘輝林勝陳斌陳鵬黃安楊祥諸鎮。駕快哨飛入海澄。又令洪旭馬信王秀奇陳魁張鴻德林世用劉國軒等。駕趕繪船接應。甘輝舟師甫至海門。天色微明。見沿海人民奔竄。頓足。

曰。事不濟矣。海澄必失。時張協等望圭嶼一帶航船而入。急招呼相救。輝令籠船。張協下船哭訴。請速救援。五都土城。時土城內副將林明與領兵康熊聞海澄有變。堅壁守禦。忽見滿兵齊至。進退維谷。忽聞甘輝來援。卽開門接應。輝令林勝等分伏要道。令陳斌陳鵬二鎮列陣候敵。令林明康熊搬運蓄儲糧餉下船。旣而洪旭大隊亦至。議欲乘彼人心未定。進攻奪城。得功見海船如葉。又合土城餘黨搖旗吶喊。似欲攻城之狀。遂分遣精騎暨鎗手據險堵禦。旭與輝曰。土城器械糧食旣已搬盡。咫尺孤寨。守亦無益。不如乘其潮退。督兵出廈門。以圖後舉。輝曰。此論最當。黃梧之謀已久。非陡然獻降。徒傷兵卒。無益於事。遂鳴金收軍。下船回廈。得功見海船已去。亦分兵據守隘口。佈伏防範。輝等回廈見成功。見土城糧餉搬盡。擢林明爲右戎旗鎮。康熊爲左戎旗鎮。又遣兵官張光啓兵都事黃璋下獄。以其扶同黃梧。曠借楊琦衣甲器械。應點之罪。後又不能善爲撫馭。反驚挾他。以致心惶叛去。七月。成功令黃元郭華棟二鎮領本部

將士下銅山。同張進協守。遂大會諸提鎮參軍商議。曰。本藩正欲刻期北上爭衡。只因海澄一失。遂爾中止。現今員勒與總督咸提師駐漳。其省城必然空虛。不如乘南風直抵閩安。入取福州。若得福州。則漳泉下游悉爲我有。他若救應疲於馳驅。是彼勞也。然後假一旅從中截殺。必自亂矣。未知諸公以爲何如。諸將曰。藩主神算。非諸將所能及。卽以中提督甘輝爲元帥。後提督萬禮副之。統杜輝。陳斌。陳魁。林明。巴新。興林。勝。藍。衍。魏。其志。楊富。黃安。劉國軒。楊來嘉。郭義。蔡祿。蔡文等一十五鎮。坐配大煩船四十艘。快哨二十艘。北上取閩安。輝至湄州。戴捷來迎。輝命捷爲引導。進攻閩安。閩安守將見海航雲至。不敢迎戰而遁。輝得閩安。勒兵報捷。功以前提督黃廷。率陳鵬。周全。斌等守廈門。釋張光啓。黃璋仍管事。洪旭同兄泰守金門。陳輝領煩船二十艘。泊南山邊圭嶼。以防海澄舟師之出。親領王秀奇。林明。張英。蕭泗林。雄。黃昭。蕭拱宸等往閩安。值中權鎮馬信自舟山遁回。見成功。陳訴定海關出水師船五百艘。合攻。信與阮駿。陳六

御張鴻德等分艚與戰。終日未分勝負。是夜二更南風大發。水師用火船縱焚。阮駿同陳六御張鴻德咸陣亡焉。功大痛哭。三將勇烈。令優恤其子。卽將大隊舟師入南臺。奪據其橋。進圍福州。分諸鎮東守烏龍江。以禦泉漳救援之師。西據洪塘水口。以截延建上游糧米。北守連江北嶺。以遏溫台接應之兵。惟南面近水不爲備。拆毀東南隅一帶房屋。豎柵安置砲臺。與烏樓相對。日夜攻打。轟聲震天。時貝勒與總督之兵在漳州。城果空虛。兵民人等一時爲之震動。僅有巡按宜永興在內。接閩安已破之報。正欲請兵防範。忽而樓船塞港。兵臨城下。與城守副將田勝善。用標鎗督兵守禦。又分一旅出守烏樓。以作犄角。但城大兵寡。乃會紳衿按家甲。揀選民壯。日夜輪流兼兵守禦。差人飛遞貝勒總督回師救援。成功一時驟至。未知虛實。未敢臨城。只調各鎮安營深溝柵。以爲久困計。每率衆攻城。卽被烏樓橫砲擊退。功集諸將議曰。烏樓乃係城中之犄角。不奪烏樓。此城難破。明日必須併力攻奪。方許收軍。如退縮者斬。是日砲火不

絕合攻烏樓。樓悉崩壞。兵士生無二三。遂爲成功。所奪城內見烏樓已破。人心愈惶。獨有參將張國威請於宜永貴曰。威觀在城諸將。只堪守城。至於田副將獨自一人。焉能分身破敵。現有原任布政司周亮工與副將王進緣事在獄。宜弔此二人出來計議。必有方畧。庶其圍可解也。貴曰。二人乃係欽犯。若縱之出。倘有他變。誰任其咎。國威曰。亮工王進二人。忠心無二。威願以全家四十三口保其無變。宜永貴見國威懇切。又當危急之際。卽允其請。立召亮工王進入轅門。許以立功贖罪。二人叩謝而出。致謝國威。威曰。今日之事。非市私恩。可速登城觀敵。設計破之。亮工與王進忙登南樓。遙望畢。卽回覆宜永貴曰。賊勢方銳。未可與敵。雖烏樓被其所奪。料賊一時未敢臨城。俟其稍懈。當出奇兵破之。宜永貴曰。何謂奇兵。亮工曰。遍觀城外。營壘相連。難以驟破。獨東南近水一角畧爾。疎防。可令王進帶騎兵三百人。步卒一千五百人。偷過鼓山後。轉出。路通橋。沖殺南臺船隻。再令田勝領騎兵一百五十人。步兵五百人。伏南門。李武領騎

兵一百五十人步兵五百人伏西門遙觀王進出兵二處起伏冲殺其餘兵民守城者悉令呐喊助威破之必矣遂戒嚴防守八月貝勒知成功犯福州與李率泰相議一面撥梅勒章京阿格商統領驍騎救援福州一面遣提督馬得功帶兵由雲霄八尺門渡江襲取銅山倣擊魏救韓之法十六夜三更宜永貴依亮工之計令兵結束人銜枚馬摘鈴開水部門而出王進領兵從鼓山後繞轉天色微明鳴螺喊殺城上見王進兵出遂發大砲大聲呐喊西南二處伏兵齊起成功諸營不知兵從何處來一時不及列陣各慌忙奔竄相爭下船乘潮而去殺傷溺水死者不計其數旗幟器械棄滿山野是日圍解成功出割閩安度勢踞險築砲臺圍寨卽羅星塔亦築土城令諸鎮輪流守禦功將大隊舟師移屯螺口江定海鳳埔九月初六日馬得功領兵至八尺門排渡攻銅山張進偵知遣黃元郭華棟疏衆來敵得功屢揮軍欲渡悉係華棟等踞險攻擊死傷甚衆得功見其有備遂抽師回郭華棟報捷於成功十月成功修表遣太監劉九

臯同內司鎮中營副將江玉振航海從粵東龍門問道見永曆請會師恢復擢右提督王秀奇爲五軍總督中權鎮馬信爲右提督禮官陳寶鑰假托修葺船隻密載眷口入泉州港投誠以黃開泰爲禮官原兵部侍郎王忠孝薦舉同安殉難陳鼎之子陳永華有經濟之才成功用爲參軍十二月成功督諸舟師犯羅源寧德等縣守將飛報貝勒貝勒令阿格商巴都柯如良等率騎兵往援初十日鄭芝龍差家人謝表到閩見貝勒佟巡撫李部院欲勸其子成功投誠時總督在漳佟巡撫修書曰我皇上定鼎以來不專用兵德威所迄無遠弗屆東至高麗滯兒哈魚皮諸國西至插漢緬甸諸國南至土苗洞蠻諸國北至河套海西諸國率皆慕義向化稽顙恐後於至孔耿尙吳諸藩封躬膺茅土任專一面君臣之情親於父子邇來卷卷於詐信之間是自疑貳也天時人事侈口而談驕蹇滿紙殊甚憤恨不佞畧一拆之大凡開創之初久而後定如周武一戎衣猶因小腆未靖作多士多方八篇以曉告之楚越弄兵不過地方殺運未終

敢煩王師戡定耳。近報執馘獻俘。風飄籜捲。至西人入河州一事。全無影響。而台臺伏處海隅。見聞不遠。一二浮食之輩。生事造言以相簧鼓。此乃山野村落。傳說稱奇。而不知其無稽也。至如河北水溢。關中地震。事實有之。董子謂天之仁愛仁君。故時出災異不一。以見天之絕愛人君也。自故股憂啟聖。毋論堯湯之世。水旱尤甚。漢文帝日中有王字。然貞觀之治。千古最稱。宣帝時鳳五出。麟一至。究仁慈不振。卒以短祚。災異之驗。果何如乎。從來竊發海上者。不乏人矣。其不能離於海者。猶魚之不能脫於淵也。廟堂妙算。以爲興師動衆於炯波浩渺之中。勞民而費財。不若收其英傑。使相統馭。居民得以永逸。此不過以海治海之策。今恩綸頻頒。詔使疊至。而台臺錯認以爲窮洋孤島。洵足爲萬里長城。幢幟檣櫓。可作邊隅。而意益驕。念益侈。不亦疎乎。聖天子車書一統。海宇率賓。猶溫詔慰勉。推心置腹。台臺僣強於鷺島之中。期期不奉詔。僣恣肆。眞夜郎王。問漢使者曰。漢比我何大也。若夫豪傑舉動。似不如是。不佞以爲尙可與言。

者。台臺不反覆於旣撫之後。而徘徊於未撫之先。洵骯髒男子哉。今若斂兵而退。以待天朝之命。不佞亦當代劉制臺擔其事。補牘上請。全天倫之恩。膺帶礪之錫。鐵券金章。如取如携。爾公爾侯。爰及苗裔。不特珥筆文臣不敢望。卽從龍諸勲策。血戰數十年未易致者。台臺一旦得之。此誠布衣之極致。匹夫之偉業矣。若夫擁烏合之衆。逞螳臂之勢。九重之上。赫然一怒。六師南至。豈顏有逆行者哉。抑或縣五等之賞。以待海濱之士。而肘腋之間。豈無懷我好音者乎。存亡利害。間不容髮。願高明熟思而審處之。語出由衷。並無欺飾。仰祈裁察。不勝企翹。差員送謝表至寧德。見成功表曰。太師受禁。無非爲藩主不肯薙髮耳。今天下已定。徒勞無益。父子天性。焉可棄絕。若早投誠一日。則太師早得一日之安。成功喝曰。爾輩但知保身。豈知誤國。爲天下事。安能逆料。滇南川貴。楚越荆襄之地。豪傑輩出。皆懷恢復之心。爾輩小人。焉敢鼓唇舌而冒談天數。若不急退。當臯爾首。表悚然不敢復言。功恐借撫爲由。而總督在漳。乘間出攻廈門。遂

令甘輝殿後。自領舟師載謝表同差官回廈門。二十一日。阿格商接偵卒報成。功大隊已去。隨揮軍追趕。至護國嶺。遙望後軍。隊伍整肅。不敢進迫。卽屯營相對。二十二日。格商率輕騎突陣。甘輝與戰終日。未分勝負。各收軍而回。馬信曰。藩主回廈議撫。命公殿後。非專於戰。公何過勞。輝曰。雖然。議撫回師。但所積貯。實關諸將命脉。彼來追迫。不得不禦。信曰。素聞公喜戰。明日觀公退敵。輝曰。當先催各營搬運糧米在船。然後抽兵過橋。奇兵韓德。前衝劉巧二鎮。可帶本部將士。埋伏在西北山谷。後衝黃昭。汝可帶本轄軍將。往橋之東北埋伏。火武鎮魏進功。汝可同中協陳謙前去誘敵。輪流接戰。當徐徐詐敗。且戰且怯。賺過橋之東北。聽連珠砲響。齊衝合攻。又令金岸康熊領本部兵偷過西南。作欲去攻城之狀。其餘咸下船。諸將悉依令。於四更造飯。五更各銜枚埋伏等候。格商回營。與衆相議。柯如良曰。甘輝伎倆。甚是高強。未可輕敵。商曰。赤脚毛賊。有何伎倆。除之甚易。明日當各用力。俟吾擒之。次早飽餐。結束而出。見沿岸羣然搬運。

糧米下船。商卽揮騎趕殺。將近至橋。火武鎮魏進功接戰。未及數合而退。陳謙出敵而進。功已渡橋矣。旣而謙亦退。格商迫之。謙分二隊伏於橋之左右。復出進禦。格商望見有伏。不敢追。謙乘疑亦抽過橋。商見其盡渡。過橋而去。遂尾其後而追之。將至東北角。忽聞連珠炮響。勒騎四望。而黃昭突出。格商奮勇冲殺。昭敗走未半里。韓德劉巧二伏齊起。商又分騎接戰。德與巧亦畧戰數合而退。商揮諸騎急追。柯如良騾馬高叫。敵兵賣戰當速。勿追。商弗聽。甘輝踞高按刀。視格商至。從高馳下。鬪商輝用金龜脫壳之計。格商被殺。巴都救之無及。輝勒兵轉戰。死失甚多。棄馬疋布幔輜重。不計其數。輝收軍。信迎曰。今日始信公之眞勇畧也。巴都飛報貝勒。貝勒大怒。而撫局又攔矣。成功送謝表歸。表乞回書。功不允。表叩頭流血。方取筆援書曰。嗟嗟。曾不思往見貝勒之時。許多好言。竟爾不聽。自投虎口。毋怪乎。其有今日也。吾父禍福存亡。兒料之熱矣。見其待投誠之人。有始無終。天下共曉。先以禮貌。後遂魚肉。總是挾之一字。兒豈可挾。

之人。哉。固。已。言。之。於。先。而。決。於。早。矣。今。又。以。不。入。耳。之。談。再。相。勸。勉。前。言。已。盡。回。之。何。益。但。謝。表。日。夜。跪。哭。謂。無。可。以。回。覆。爲。憂。不。得。不。因。前。言。而。詳。明。之。蓋。自。古。治。天。下。惟。德。可。以。服。人。三。代。無。論。矣。漢。光。武。恢。復。大。度。推。誠。寶。融。唐。太。宗。於。尉。遲。敬。德。朝。爲。仇。敵。一。見。而。待。以。腹。心。宋。太。祖。時。越。王。俶。全。家。來。朝。二。月。遣。還。羣。臣。乞。留。章。疏。封。固。賜。之。皆。有。豁。達。規。模。故。英。雄。感。德。樂。爲。之。用。若。專。用。詐。力。縱。可。服。人。而。人。未。必。心。服。况。詐。力。之。必。不。能。行。乎。自。入。閩。以。來。喪。許。多。人。馬。費。許。多。錢。糧。百。姓。塗。炭。赤。地。千。里。已。驗。于。往。時。茲。世。子。傾。國。來。已。三。載。殊。無。奇。謀。異。能。只。是。補。葺。破。城。建。造。煙。燴。而。已。一。弄。兵。於。白。沙。而。船。隻。覆。沒。再。弄。兵。於。銅。山。而。全。軍。殲。滅。揚。帆。所。到。而。閩。安。便。得。羅。源。殿。後。而。格。商。授。首。此。果。有。損。耶。益。耶。此。不。待。析。而。明。矣。今。欲。別。順。逆。而。不。知。順。逆。在。于。心。不。在。於。形。試。觀。姜。壞。金。聲。桓。海。時。行。豈。非。薙。髮。之。人。哉。大。丈。夫。磊。磊。落。落。光。明。正。大。皎。如。日。月。肯。傲。詐。僞。之。所。爲。苟。就。機。局。取。笑。當。時。試。思。今。日。之。城。中。竟。是。誰。家。之。天。下。損。無。數。

之。兵。馬。費。無。稽。之。錢。糧。死。億。萬。之。生。靈。區。區。爭。頭。數。根。之。髮。大。爲。失。策。且。亦。量。之。不。廣。也。誠。能。畧。其。小。而。計。其。大。益。地。足。食。挿。我。弁。將。何。難。罷。兵。息。民。彼。無。詐。我。無。疑。如。此。則。奉。口。口。正。朔。無。非。爲。民。生。地。也。爲。吾。父。屈。也。文。官。聽。部。選。錢。糧。照。前。約。又。非。爲。生。民。計。爲。吾。父。屈。也。將。兵。安。挿。得。宜。則。口。口。無。內。顧。之。憂。海。外。別。一。天。地。兒。效。巢。由。嚴。光。優。游。山。林。高。尙。其。志。耳。兒。志。已。堅。而。言。尤。實。母。煩。再。役。乞。赦。不。孝。之。罪。書。畢。付。謝。表。同。差。官。回。福。州。而。入。京。

永曆十一年。清順治十四年。丁酉。正月。成功督舟師北上。住三都。二月。令總制張英。後提督萬禮。統諸鎮攻溫州。金卿衛守將翟永壽降。收其糧食而回。三月。撥萬禮韓英洪善楊朝棟等。輪守閩安羅星塔寨柵。成功舟師至鎮下澳。遇雨。回廈門。定國公鄭鴻逵卒于金門。成功乘喪。恐其有變。戒嚴防備。四月。成功因地方頽得頽失。終無了局。何時得望中興。詢諸參軍吏官潘庚鍾曰。邊地雖得。亦不足以號召天下豪傑。昔太祖起義濠州。若不得兪通海廖永忠等水軍安。

能○奪○采○石○而○得○金○陵○以○成○一○統○之○基○以○鍾○管○見○漳○泉○沿○邊○數○載○爭○戰○民○亦○苦○極○
不○如○將○數○百○號○戰○艦○直○從○瓜○鎮○而○入○逼○取○江○西○南○京○一○得○彼○閩○粵○浙○楚○以○及○黔○
蜀○之○豪○傑○悉○嚮○應○矣○甘○輝○曰○江○浙○地○廣○非○數○十○萬○之○師○不○可○倘○大○隊○前○進○而○貝○
勒○偵○知○會○合○水○師○出○攻○兩○島○豈○不○危○乎○不○如○就○退○窺○其○釁○隙○攻○取○進○可○戰○退○可○
守○庚○鍾○曰○公○所○言○眼○前○常○見○非○長○久○計○也○今○若○不○取○是○自○老○其○師○倘○一○旦○會○天○
下○之○兵○以○窺○我○兩○島○豈○能○獨○全○乎○所○以○未○暇○全○師○及○此○者○尙○有○滇○黔○粵○西○孫○可○
望○李○定○國○等○牽○制○刻○下○藩○主○統○貔○貅○之○衆○入○據○長○江○截○其○糧○道○則○江○南○半○壁○悉○
爲○我○有○彼○自○顧○不○暇○奚○暇○攻○我○兩○島○哉○工○官○馮○澄○世○曰○潘○參○軍○之○論○正○是○舍○末○
而○就○本○若○今○日○坐○老○其○師○不○取○江○南○清○人○之○志○未○必○便○忘○兩○島○亦○理○勢○使○然○也○
甘○輝○堅○執○以○爲○不○可○恐○邯○鄲○學○步○反○失○其○舊○參○軍○陳○永○華○曰○倘○徒○在○閩○爭○野○爭○
城○而○望○中○興○此○亦○甚○難○今○日○潘○馮○二○參○軍○持○論○師○從○江○南○號○召○天○下○其○見○甚○高○
蓋○取○江○南○而○兩○島○自○安○若○偷○安○歲○月○一○旦○合○攻○雖○使○諸○葛○復○生○亦○難○措○手○矣○成○

功曰。吾亦有心久矣。正武侯所言。勢不兩立。清人其肯每飯忘我耶。當先遣人從間道抵粵西。請旨令孫可望。李定國。集滇黔粵楚之師。出洞庭而會江南。以分其勢。俾天下英雄。跂足相從。庚鍾曰。藩主所見甚明。但恐粵西孫李不睦。稽延而未得進。可差能員請旨。並說孫李忠君愛國之心。忘私憤而伸大義。分道出師立功者。王纔可搖動。庶得萬全。成功曰。此論甚是。但苦無人可爲使耳。永華曰。楊廷世極有口才。差往決能成事。功允華請。卽修表並書。遣楊廷世同劉九臯泛海。從龍門間道往粵西。四月。令水師後鎮施舉同孚順往浙江。招撫松門一帶漁船爲鄉導。以便進取長江。五月。察言司常壽寧啓鄭泰私盜洋船銀一萬兩。成功著六官會議。查常壽寧失實。以其離間左右親信之人。罪當死覆。成功念其起義。一家四十餘口被殺。老耄誤事。休置足矣。施舉至定海關遭風。收入港口。遇水師力戰而死。時有臺灣通事何斌者。因侵用撥一王銀二十餘萬。恐王清算。謀之小通事郭平。平曰。不過多開條目而已耳。斌曰。銀至二十萬。

亦非多開可以了當。平日不然將奈何。斌曰。語云。三年水潮東。三年水流西。所以有桑田滄海之語。我想鹿耳門一帶。沈壞夾板。屈曲之處。乃係深港。其赤嵌那邊。雖沙泥汙濺。寧無冲激更變。汝可密駕小船。作釣魚狀。順鹿耳門至赤嵌城邊。打探水道。尙如前淺汙。我亦有變更移易。回來再作商量。平卽尋小船。簍衣斗笠。魚餌釣竿。順流蕩漾。至潮漲。又順流而入。暗將竹篙打探。果於汙泥中。冲流一條港路。自赤嵌城直入鹿耳門。水深有四尺餘。歸來密報何斌。斌大喜。曰。果有是事。此乃天助我也。爾其秘之。七月。成功以洪旭。陳輝。督水師諸鎮。防守金廈。自領大隊舟師北上。初十日。至興化。黃石。令甘輝。駐割涵江。徵催糧米。十三日。出屯狼崎。坐快哨巡視閩安。令黃廷把守。廷曰。閩安迫近內地。恐一旦有虞。援之不及。諸軍危矣。成功曰。爾且暫守。當著人代汝。功回狼崎。撥護衛前鎮陳斌。神器鎮虛謙。右提督右鎮余程等。守閩安羅星塔。代黃廷從征。八月十二日。成功至海門登岸。逼攻黃巖縣。守將王戎率兵與戰。戰敗議降。知縣劉登

龍。遼東人勸戎堅守。戎執獻成功。功嘉其節。令人說之不從。乘守者睡。投江而死。功憐之。葬其屍於江濱。十八日。進圍臺州。馬信單騎招降。總兵李泌。同知府齊維蕃。臨海知縣黎嶽。詹獻城降。九月。天台太平諸邑降。海門衛堅拒不納。功遣萬禮攻之。不得下。功親到察閱地勢。見城堅險。遂按兵。令監督宗繼寧入城勸諭。守將張捷從。繼寧出見成功。功優待之。乞禁騷擾。前所劉崇聞捷。獻城亦遣人投降。永春縣林永。僞稱起義。勤王聚衆數萬餘。陷永春縣。總督李率泰徵各標兵將平之。乘勝議攻閩安。密遣標下投誠總兵張蘊玉。隨征副將劉陞耀。帶兵三千。駕船潛渡長樂港。過羅星塔。截其歸路。方進兵合攻。余程戰死。閩安復失。陳斌等死守羅星。剗待援。總兵施琅遣人招斌。斌率盧謙等薙髮投降。全師至福州。泰令大廳按冊內花名領賞。五人一隊。從東轅門入。由西轅門出。即收其器械。梟首千有餘人。斬訖。方收斌與謙等併殺之。但時呼傳甚急。有出玩賭博患病者。倩人代之。尚活有數十餘顆。成功接陳斌請援文。恐閩安有失。兩

島難保。遂乘臺州南下。至狼崎。報斌已投降。隨撥陳堯策守狼崎。禦閩安水師。功回廈門。楊廷世劉九臯賈表至粵。時值起冷孟銍爲兵部左侍郎。（銍後爲貴州巡撫。永曆十二年四月。馬進忠引兵入貴陽。銍被執。諭薙髮。罵不絕口而死。）王應龍爲司空。忽接成功本。稱欲躬督舟師。從瓜州鎮江而入。直取金陵。請命李定國孫可望等領兵。由楚泛洞庭會合恢復。以迎聖駕。永曆隨宣楊廷世劉九臯入見。問成功兵船錢糧。二人對以舳艫千艘。戰將數百員。雄兵二十餘萬。餉糧雖就地設處。尙有呂宋日本暹羅咬啣吧東京交趾等國洋船可以充繼。永曆大喜。下廷臣會議。冷孟銍奏曰。成功執大義不肯從父投誠。遠隔海濱。歲歲貢問不絕。今有大志欲親統舟師入鎮江。直取金陵。與陛下恢復中興。實有桓文尊周之義。宜加封晉秩。以鼓豪傑向應之心。永曆又問成功部下所隸何爵。臯奏曰。悉係先朝侯伯。永曆又問尙有宗親否。臯曰。有監國魯王。寧靖王。瀘溪王。巴東王。益王。世子。周王。世孫。宗戚甚多。永曆又問待諸宗親侯伯之

禮如何。皇曰。凡諸王宗親。成功以先帝所封宗人府府正之禮相見。月送俸祿。諸難臣逃歸者。悉以先輩敬之。或授以參軍。預謀軍政。其侯伯來歸者。有兵者聽其提調。執法無私。待人不貳。不讓唐之汾陽也。永曆顧冷孟銍曰。所屬部伍。尙有侯伯。卿當酌議。加封何銜。銍曰。太祖祖訓。外臣無封王例。故徐達以死後。追贈王爵。今在擾攘之際。理應從權。不可徒守以經。如李定國。不過以戰勝定南王。孔有德之功。遂封西寧王爵。成功係先帝賜姓。其與祖制無遺。亦應封王。以便統衆而收人心。永曆曰。卿所奏甚合時宜。當議王號。孟銍曰。當以延平一府封之。俟江南有功。日再進封親王。方見次第。永曆依議。著禮部鑄延平王印。齎册一道。另著楊廷世。劉九臯。舉成功。部下將官有功者。奏聞。以便加爵。廷世卽舉左提督王秀奇。右提督馬信。中提督甘輝。前提督黃廷。後提督萬禮。五軍都督陳輝。兵官洪旭。戶官鄭泰等。永曆遂封王秀奇爲祥符伯。馬信爲建威伯。甘輝爲崇明伯。黃廷爲永安伯。萬禮爲建安伯。陳輝爲忠靖伯。洪旭爲忠振伯。

鄭泰加少傅。其餘侯伯印數十顆。以錫有功。另以六部郎中各一員。隨師紀錄。賜上方劍。便宜行事。又自書手詔。令其速進師江南。伸大義於天下。號召英雄。勤王迎駕。遣漳平伯周金湯。太監劉國柱。賚印冊同楊廷世。劉九臯。從廣西間道。由粵東龍門航海來廈。十月二十八日。成功統舟師南下。十一月朔日到南澳。忠勇侯陳霸曰。欲攻惠潮。須防蘇利許龍。不如先取鷓汀。此寨糧足。當先取之。左戎旗林勝願爲先鋒。功允之。令黃廷爲帥。又撥諸鎮入揭陽潮陽澄海。以分其勢。功遂回廈門。時值冬旱。壕寨悉乾。廷令造木牌遮身。以鐵鑿掘寨脚。堆火藥地雷。火發寨崩十有餘丈。林勝督衆乘勢冲入。因恨其屢次率船截劫。屠戮殆盡。活者僅存百有餘人而已。十二月。周金湯。劉國柱。楊廷世。劉九臯等。到廈門。成功率甘輝等諸文武。恭迎海堦。拜受延平王冊封。請安畢。厚待周金湯。劉國柱。詳詢粵東進取情形。金湯曰。恢復在於人心。苟人人如貴藩之心。則中興指日可俟。奈諸將各心其心耳。功是之。遂拜謝表。齎會師江南疏。差參軍徐

孚遠。太監劉之清。劉九臯。同周金湯。劉國柱。航海龍門復命。功設長史審理典寶。典杖。典儀。典膳等官。悉照王府行事。

永曆十二年。清順治十五年。戊戌。正月。成功調南北征。各提鎮舟師回廈。二月。挑選各提督壯勇者爲親軍。廈門港築演武亭操演。各以五百觔石力能舉起。遍遊教塲者五千人。畫樣與工官馮澄世。監造堅厚鐵盔鐵鎧。及兩臂裙圍鐵鞋等項。箭穿不入者。又製鐵面。只露眼耳口鼻。粧畫五彩如鬼形。手執斬馬大刀。每人月給餉銀三兩。有功者擢爲營將。令左虎衛陳魁統之。三月。遣右虎衛陳鵬統兵船南下攻許龍。龍率舟師出禦失利。鵬掠其邊民而回。四月。擢楊來嘉爲親丁。鎮屬前提督永安伯黃廷統轄。同忠振伯洪旭共商機務。守金廈。擢思明州知州鄧會爲監督糧餉。又以薛聯桂爲思明州知州。修表遣楊廷世往粵西報出師日期。甘輝曰。輝聞瓜鎮限以鐵錘。此則船之難于前進。兩挺砲臺密佈。此則陸之難于登岸。况江南地方遼闊。以輝愚意。未可深入。不如俟李定

國孫可望二人會師信到。然後進兵。庶首尾相應。戰守有方。可以一鼓見效。功曰。會師之舉。不過欲牽制其勢耳。豈不會師而卽不進兵者乎。況兵馬雲集。日費萬金。豈可稽延自老其師哉。遂大整兵船。以中提督崇明伯甘輝爲前部先鋒。統左虎衛陳魁鐵人五千。護衛兵一萬。並宣毅前鎮陳澤。宣毅後鎮吳豪。前衝鎮劉巧。右虎鎮陳鵬。後勁鎮楊正。左衝鎮郭義。復衝鎮劉進忠。水武鎮林世用等。兵一萬。配坐大熾船二十艘。鳥船二十艘。快哨十艘。爲首程。又遣右提督建威伯馬信。統右先鋒鎮楊祖。援勤左鎮林明。殿後鎮黃昌。親兵鎮黃應。智武鎮藍衍。木武鎮黃照。正兵鎮楊世德。火武鎮魏標。等兵二萬。配坐大戰船三十艘。趕繪船二十艘。快哨十艘。爲二程接應。又令後提督建安伯方禮。統援勤右鎮賀世明。右衝鎮蔡祿。宣毅中鎮李化龍。神桃鎮楊祥。援勤中鎮蔡文。宣毅左鎮黃安。宣毅右鎮巴興。臣奇兵鎮張魁等。領兵二萬。配坐大熾船三十艘。艍船二十艘。快哨十艘。爲第三程接應。成功自領侍衛陳堯策。五軍都督張英。左武

衛林勝。右武衛周全斌。吏官潘庚鍾。戶官林兪卿。禮官黃開泰。行營判官程應璠。兵官張煌言。工官馮澄世。閩安侯周瑞。輔明侯林察。定西侯張名振。平北侯周鶴芝。忠定伯林習山。親兵鎮楊好。中權鎮李泌。神符伯五軍戎政王秀奇。援勦前鎮戴捷。援勦後鎮劉猷。護衛右鎮楊衍。參軍林寄昌。紀許國蔡鳴雷。監紀柯平等。配坐水師前鎮阮美。一鎮洪善。二鎮蔡福。三鎮林德。四鎮毛正。五鎮陳瑞等。船共一百二十艘。兵四萬。爲合後號。稱舟師一十萬衆。航船北上。六月初七日。率衆登岸攻平陽。守將單任暹降。十三日。瑞安縣守將艾誠祥亦獻城降。宣毅右鎮兼管鐵騎巴臣興病故。黑祥雲統其衆。十六日。成功至溫州。鎮將堅守。功細度其城險固。惟徵木料糧餉。出往舟山。七月初二日。成功開引港官李順。此去羊山多少水路。順曰。西南風一日便到。其山皆羊。故名之。初九日。午時到羊山。而各提督咸至。隨放炮鳴金。金鼓響天。不移時。風聲徐起。浪疊千層。暫爾泐泐。忽而波湧翻江之勢。攪海之狂。船難收艤。互相觸壞。棄棹砍桅。遭浪遇

礁呼救遍海。不可勝計。功失四子睿。七子浴。八子溫。暨兵士數千人。其所存之船亦各壞損。乃收回舟山修葺。諸提督咸勸功暫回廈門。功以業已出師。理無再還。九月。修葺諸船報竣。成功督舟師至象山。初十日。知縣徐福率父老出降。功安民畢。各鎮兵士逃者甚衆。悉係北上新附。且訛言北將盡欲投誠。故援勦右鎮賀世明。船桅粧以粉色。紅色爲號。功亦疑世明船桅之異。遂令姚國泰。贊世明統其衆。又遣張英。諭林世用。魏標。李泌。張魁。悉解兵權。爲監督。世用大憤不屈死。擢總理監營翁天祐。署左提督事。十月初二日。後衝鎮劉進忠。率其衆入黃巖海門所降。清功聞報。馳令周全斌追之。全斌督快哨二十艘。星夜飛趕至海門。將城圍困攻。打進忠禦之。忠恐成功大隊齊至。於半夜乘斌無備。開西門突圍而去。斌亦不追。拔其城。報成功。功擢黃昭爲後衝鎮。十一月初七日。成功破磬石衛。分諸提鎮就汛養兵。十二月。成功率衆。剗鈔關取糧。

永曆十三年。清順治十六年。己亥。二月。成功仍回磬石衛。調各提鎮至石磬聽。

令四月成功。至定海關二十九日。入寧波港。焚船五月初一日。退出初四日。抵舟山烈港。十八日。到崇明縣。守崇明總兵梁化鳳。係陝西西安府長安縣人。歛兵堅守。功欲順風入瓜州。馮澄世曰。欲進兵瓜州。必當先取崇明。庶可流通。蓄積以爲外援。功曰。崇明城小而堅。取之必遲延。日月。反使瓜州有備。不如先取瓜州。鎮若得瓜。鎮則江南門戶已破。先截其糧道。是腹心有疾。然後乘勢取江南。則崇明不攻而自破。外則修書遣監紀劉澄。密通江南提督馬進寶。又差羅蘊章。全張煌言爲長江鄉道使。命顧忠前往探烏喇寧古諸港路。顧忠去八箇月方回。時成功已入長江。敗績回廈。忠是以不果行。隨問誰敢領先鋒印。以取瓜州。建威伯右提督馬信向前曰。信蒙藩主眷顧。爵居人上。恨無寸功。今瓜州之地方險要。兵馬之多寡虛實。頗知其詳。願爲先鋒破敵。成功壯其勇。喜曰。公肯效力。此城必破。卽撥黃安。蔡文。黃昭。藍衍。四將與統轄。又分四隊。周全斌居中。甘輝居左。翁天祐居右。萬禮居後。陳瑞龍諸鎮爲接應。或取木營。或斷

攔江壩。或取談家洲。或抄瓜州之後。而攻其城。六月十四日。成功至焦山。時有鎮江操江軍門朱衣佐。雖然防範。不意功突至。又恃江中有滾江龍之欄。故馬信等一時舟師揚帆吶喊。旌旗蔽港。金鼓震天。惟有標下巡江營都司羅明昇。督兵五百。守談家洲。瓜鎮之中。列砲與瓜州棚堤砲臺相對以待之。信督衆環攻。明昇分頭死拒力戰。至砲盡矢絕。全軍覆沒。信撥蔡文守之。乘勝合周全斌師。飄颺大進。悉爲攔江壩所阻。不得前。全斌張亮陳大勝等。令善泅水者十餘人。漾去斬斷。遂無阻礙。揚帆直過。登岸列隊。朱衣佐聞鄭兵至。卽率遊擊左雲龍出禦。全斌奮勇冲陣。連斬十餘人。而馬信從其後攻城。韓英楊祖以籐牌護身。首先上梯。江防同知徐騰鯨棄城遁。衣佐知城已破。無心戀戰。全左雲龍欲走揚州。陳澤尾追至大表橋下。斬雲龍。活擒衣佐。十七日。陳瑞龍督諸鎮焚奪木浮營三座。木浮營者。用大杉木結排。另用木圍柵。內架大砲十餘門。從上流壓下。船遇之一擊立碎。十八日。成功移屯瓜州。紀馬信周全斌第一功。押朱衣

佐見成功。功曰：此腐儒也。殺之。徒汗吾劍。釋之。足見我們宏度。去縛與衣服。放之歸。周全斌曰：今瓜州已得。可乘勢連取鎮江。反掌之易。倘若遲緩。彼得深溝固守。徒費士卒。成功然之。以援勦後鎮。劉猷守瓜州。柯平督理江防事。十九日。成功親督諸軍。進泊鎮江南岸七里港。二十二夜二更。直抵銀山下。寅時。傳令列陣。分爲五隊而進。陳魁統鐵人。逼柵。守銀山將見之。駭然不敢出戰。惟齊射之。箭不能入。鐵人冒死而進。柵遂破。全斌呼曰：時不可失。乘此破竹之勢。攻奪其城。必可得也。卽轉身首先向前。連砍數人。衆軍隨之。守鎮江總兵高謙聞攻銀山。領兵出援。遇全斌。趕殺勢雄。不敢戰。歛兵入城。斌見謙怯。乘勢尾追。搶門而入。高謙與知府戴可進亦卽投降。成功入城安民畢。加高謙爲破鹵將軍。以工官馮澄世爲常鎮道。兵都事李徵爲鎮江知府。監紀林若霖爲理刑。荊州衛糧船十四艘來降。功大悅。擢其首李文正爲衛指揮。其餘各授以千百戶之職。太平府守將劉世賢遣人獻城。功加爲鎮南將軍。令羅蘊章帶所部去。太平協

守揚州文武各遁。城空。百姓綵旗羊酒。前到鎮江。請師。功受其款。獻厚待。父老。給示嚴禁與之歸。六月二十七日。成功議興師取江南。參軍潘庚鍾曰。今既一鼓而克瓜鎮。是則江南門戶已破。雖軍聲大振。天下搖動。未可驟然進兵。當暫住瓜鎮。遣將分據淮陽諸郡。扼其咽喉。收拾人心。窺其釁隙。然後大隊齊進。況北清兵民人等不下百萬。一旦糧道斷絕。待哺不足。兩月之間。其兵必潰。其民必亂。如此可不勞而定。此正曹公之所以取勝于官渡也。馮澄世曰。江南城池廣闊。進攻不易。不如且聽庚鍾之謀。駐劄瓜鎮。據其險要。斷其糧道。一面收拾人心。一面遣人從間道報捷。請旨命李定國等合師。乃爲上策。成功曰。不然。時有不同耳。昔漢祚改移。羣雄分據。袁曹爭勝。故曹操常以算勝。我明朝歷年三百。德澤已久。不幸而有甲申之變。以致百姓遭殃。庸臣剝削。鄉紳欺凌。四海鼎沸。今大兵一至。自然瓦解。若不進兵。恢復舊京。呼召天下豪傑。是自老其師。倘徵各省兵馬齊至。首尾合擊。我勢豈不自孤。況太祖昔日一得廖永忠。僉通海。

等水師乘勢奪采石而併金陵。破竹摧枯。正貴神速耳。遂不聽二人之言。時周全斌曰。瓜鎮已得。神速進兵。倘一鼓而下。迎駕西來。中興指日。功點首曰。然我於昔日。苟狗諸將臆見。日事爭戰于邊境。何日得望中興乎。爾等諸將各協力齊心。千載一時。得此便可號令天下。英傑正所謂不入虎穴。焉得虎子。十二日。成功率諸文武祭太祖。哭奠列宗。回令甘輝。余新。割獅子山。萬禮。楊祖。割第二大橋山上。以翁天祐爲救應。禦鳳儀門要路。馬信。郭義。黃昭。蕭拱宸。屯割漢西門。連林。明林。勝。黃昌。魏雄。楊世德。諸營壘。又令陳鵬。藍衍。蔡祿。楊好。屯割東南角。依水爲營。劉巧。黃應。楊正。戴捷。劉國軒。屯割西北角。旁山爲壘。連周。瑞。林。察。張名。振等營。又令張英。陳堯。策。林。習。山。屯割嶽廟山。連諸宿鎮。護衛成功。大營各設鹿角。瞭望深溝。木柵防禦。江南一時震動。總督管效忠。初聞瓜州失守。繼報鎮江又陷。正在調集各處兵馬。忽聞鄭兵臨境。登城觀望。見旌旗閃爍。金鼓闐轟。未敢出敵。閉門避鋒。陡報操江軍門朱依。佐單騎至城下。隨開門延入。細

詢始末。衣佐曰。敵人雖是猖獗。其衆不過數萬。其船不過數百。瓜鎮之失。皆由一時無備。故遭所破。今可速遣人卑辭寬限。以驕其志。然後設守禦之策。徵援兵。破之。管效忠然其言。即遣能言者前往成功營中。限期納款。崇明總兵梁化鳳。因成功直入瓜鎮。隨繞道至江南。時值在座。憤然而起曰。諒此狐鼠之輩。妄自輕舉。深入重地。孤軍無援。豈能久住。俟銳意稍懈。一鼓破之。效忠撫其背曰。此舉專賴將軍。化鳳躍然曰。食君之祿。當死王事。豈敢臨難苟免。卽出分兵把守。成功督諸鎮據險開壕。參軍潘庚鍾曰。細觀城內。必然空虛。可令四面攻擊。齊倚雲梯。此城必然可得成功。深以爲然。正發令各提鎮預備雲梯木牌布袋。以便攻城。忽報王秀奇送城內納款。人到營請見。功令之入。其人叩稟曰。大師到此。卽當開門。延入奈我朝有例。守城者過三十日。城失則罪不及妻孥。今各官眷口悉在北京。乞藩主寬三十日之限。卽當開門迎降。功允其請而厚賞之。復諭之曰。本藩攻此孤城。不過一腳尖耳。既然來降。姑准其寬限者。蓋欲取信。

於天下也。若至期不降。攻入之時。寸草不留。差者叩首而去。潘庚鍾曰。此乃緩兵之計。不可憑信。可速攻之。成功曰。自舟山興師至此。戰必勝。攻必取。彼焉敢緩吾之兵耶。彼朝實有定例。爾勿多疑。庚鍾曰。孫子有云。辭卑者詐也。無約而請和者謀也。欲降則降。豈戀內顧。決是城中。空虛速爲進兵攻之。乃爲上策。功曰。古者攻城爲下。攻心爲上。今旣來降。又准其約。若驟然攻之。彼心不服。俟其不如前約。然後急攻。莫謂城內人心悅服。且使天下皆知我行仁義之師。功以江上兩次之捷。不聽庚鍾之言。發令諸提鎮。嚴防謹守。日則瞭望。夜則伏路。金鼓之聲。日夜不息。守困以待其降。管效忠得差回報。允限之言。喜曰。此乃朝廷之福。隨密檄附近救援。惟化鳳日夜上城觀望。見其營壘。步步相關。首尾相應。無計可施。偶巡到東北角。見一營人馬。屯割在白土山下。稍疲可破。奈不得卽至。忽思此處原有城門。名曰神策門。因出入者少。故壘塞之。不如將此門乘夜挖開。沖出方爲勝計。二十一夜三更時分。化鳳率兵挖開城門。天色微明。率騎

兵五百突出。果然此營以非衝要之地。無甚關防。其伏路瞭望。俱各疏畧。忽輕騎直至。疑爲天降。披掛不及。遂大潰。化鳳率衆追殺。至余新營前。新督兵出戰。各營列陣以看。因功前有不得吾令。擅自進兵者罪之之語。不敢向前對敵。俄而新敗。投蕭拱宸。鳳乘勢冲入。蕭拱宸接戰。當不得箭如雨下。亦敗而遁。時萬禮在橋頭山。欲來救援。而化鳳已收兵矣。總督管效忠接梁化鳳乘夜挖開城門通敵報效。忠曰。梁將軍素心忠貞。決無是事。其中別有隱情。乃差人偵看。隨即親率將士登城。飛報東北角廝殺。隨開門接應。出割城外。二十二日。甘輝林勝潘庚鍾等。勸成功暫抽兵將出觀音門。相機以圖再舉。功曰。小挫銳氣。便欲思退。明日正欲觀諸君建功耳。令萬禮諸軍勿動。調馬信吳豪韓英由水路抄其後。姚國泰楊祖藍衍楊正抽屯山上。甘輝張英伏在谷內。林勝陳魁列于山下。陳鵬蔡祿往觀音門接應救援。二十三日。化鳳率驍騎直逼左先鋒鎮楊祖祖奮勇力戰。諸將見成功張蓋在山觀敵。未有號令。不敢擅出。俄而祖敗。藍衍

戰死。功方令蔡祿陳鵬往援。奈山高行遲。而化鳳又從山上馳下。鵬與祿軍亦大潰。效忠另遣別將。繞山之背。合化鳳之師。時甘輝張英伏谷內。未得號令。遂爲所困。乃分頭禦敵。莫傷箭而死。獨甘輝力戰不退。左右咸亡。乃大叫曰。我甘國公也。勿射。可擒去。請功。化鳳揮騎乘虛冲殺。諸鎮營壘咸皆搖動。未及戰者。見山上黃蓋尙在。不敢救援。亦不敢奔走。林勝見蔡祿敗下。遙觀黃蓋尙在山。上又不發號令。急喚中協金岸領兵。康龍曰。敵人雖勝兩陣。實無多騎。潘主之不發號令而齊擊者。謬也。爾二人可統兵出敵。我自督後軍接應。岸與龍二人飛奔出營。與化鳳大戰。未分勝負。忽東門騎兵突出合攻。林勝粵之海澄人。最雄偉多武藝。轉頭禦之。而魏雄戰死。衆潰。勝不能止。全軍皆沒。成功在山上觀戰。見蔡祿等敗。囑庚鍾曰。爾立蓋下。代吾指麾。不可去。蓋吾下山催水軍從後抄殺。隨帶健將十餘。猛下快哨。欲催水軍。時值潮退。無奈駕至江心。遙望諸軍披靡不堪。隨飛帆出鎮江矣。化鳳合城內諸軍。見山上黃蓋指曰。擒賊當擒首。

隨揮軍殺來。奈矢石如雨不得上。陳魁因林勝受敵抽兵。繞道而退。見騎兵逼成功營壘。卽趨援。魁中箭死。諸軍悉赴水死。化鳳又合師環攻。山中四面受敵。潘庚鍾揮劍督護死戰。亦皆覆沒。化鳳收軍奏凱。效忠出迎。問曰。前夜將軍挖城出兵。何不通知。以慰衆懷。化鳳頓首曰。成功積寇。一時猖獗。瓜鎮已破。人心搖動。桀黠狡獪之徒。多有異念。安保城內無有爲之偵探者。故不敢請命者。恐洩其機也。今日之勝。正所謂出其不意而攻其無備也。其擅出師之罪。望乞赦宥。效忠曰。古者大夫出使。苟有利於社稷者。專之可也。況此大捷。自當奏聞。但乘摧枯拉朽之勢。恢復瓜鎮。非公不可。公勿卸甲。化鳳卽領兵而行。並請順途欲歸崇明。以防餘熾。効忠然之。卽奏江南之捷。破成功者。乃崇明總兵梁化鳳也。世祖大悅。欲召化鳳陛見。因海疆未靖。命下令畫工圖形進覽。卽擢爲江南提督。二十四日。功至鎮江。令全斌駕快哨。載敗兵。撈救殘卒。再令柯平亦著快哨。沿江救載。忽報黃安全隊至。所有殘敗將士。悉賴載歸。繼而馬信棟堯策。

王秀奇林習山張德周崔芝張名振周瑞姚國泰劉巧林明黃昭郭義蔡祿楊祖陳鵬吳豪楊正馮澄世蕭拱宸黃應程應璠張行李纘元蔡鳴雷蔡政等陸續俱回。功大慟。甘輝潘庚鍾萬禮張英林勝藍衍陳魁李泌楊標魏其志林世忠張廷臣洪復吳賜等陣亡之將曰。是我欺敵非爾等之罪也。二十六日。報騎兵雲至。沙船亦出。功令獻與全斌殿後。二十八日。功先行。出泊排沙嶼。諸將棄瓜鎮。或居三磬山。或往舟山。八月初一日。成功師回狼山上沙。初四日。泊吳淞港。議攻崇明城。遂架大炮攻擊。城崩數十丈。鎮將梁化鳳於隨崩處隨築備禦。並造木馬釘叉拋置崩處。十一夜齊倚雲梯。擊死正兵鎮韓英。監督王起奉等數十人。方退。十三日。議欲再攻崇明。周全斌曰。城小而堅。難以驟破。雖得亦無用。徒損士卒耳。適蔡政同馬進寶差劉秉忠回師。功見謀不遂。乃回師。十八日。至浙江。擢楊富正兵鎮。分派各提鎮就溫台舟山各港地方屯割徵餉。九月初三日。功開駕。初七日。到廈門。以江南出師損兵折將。無尺寸功。修表遣李明世

從龍門間道達行在。自貶王爵。仍用招討大將軍。卽甘輝力戰。見陳謙等盡亡。自稱甘國公。被擒見總督管效忠。忠令輝跪。輝不屈。效忠責之曰。爲將自當戰死。不能戰死而被擒。卽當投順。何敢抗禮。豈以吾劍不利乎。輝曰。吾豈不知大丈夫當死沙場。但大廈已傾。非一木可支。若默默與士卒同偃臥于荒坵。是所不願耳。吾今聲言而來者。正欲知我之死處也。效忠見其抗壯勇烈。欲其降。乃令降將余新勸之。輝見新至。裂眦大罵曰。余新匹夫。枉生天地之間。兵敗投降。有何面目見我爾。今雖降。亦不能久活我。甘國公頭可斷而志不可易也。伸脚便踢罵不絕口。遂見殺。徐而余新亦被害。十月報援勦鎮劉猷。在溫州徵餉。水退船擱淺。被溫州總鎮督騎兵突至。力戰全軍覆沒。功大歎惜。令恤其家。十二月報逮提督楊進寶入京勘問。又將軍達素督三省水師。會勦兩島。

永曆十四年庚子清順治十七年正月。偵者飛報將軍達素滿騎首程已到福州。功集諸提鎮參軍議曰。彼因江南之敗。欲乘我喘息未定。前來攻擊。俟彼整

船調兵。必于五月。斯時南風正盛。江浙沙船。未必敢出。惟慮粵東而已。周全斌曰。粵東船隻。六櫓。入櫓。只好守港。若出海洋。非彼所長。至於碣石之蘇利。南洋之許龍。亦戀棧之馬耳。豈敢離其巢。壳若漳泉之師。分頭敵之。必可破也。功曰。爾料誠當。隨馳檄南澳。忠勇侯陳霸。准購船隻。防敵蘇利許龍。又另檄銅山中匡伯張進。出殯船于宮仔前遊颺。以作南澳援師。謹守八尺門砲臺。以備陸路渡江。二月成功。令工官馮澄世兼工修整諸戰艦。備敵。又調南北汛各提鎮到廈門聽令。三月將軍達素到泉州。會總督李率泰。提督馬得功。海澄公黃梧。就泉漳各港之石碼海澄。造鳥船殯船。搗剿兩島。又知會兩廣總督李棲鳳。碣石總兵蘇利。南洋總兵許龍。饒平總兵吳大奇。又調寧波溫臺各港船齊下。時有總督旗牌張應熊。密領率泰孔雀膽一枚。往廈門。與其小功弟德。因德在成功處爲厨子。謀欲乘其與諸將晏會時。一齊毒死德。雖喜富貴之徒。然奈心中終懷疑畏。遂將此事。轉任其徒弟王四。四大喜許之。德隨告病在家。等候王四。適

成功會議設筵。王四欲下藥。則渾身寒戰。又捧者環立迫催。下之弗及。迨其取去。則心安。如此者屢。因甚恐怖。乃歸告其父耀。耀大驚曰。事主而害之。不忠也。受託而背之。不信也。寧爲負信。不可不忠。覆宗滅嗣。豈可爲之。宜速首無罪。卽同四告成功。功曰。吾乃天生。豈人能害。重賞耀與四。卽差護衛擒德全家。德到低首無言。惟叩首稱萬死。欲擒其兄應熊。供稱已去三日矣。功令發出教場。令武士萬箭射死。後應熊偵知報率泰。泰嘆曰。謀事在人。成事在天。果不虛也。厚賞應熊。火催各港速整船隻。以候會剿。四月。成功改建威伯右提督馬信爲提督。驍騎親軍同忠定伯林習山守裂嶼。以輔明侯林察爲水師總督。督中衝鎮蕭拱宸等。往崇武禦泉港水師。二十六日。報泉港水師船二百餘號。出到祥芝澳。陸兵登岸。其船傍山邊而行。泊圍頭。兵仍割營。功隨遣快哨馳令與林察。將所帶戰船泊劉五店。禦正圍頭水師。勿使入同安港。戎政王秀奇楊朝棟總督高崎等處。宣毅左鎮黃安協同兄泰守金門城仔角。右虎衛陳鵬遊兵鎮胡靖。

殿兵鎮陳璋。守五通高崎。陸路援剿後鎮張志爲水師應援。宣毅前鎮陳澤。宣毅後鎮吳豪。守倒流寨。中衝鎮劉俊。守蟹仔寨。智武鎮顏望忠。守赤山坪。右衝鎮蔡祿。守東渡寨。仁武鎮康邦彥。守神前。後衝鎮黃安。左衝鎮郭義。前衝鎮劉巧。援剿前鎮林明。往同安港遊颺邀敵。閩安侯周瑞。忠靖伯陳輝。援剿右協楊元。援剿右鎮林順。正兵鎮楊富。護衛右鎮鄭仁。泊南山邊。以防海澄出師。前提督黃庭。右武衛周全斌。援剿左鎮黃昌。率趕繪船十艘。內裝硝磺棕麻火器之類。寄泊狗子嶼。劍石。以備燒船。著英兵鎮陳瑞保護家眷。暨諸提督文武眷口。又曉諭廈門兵民婦女。撥水師洪善等船。盡載過裂裂嶼金門。而空廈嶼。功率陳堯策。洪天祐。戴捷。薛進思等。在鼓浪嶼尾觀敵發令。使洪旭在鎮海旗尾接應。時總督李率泰。正知會將軍達素。提督馬得功。海澄公黃梧。同安總兵施琅。各港齊出師。合攻兩島。忽有右虎衛陳鵬差人密款。奉令守高崎地方。欲放空炮。接五通師渡過廈門。廈門得。則成功易於撲滅。率泰納其降。卽飛催粵師合擊。

五月初八日。滿兵悉配在船。俱約初十日齊出。是日黃梧督諸船。乘潮落出海門。功方遣陳堯策持令箭。坐快哨。遍傳各鎮船。不許擅自起棹。當看藩王師船號炮連發。方許起棹迎敵。如違者斬。正傳到周瑞熿船。而海門師大至。堯策不及馳去。與瑞督衆戰。戰逾時。被火藥所焚。全船沉沒。繼至陳輝。輝揮衆死敵。損傷過半。輝見勢危情急。下艙發火。其環跳過船者。適逢艙中火藥冲起。燒死甚衆。餘卒疑爲計也。咸不敢過。輝得乘遲疑。砍斷棹索逸出。成功見周瑞已焚死。陳輝傷損棄棹。而黃梧率舟師雲至。功執旗劍。顧問左右曰。流平否。左右答流已平矣。成功曰。流平則潮轉。潮轉則風隨之。速發火。狗俾諸船起棹迎敵。遂連發三炮。諸船得令盡起。各發斗頭熿。功囑何義守坐駕。自下入槳快哨。來往催戰。時近午。潮湧風發。四處齊進。而鄭泰又令水師鎮蔡叶吉率趕繒船二十艘。從活嶼繼進。合馬信洪旭黃庭林順周全斌等諸大船。於鼓浪嶼後。象鼻前。橫攻焚殺。梧船風不利。潮又逆。互相觸壞。眩吐昏迷。強立不定。遂潰。僵屍滿海。有

船三艘見圭。噴欲籠岸。舵公不允。衆疑有異心。殺之。登岸遙望。乃海中孤嶼。是絕地也。欲再下船。成功船已蟻至。無奈抽矢出刀。據岸拒之。功見有四百餘衆。遣馬信折箭爲誓。招之。諸人計窮。乃投刀矢降。後亦被成功溺于海。其出同安港。將軍達素。總兵施琅。駕船趕高崎。以應陳鵬約。但鵬謀降清。全鎮部將悉僉名號。獨不通知其左營陳蟒。以蟒樸實故也。滿師恃有約。船未到岸。各爭先上。值蟒一隊站近水。見滿兵皆已棄船登岸。勢急不俟號令。即率其所部向前。滿師意爲來逆。不防蟒發炮。死者過半。殿兵鎮陳璋聞砲響。以爲陳鵬發令。亦喊聲合擊。水師吳豪率船抄其後圍攻。所有先鋒船隻悉沉。水陷於淖。十僅三歸而已。鵬愕然計左。亦揮領兵林雍。領旗協劉雄。前衝營劉俊。亦從東擊下。遂大勝。報捷成功。知陳鵬有謀。未敢聲破。恐其急變。反密遣洪旭前去稱賀。以安其心。旭得令。挑選健將二十。坐小快哨一艘。由竹坑抵高崎。離有里許。上岸。鵬左右報旭至。出接見。旭從者二人。旭又深揖恭賀。以得非常勳勞。贊其用。賺兵半。

渡而擊之。計雖古名將不過是也。稱羨不絕口。鵬以爲機關未洩。談笑自若。設筵款待酒畢。旭告辭出而不卽行。停步營前。指其所擊之處。搖頭咋舌。稱其功莫大焉。又說藩令槩不許起樅。致閩安侯五軍之死。行三五步止。又大贊藩主料風起必從潮。主問潮平發砲。一戰遂勝。真神算也。行又三五步停止。回顧鵬左右數十好漢。佩大刀隨之。旭冷笑曰。吾與爾鎮主交最厚。今日到營拜賀大功。不過爾鎮主見我遠來。步送江邊。未盡之談。再爲繾綣。何用佩刀。跟隨。鵬聞說亦笑。退其左右。只存管家一人而已。旭又行又停步。又高談如卸瓶中之水。滔滔不竭。直賺至江邊。作揖相辭。而舟中二十猛士飛奔擒鵬。下船駕駛而去。迨營中望見。欲趕來救。業到半江。軍士鼎沸。殿後鎮陳璋同刑官程應璠至營。出成功諭。僅數鵬通謀罪狀。與衆無干。軍乃定。旭解鵬至成功。問以縱敵渡江。若非蟒與璋。則今日之地已屬他人矣。鵬啞口。成功令出鵬于校場。令寸磔以示衆。擢陳蟒爲右虎衛統其軍。何義爲左虎衛。陳璋爲宣毅左鎮。六日發諸鎮。

眷口竝百姓婦女回廈門。偵報粵師吳六奇遣其左營馬嵩帶兵至潮州。剖於韓祠之左爲刺客所殺。蘇利許龍船雖出港。見南澳有備。未敢進前。惟遊颺觀望。迨報聞師失利。亦各斂軍。還成功。雖喜大勝。終苦彈丸兩島。難以抗天下兵。集洪旭馬信黃廷王秀奇陳輝楊朝棟林習山吳豪馮澄世蔡鳴雷薛聯桂陳永華等商議。若得有一處。方可以進戰退守。諸人無以應。但持南北固守爲對。功曰。吾聞臺灣離此不遠。意欲整師奪踞。何如。吳豪曰。臺灣前乃曠野。故太師曾寄跡其間。今爲紅毛所踞。現築城二座。一在赤嵌。一在鯤身。臨水設炮台。又打沉夾板數艘。紆迴曲折于內港。凡船欲入者。必由砲臺前經過。若越此。則船必觸犯。沉夾板而破。堅固周密。將二十餘載。取之徒費其力。成功聞言亦中止。七月。成功遣兵官張光啟往日本借兵。十月。將軍達素回京。成功欲整師下粵。報原浙江監國魯王殂于金門。同兵部侍郎王忠孝禮葬于後浦。十一月。出使日本張光啟回。稱上將軍以其前出兵損失。堅意不允。僅助銅煩鹿銃倭刀而

已。

永曆十五年清順治十八年辛丑正月徐孚遠從滇歸而粵東路阻趨龍門之安南安南國王欲孚遠以臣禮見孚遠說係天朝使者守節不屈國王亦懷成。功。威。不。敢。加。害。禮。之。置。船。送。孚。遠。回。見。成。功。陳。說。劉。九。臯。劉。之。清。中。途。連。亡。惟。周。金。湯。與。孚。遠。至。永。安。見。帝。帝。命。李。定。國。出。師。戰。敗。孫。可。望。降。清。帝。被。吳。三。桂。所。逼。議。欲。走。緬。甸。成。功。聞。之。歔。歔。嘆。息。而。心。愈。煩。適。臺。灣。通。事。何。斌。侵。用。揆。一。王。庫。銀。數。十。萬。懼。王。清。算。業。令。人。將。港。路。密。探。於。元。夕。大。張。花。燈。烟。火。竹。馬。戲。綵。歌。妓。窮。極。奇。巧。請。王。與。酋。長。下。夜。歡。飲。斌。密。安。雙。帆。竝。辦。船。二。艘。泊。于。附。近。俟。夜。半。潮。將。落。斌。假。不。勝。酒。又。作。腹。絞。狀。出。如。廁。由。後。門。下。船。飛。到。廈。門。叩。見。成。功。功。問。其。來。意。斌。曰。臺。灣。沃。野。數。千。里。實。霸。王。之。區。若。得。此。地。可。以。雄。其。國。使。人。耕。種。可。以。足。其。食。上。至。鷄。籠。淡。水。硝。磺。有。焉。且。橫。絕。大。海。肆。通。外。國。置。船。興。販。桅。舵。銅。鐵。不。憂。乏。用。移。諸。鎮。兵。士。眷。口。其。間。十。年。生。聚。十。年。教。養。而。國。可。

富兵可強。進攻退守。眞足與中國抗衡也。遂出袖中地圖以獻。歷歷如指諸掌。竝陳土番受紅毛之苦。水路變易情形。若天威一指。唾手可得。成功聞其言。觀其圖。卻如六月中暑。得服涼劑。沁人心脾。滿心豁然。起撫何斌背曰。此殆天之使。公授予也。自當重報。汝勿揚聲。吾自有成算。畱斌於內。人莫知焉。成功既納何斌之言。又詳閱其畫圖。知水路不從炮臺前經過。胸中已有成算。次日大會諸侯伯提鎮參軍等文武議事。功曰。自攻江南一敗。清國欺我孤軍勢窮。遂會南北舟師合攻。幸賴諸君之力。雖然已敗。但恐終不相忘。故每夜徘徊籌畫。知附近無可住足。惟臺灣一地。離此不遠。暫取之。可以連金廈而撫諸島。然後廣通外國。訓練士卒。進則可戰。而復中原之地。退則可守。而無內顧之憂。諸君以爲何如。宣毅後鎮吳豪起身對曰。前日藩主曾以臺灣下問。豪已經細稟。非豪之不用命。曾奈炮臺利害。水路險惡。縱有奇謀。而無所用。雖欲奮勇而不能施。是徒費其力也。功曰。此常俗之見。不足用于今日。而佐吾之一臂也。黃廷曰。臺

灣地方。聞甚深廣。實未曾到。不知情。形如吳豪所陳。紅毛炮。果有其名。沉船。隻又無別路。可達。若必由炮臺前而進。此所謂以兵與敵也。功曰。此亦常見耳。建威伯馬信曰。藩主所慮者。諸島難以久拒清國。欲先固其根本。而後壯其枝葉。此乃終始萬全至計。信北人也。委實不知。但以人事而論。蜀有高山峻嶺。尙可攀藤而上。捲氍而下。吳有鐵纜橫江。尙可用火燒斷。紅毛雖桀黠。布置周密。豈無別計。可破。今乘將士閒暇。不如統一旅前往。探望。倘可進取。則併力而攻。如果利害。再作相商。亦未爲晚。此信之管見也。功曰。此乃因時制宜。見機而動之論。豪復執曰。臺灣實豪屢經之地。豈不知其詳。既知其詳。而不阻諫。徒附會其說。以誤藩主大事。豪負罪多矣。諸將議論不一。陳永華曰。凡事必先盡之人。而後聽之。天宜毅後鎮所言。是身經其地。細陳利害。乃守經之見。亦愛主也。未可爲不是。如建威伯之論。大興舟師。前去審勢。度時乘虛。覷便。此乃行權將畧也。試行之以盡人力。悉在藩主裁之。楊朝棟亦竭言可行。功大喜曰。朝棟之言。

可破。千古疑。惑。著禮官擇日。令世子經監守各島。臺灣非吾親。征不可議。遂定。即行檄南澳陳霸。防備蘇許二處。又撥郭義蔡祿二鎮。帶本部兵士前往銅山。與張進協守。策應南來之師。又以參軍蔡協吉佐兄泰守金門。命洪天祐楊富楊來嘉何義陳輝督船守南日圍頭。湄州一帶接連金門。以防北來之師。洪旭黃廷王秀奇林習山杜輝林順蕭泗鄭擎柱鄧會薛聯桂陳永華葉亨柯平等。又擢洪旭之子磊。馮澄世之子錫範。陳永華之姪繩武。三人共輔世子經守廈門。調度各島。時經年二十一。功自領馬信周全斌蕭拱宸陳蟒黃昭林明張志朱堯羅蘊章陳澤楊祥薛進思陳瑞戴捷黃昌劉國軒洪暄陳廣林福張在何祐吳豪蔡鳴雷楊英謝賢李胤。竝其四弟襲。于二月初一日祭江興師。兵部尙書唐顯悅。兵部侍郎王忠孝。浙江軍門盧若騰。吏部給事中辜朝薦。右副都御史沈佺期。御史徐孚遠。光祿寺卿諸葛倬。監紀許國等。並寧靖王魯王世子瀘溪王巴東王暨留守各提鎮參軍。文武郊餞東征。初三日午刻。成功舟師齊出。

遼羅。是夜放洋。初四令人上桅看山。報曰澎湖山望見。至未刻抵澎湖。卽收入娘媽宮。諸船悉到。無一失者。初六日。功祭禱海岳。並巡視附近諸嶼。與衆將言曰。臺灣若得。則此爲門戶保障。隨撥陳廣楊祖林福張在等守澎湖。初七日。功下令曰。本藩矢志恢復。念切中興。前者出師北討。恨尺土之未得。旣而舳艫數萬。還恐孤島之難居。故冒波濤。欲闢不服之區。暫寄軍旅。養晦待時。非爲貪戀海外。苟延安樂。自當竭誠禱告皇天。竝達列祖。假我潮水行我舟師。爾從征諸提鎮營將。勿以紅毛火炮爲疑畏。當遙觀本藩鷁首所向。銜尾而進。初八。成功坐駕豎起帥旗。旁列五方中懸龍纛。發炮三聲。金鼓震天。令洪暄引港船先面東而去。諸提鎮照序魚貫。至未刻遙見鹿耳門。令何斌坐斗頭。按圖紆廻。徐徐照應轉舵。揚帆吶喊。從赤嵌城而進。成功曰。整隊登岸。斌請曰。急圍奪倉廩。然後列陣進兵。恐其焚毀。其守赤嵌酋長。描難叮見成功。大隊登岸。軍威赫耀。一面遣郎何機從鯤身請援。一面發炮。初十日。成功令兵士每名草一束。圍屯赤

嵌城遣通事吳萬李仲說實。叮如不降。周圍放火焚之。實叮懼。出降。功厚待。令過安平說揆一王。先揆一王當於元夕赴何斌之請。燈酒坐歌。酣樂達旦。斌雖乘月逸出。王以斌爲困酒。這次早覓斌無蹤。方知其遁。亦只疑其侵用。豈料引師奪國。十八日申刻。忽風雨驟至。潮水冲岸。聲振雲雷。聞者慄慄。直交子時方息。天明王率諸酋長登城望海。聞鹿耳門外砲聲轟天。急集諸酋長登臺。持千里鏡照見許多船隻。旛旗飛繖。王笑曰。唐人不知死活。敢犯吾境。著砲臺上火砲齊備。俟船到時。接連而發。則無遺類矣。歡笑自若。少頃見首船轉頭向北而上。忽而回東。忽而轉北。從者悉依首船行。盡不從砲臺邊過。王顧左右荷蘭曰。此港路從來泥淺沙汙。今日唐船何得無礙。豈不異哉。一面令主砲者發砲。砲遠弗能及。一面令酋長黎英三帶兵落夾板。出去截擊。迨至人齊。將申酉起風之時。正值潮起。俄而見大隊舟師已達赤嵌。兵士登岸列陣。軍威甚壯。王虞其逼城。將撥落夾板者吊起。卽令黎英三從鯤身過。援赤嵌。甫到三鯤身。遇耶何

機曰。兵少難援。且回見王。此兵實天降。非傾國往救。安能禁敵。王曰。此從何來。遂超選排鎗手。來日過赤嵌。決戰。成功早起。聞安平。荷蘭擊鼓吹笛。卽掌號。功知欲出兵。傳諸將諭曰。荷蘭無別伎。惟恃砲火而已。黃昭爾可帶銃手五百名。連環燧二百門。分作三隊。前往鯤身尾列陣以候。待彼對攻。楊祥爾可帶藤牌手五百名。從鬼仔埔後。繞過鯤身之左。橫中截殺。蕭拱宸爾整艦仔二十艘。看彼隊伍將過。七鯤身欲與我等交鋒。隨卽搖旗吶喊。駕駛作過去攻城狀。彼兵見之。自然慌亂。不敢戀戰。破之必矣。調撥已定。又令諸鎮列陣。靜伏守候。荷蘭果行至七鯤身尾。方欲對壘。忽見赤嵌快哨搖動。欲過安平攻城。心遂虛。而楊祥領藤牌手又到。跳舞橫冲。荷蘭愈慌。立陣不住。敗下。死者過半。退守其城。成功揮軍進圍。王死拒之。大炮時打。功亦不敢逼。雖督兵圍困。只鯤身硬路。其餘悉環水。而荷蘭又不時打銃。諸軍多被損傷。功令兵士斬竹作籬籬。堆土環柵。七鯤身設立門戶。置炮臺以防之。於是軍稍安。五月。黃安劉俊陳瑞胡靖顏望。

忠陳璋等六鎮。統船二十艘至臺。功擢黃安爲右虎衛。改赤嵌爲承天府。楊之朝棟爲府尹。又設二縣隸之。一天興縣以視敬任之。一萬年縣以莊之列任之。適世子經。差兵都事楊榮。押送糧餉軍器暨諸食物到臺。成功問金廈各島咸寧。惟有謠傳東山蔡祿郭義。暗通黃梧欲投清。功隨密發諭文。楊榮回廈門。與洪旭令行單。弔二鎮帶全師過臺。若違令則無他意。如遲延觀望。急除之。旭接諭。差人往銅山傳藩令。著二鎮帶本部兵。配所坐船隻。卽往臺灣。郭義遂整船欲東。蔡祿與其部將陳華羅棟謀曰。不意藩令來如此之速。華曰。事已八九。豈可半途而廢。棟曰。恐二爺不允。祿曰。二爺是吾事。爾可速使人往海澄公處爲要。華曰。今夜卽去。祿遂藏羅陳二將於內。差人請義到。祿曰。國姓信讒。以大兄之故。大兄指萬禮前禮等同盟。以萬人合心。以萬爲姓。萬禮卽張禮。死南京。成功回廈。建忠臣廟。享諸死者。以甘輝爲首。次張萬禮。後有人怨禮。言其非戰死。是逃履水。忙不及去。甲溺死。豈可與陣亡將士齒。成功信之。遂撤去。懷

疑我兄弟二人。我業已遣人投清。我去。汝能保其無恙乎。不如俱去。何如。義曰。大兄雖不死於戰。而溺於水。實亦沒于王事。非同謀叛者等。與汝我何干。而相疑至此。祿一時無以答。其兄萬五擊榻曰。君臣不可相疑。疑則必離。今者藩令來。召是疑之。漸也。况臺灣新闢荒涼之地。去者多。不服水土。此決不可去。若召而不往。非臣子之禮。勢難兩立。七弟所見甚高。宜從之。義意尙躊躇。道宗復迫之曰。自古英雄去暗投明。若當斷不斷。乃婦人之仁也。義方決。祿卽出。陳華羅棟二將。插刀立誓。卽將船收回。聲言檳棋不堅。難以冲過橫洋。停泊收整。燂洗。義祿又將軍器密帶入城。欲謀併銅山。傳陳華羅棟並鍾瑞等。率衆闕說許龍兵上山。義祿分據四門。劫隆武舉人忠匡伯張進衙。進聞城中。急傳親隨欲出。而門者奔報曰。萬二萬七反了。兵已圍城。進忙懷其印。卽從後門登山向北而走。陳華尾追。進回顧曰。爾不念夙昔乎。何相逼也。華曰。無他意。請本爵安民。進曰。吾將印交汝。華得印便回。進欲越城。見無船隻。停步。而祿又差羅棟至。進

無奈回見二鎮。說之曰。吾亦有心。久欲投誠。奈無人爲引。今既二公舉事。何不預知。使吾匆忙。今若不棄。願與偕行。祿義大喜。隨出牌諭安民。進曰。凡事尊讓之。可稱交善。祿義信以爲然。初四日。進託病不出。祿捉原察言司薛聯桂。至欲殺之。道宗衛救。祿雖陽許。而心未灰。桂懼。隨道宗在於九仙巖。朝夕不敢離。後同祿義投誠。授江西督糧道。初六日。呂簇請進曰。公既與二鎮合心。獻城投誠。亦當整備。恐旦夕兵至。去無及矣。進泣曰。進海濱一匹夫耳。生逢亂世。受先帝恩重。位至伯爵。復荷藩主深信。共事恢復。委託土地之寄。今日失守。罪不容誅。尙有何面目與之同行。再屈膝於他人。簇曰。公既如此。卽當飛通世子。用計圖之。進曰。難矣。二賊用意深久。險阻必周。若他人謀洩。爲禍愈慘。簇曰。然則坐以待斃乎。進曰。惟爾義俠。可託。吾欲密置火藥數十桶。環布臥室。請二賊入內議事。擲火與之偕亡。他兵無主。必亂。爾然後按兵請救。簇跪泣受計。初七日。簇趨謂祿義曰。本爵恐廈門南澳聞知。合兵前來。則甚費力。何公爺接應。至今未到。

心甚憂焉。奈本爵忽染病。畏風。尙有機密事。不便傳述者。煩二位將軍入內計議。祿義聞請。卽行將至府門。躊躇未敢遽前。而請者又至。祿義愈疑。隨詭答曰。爾代吾轉覆本爵。原欲入內共商。適有緊急軍情。難緩。俟明日來會。未遲。卽反步回。簾急將語覆進。進嘆曰。計不成矣。天也。吾盡吾心而已。遂冠帶。揮呂簇等左右。出自投火藥。發霹靂如雷。黑烟滿天。而衙焚。忽進屍自天半下落於街。初三日。鄭經接祿義叛銅山報。卽戒嚴整船。初九日。又接張進賺計不成。自焚信。遣黃廷。杜輝。黃元翁。天祐。何義。黃昌。楊來嘉等鎮下銅山。擒祿義。南澳陳豹聞祿義變。亦親整舟師會剿。祿義知二處師動。於八尺門排渡。通清師過銅山。而海澄公黃梧。全右路總兵王進功。督兵駐劄陳埭。令詔安營副將劉進忠帶兵過江。接應祿義。十九日。祿義任衆搶掠。空其城。由八尺門投誠。黃廷合陳豹師登岸。遣將分道追弗及。惟謹守砲臺。安插餘民。飛捷報。經令黃廷等回廈。陳豹仍歸南澳。以洪天祐。同黃元相繼守銅山。經自監守各島。仁慈儉恤。謙恭愛

人雖好學善射。但嚴毅果敢。弗如。厥父之風也。先自海澄公黃梧進一本。內密陳滅賊五策。(一)金廈兩島彈丸之區。得延至今日而抗拒者。實由沿海人民走險。糧餉油鐵桅船之物。靡不接濟。若從山東江浙閩粵沿海居民。盡徙入內地。設立邊界。布置防守。則不攻自滅也。(二)將所有沿海船隻。悉行燒燬。寸板不許下水。凡溪河豎柵。貨物不許越界。時刻瞭望。違者死無赦。如此半載。金廈船隻。無可修葺。自然朽爛。彼衆許多。糧艸不繼。自然瓦解。此所謂不用戰而坐看其死也。(三)其父芝龍。羈縻在京。成功賂商賈。南北興販。時通消息。宜速究此輩。嚴加懲治。其物入官。則交通可絕矣。(四)成功墳墓。現在各處。叛臣賊子。誅及九族。况其祖乎。悉一暨遷毀。暴露殄滅。俾其命脉斷。則種類不待誅而自滅也。(五)投誠兵官。散住各府州縣。虛糜錢糧。倘有作祟。又貽害地方。不淺。可將投誠官移住各省。分墾荒地。不但可散其黨。以絕後患。且可蕃衆而足國也。廷議遣兵部尙書蘇納海來閩。勘選湖廣道御史李芝芳聞之。嘆曰。自古養

兵原以衛疆土。未聞棄疆土以避敵也。上疏奏曰。爲冒死條陳。乞俯恤民瘼。以固國家事。山賊海寇。何代無之。但當制馭有方。使民獲寧宇。未聞堂堂天朝。遷民避賊者也。夫遷民事勢之不可者。今竊爲陛下陳之。聖朝仁政。以得民爲本。萬民歸心。以輸納爲先。五省沿海一帶。遭逆塗毒。正供雜派。輸將恐後。此足徵順民之大端。而深可憐憫者也。梁惠王易粟。孟子短之。今詔諭欲徙五省沿海邊民。何以垂訓後世。此臣所謂不可者一也。昔日明政不修。逆闖犯闕。北京淪沒。我朝興仁義之師。驅除逆黨。救民水火。是以率土歸心。滿漢一家。今中左彈丸之地。不思征討。遽遷以避。其如天朝體統何。所謂不可者二也。鄭成功江南大敗。膽破心寒。今已遠遁臺灣。所存餘孽。或剿或撫。呼吸可定。况沿海皆我赤子。一旦遷之。鴻雁與嗟。室家靡定。或浮海而遁。去此歸彼。是以民予敵。所謂不可者三也。周成王亦有遷頑民於洛邑。尙得田宅以優養之。設庠序以教育之。使其民知禮義而無異心。今欲遷沿海一帶。當其出示。諭限數日。官兵一到。遂

棄田宅。擊家產。別墳墓。號泣而去。是委民於溝洫也。爲民父母。豈忍若是。所謂不可者四也。江南土薄。一夫受田不滿三畝。一家聚食。尙捕魚買販以補不足。聖諭頒下。欲酌給田宅。安插餘民。然遷實多方。民無所措。且當道者未有處置。惟催趕日促。使民而逃。貧者得積數日之糧。富者而軼數月之儲。逼處內地。無家可依。無糧可食。饑寒逼而奸邪生。不爲海寇。卽爲山賊。一夫持竿。四方響應。其若之何。所謂不可者五也。鄭成功前年欲撫時。求海濱六府駐防。文武官長聽其選擇。稅賦盡輸軍國之用。尙欲納東西二洋船餉數萬。持正以爲不可。今五省之民。沿海已居其半。當道者不思制插安民。只欲盡以遷移。能使敵自斃乎。是敵未必能殲滅。未必能盡降。而國家先棄五省之地土人民。所謂不可者六也。江南魚鹽爲富強之資。沿海一帶。魚鹽之利。何啻數千萬土產之物。百倍其利。况乃日用之需。鹽更五穀之輔。一日無鹽。物將日腐。且土產年例。京解從此而止。所謂不可者七也。夫郡縣內地。亦賴邊界以捍禦。故朝廷設邊界爲郡。

縣藩籬。亦以衛民。今兵不守。沿海盡遷其民。移居內地。則敵長驅內地。直抵其城邑。其誰禦之。不知守內地之兵。發一半守邊界。衛所聯絡鄉民。以相助戰守。使敵不敢睨視邊界。如是則內地免守。所謂不可者八也。當道者不爲深謀遠慮。操一朝之權。棄百姓。過于反賊。萬一不順。問誰之咎。臣今愚忠。冒陳天聽。稍可濟元元之命。萬死不敢辭。或以臣言爲可採。則臣死榮于生。倘以臣言無可用。雖不死何益于國。伏望頒除遷移之令。下哀痛之詔。使民沾恩。國享長寧。疏上。納之時。成功據退台灣論。揆一王曰。乃前太師練兵之所。今藩王前來。是復其故土。此處所離爾國遙遠。安能久平藩王動柔遠之念。不忍加害爾。一面凡倉庫。不許擅用。其餘爾等珍寶珠銀。私積悉聽載歸。如若執迷不悟。明日環山海。悉用油薪礮柴。積壘齊攻。船毀城破。悔之莫及。王與諸酋長聞之。悚然願罷兵。約降。請乞歸國。功允其降。許放歸國。隨將王庫銀兩。火藥火砲。照冊繳納。其餘諸物。悉聽其鑿下夾板。十二月初三日。成功縱揆一王回國。功以荷蘭

去台灣平。遂祭告山川神祇。改台爲東都。附紅毛城置第宅居焉。初六日。諸鎮兵詣成功轅門。告給發月糧。扣尅川小斗。質實殺府尹楊朝棟。知縣祝敬。斗給陳伍等示衆。以其叔芝莖之長子鄭省英爲府尹。令黃安監守安平鎮。周全斌總督承天府南北諸路。自領何斌馬信楊祥蕭拱宸等。帶銃手三百。牌手三百。弓箭三百。備具口糧十日。從新溝目加溜灣巡視。見其土地平坦膏沃。土番各社俱羅列恭迎。成功錫以烟布。慰以好言。各跳躍歡舞。觀其社里。悉係斬茅編竹。架樓而居。雖無土木鞏固。實有疏林幽趣。計口而種。不貪盈餘。以布作幔。不羨繁華。誠三代以上人民也。由肅。蠶麻豆各處踏勘而回。次日大會諸提鎮參軍議事。成功曰。大凡治家治國。以食爲先。苟家無食。雖親如父子。夫婦亦難以和。其家苟國無食。雖有忠君愛國之士。亦難以治。其國今上托皇天。垂庇下賴。諸君之力。得有此土。然計食之者衆。作之者寡。倘餉一告匱。而師不宿飽。其欲興邦固國。恐亦難矣。故昨日躬身踏勘。揆審情形。細觀土地。甚是膏腴。當徵寓

兵。于。農。之。法。庶。可。餉。無。匱。兵。多。糧。足。然。後。靜。觀。釁。隙。而。進。取。黃。安。曰。開。疆。闢。土。垂。業。萬。世。諸。將。自。當。唯。唯。但。欲。寓。兵。於。農。之。法。何。如。願。請。指。示。功。曰。古。者。量。人。受。田。量。地。取。賦。至。商。雖。變。爲。井。田。亦。是。九。一。之。法。兵。民。無。分。迨。至。秦。井。田。廢。兵。民。始。分。民。任。轉。輸。兵。任。征。戰。後。漢。唐。宋。元。屢。年。征。戰。兵。甲。番。衆。籌。餉。者。徒。爲。仰。屋。故。善。爲。將。者。不。得。不。興。屯。以。富。兵。如。諸。葛。屯。斜。谷。司。馬。屯。淮。南。姜。維。屯。漢。中。杜。預。屯。襄。陽。悉。是。兩。敵。相。對。恐。轉。運。維。艱。士。有。飢。色。故。寓。兵。于。農。以。備。敵。若。夫。元。之。分。地。立。法。太。祖。設。衛。安。軍。乃。天。下。已。平。恐。虛。糜。空。乏。故。以。爲。農。者。七。爲。兵。寓。農。以。散。兵。非。無。故。也。今。臺。灣。乃。開。創。之。地。雖。僻。處。海。濱。安。敢。忘。戰。暫。爾。散。兵。者。三。留。勇。侍。衛。二。旅。以。守。安。平。鎮。承。天。二。處。其。餘。諸。鎮。按。鎮。分。地。按。地。開。墾。日。以。付。一。者。瞭。望。相。連。接。應。輪。流。迭。更。是。無。閑。丁。亦。無。逸。民。插。竹。爲。社。斬。茅。爲。屋。圍。生。牛。教。之。以。犁。使。野。無。曠。土。而。軍。有。餘。糧。其。火。兵。則。無。貼。田。如。正。丁。出。伍。貼。田。補。人。可。也。其。鄉。仍。曰。社。不。必。易。其。畝。亦。曰。甲。以。便。耕。一。甲。三。十。一。戈。二。尺。五。

一戈東西南北四至長一丈二尺五寸。今歸版圖。亦以此爲則。照三年開墾。然後定其上中下。則以立賦稅。但此三年內收成者。借十分之三。以供正用。農隙則訓以武事。有警則荷戈以戰。無警則負耒以耕。寓兵于農之意如此。馬信諸鎮咸起謝曰。藩主今日不惜辛勤。跋涉興師。開闢海外。乾坤創業。以遺子孫。誠古來之未有也。今又寓兵于農。實萬世良法。自當凜遵而行。卽日貼分各照地方。領兵前去開墾。

永曆十六年。清康熙元年。壬寅正月。成功分遣諸將屯田。忽報其父芝龍凶信。功頓足擊踊。望北而哭曰。若聽兒言。何至殺身。然得以苟延今日者。亦不幸之幸也。令文武官員各掛孝。及知毀墓。向西切齒而罵曰。生者有怨。死者何仇。敢如此結不共戴。倘一日治兵而西。吾不寸磔汝屍。枉作人間大丈夫。每與諸將言及五省沿海。人民移徙內地。嘆曰。吾欲留此數莖髮。累及桑梓人民。且以數千里膏腴魚鹽之地。百萬億衆生靈。一旦委而棄之。將以爲得計乎。徒殃民而

已。吾若不決志東征。苟徇諸將意。株守各島。豈不笑吾英雄爲其束縛。今當馳令各處收沿海之殘民。移我東土。闢草萊以相助耕種。養精蓄銳。俟有釁隙。整甲而西。恢復迎駕。未爲晚也。功在臺令過於嚴。犯者雖親信無赦。馬信諫曰。立國之初。宜用寬典。成功曰。此知其一。不知其二。立國之初。法貴於嚴。庶不至流弊。俾後之守者自易治耳。故子產治鄭。孔明治蜀。用嚴乎。用寬乎。信服其論。二月。成功檄洪旭黃廷同兄秦等。陸續載諸眷口過台。三月。成功以洪開郝關等十人。分管社事。時臺地初闢。水土不服。病者卽死。故致各島携眷俱遷延不前。有僞言南澳陳豹不遵令。已密通平南王投誠。功信之。隨手諭與經與洪旭等。令周全斌領大熾船五隻過廈門。合杜輝黃昌等師擊豹。豹聞之大驚。急集諸將議曰。必有大奸人反間。如之奈何。諸將曰。請速遣人往辨。豹曰。辨不及矣。諸將曰。若不往辨。當整船禦之。豹曰。禦之則情真矣。兩虎相鬪。必有一傷。諸將曰。不辨不禦。坐以就擒乎。豹曰。本爵自從乎公。芝龍數十載。一片肝膽。惟天可表。

今既信讒而來。辨之弗能及。禦之非本心。此乃藩主相逼。自壞長城半面。非本爵背恩而去。爾等速收拾下船。舍此一塊土。入粵投誠何如。諸將咸應曰。本爵所見極是。豹遂率衆踉蹌下船。從虎頭門投誠。平南王尙可喜爲之題請。封豹慕化伯。不數月。豹雙目俱暝。全斌領舟師到宮仔前。知豹已去。惟空城而已。急追之。獲其子士鰲。並家資報捷於經。經令斌安插百姓。交護衛左鎮杜輝守。然後班師。經因私通陳氏有娠。生男子。詭報侍妾所出。並陳豹已逝。南澳葉令杜輝暫守之。啟功大喜。頒賞臺灣諸將士。暨留守金廈。兄泰並洪旭。黃廷。王秀奇等幣帛。而又加級其妻董氏。金六錠。花紅六疋。生母陳氏。金二錠。花紅二疋。孫賞亦如之。四月。兵部司務林英。削髮爲僧。從雲南逃至廈。過台見成功。功問雲南皇上恢復如何。英曰。時當敗軍之際。李定國請皇上入峒。鳥峒。鳥之車里里。角諸蠻雜處。不相統轄。我今臨之。必無所拒。安頓主於峒內。我諸將設禦于峒口。勝則六詔復爲我用。不勝則境接交趾。召針羅諸船入海。帆船來廈。尋藩土。

合師進取。沐天波堅請當入緬甸。緬甸昔宣力於本朝。而本朝待之甚厚。素懷忠義。患難相投。必傾心相待。且此處荒外。吳三桂未必相逼。馬吉祥李國泰咸助天波之議。皇上意決。定國跪泣奏曰。臣不能挽陛下之駕。罪該萬死。請留太子。督臣等以牽制緬甸。則皇上可安寢於內。上猶豫不忍。定國辨辭。謂天波曰。明朝存亡。全擔在公。公其努力。願無生後悔。而追憶余言也。於是皇上入緬甸。馬吉祥又請旨撤去戈。爰恐驚百姓。天波請留太子入茶山。調度兵馬。庶皇上在緬甸外有盤羅之固。內有泰山之安。帝與后不允。請英見朝政出於奸輔。馬吉祥逆戚李國泰。故削髮爲僧。逃回甫至粵西。聞吳三桂師攻緬甸。吉祥等酣唱御營。出入無懼。緬人見君臣無禮。遂熾戰心。密通吳三桂。云已受辱。成功頓足曰。皇上何如此執迷。不從李定國之議。馬信請曰。皇上既被難。理應掛孝。去朔。功曰。不可。路途遙遠。莫亦耳。聞事跡。涉疑。今若以僞傳。妄舉。倘後來聖駕若在。則將奈何。仍遵朔號。候有日。西向詢其的確。然後布告中外。推有德者立。

之信英等咸曰。藩主所見甚遠。忽經差賚謝啓。暨諸王鄉紳賀啓。至功閱及尙書唐顯悅。內有三父八母。乳母亦居其一。令郎狎而生子。不聞飭責。反加賚賞。此治家不正。安能治國乎。功登時氣塞胸膈。立差都司黃統。持令箭並畫龍桶三。漆紅頭桶一。通金門與兄泰。同到廈門。斬其妻董氏治家不嚴之罪。並其子經。與所生孫。乳母陳氏。黃廷洪旭。陳輝王秀奇等。接令駭然。泰與統旭等相議曰。主母小主。其可殺乎。然藩令到。又不得不遵。以我愚意。可將陳氏與孫。殺以復命。至主母小主。我等共出。啟代爲請罪。不知列位以爲何如。旭曰。此金石至論。拜服拜服。隨將所議啓董夫人與經。經與董夫人曰。此可於法兩盡。遂出二人。斬之。將頭付黃統。過台報命。功不允。解所佩劍交黃統。再來金門見泰。必當照令而行。泰躊躇送統先過廈門。見經。經急將統等拘禁。與旭等相議。報蔡鳴雷從台灣來。經傳問台信。鳴雷曰。藩主誓必盡誅。如有違者。將及於監。斬諸公。且有密諭往南澳與周全斌。旭曰。世子。子也。不可以拒父。諸將。臣也。不可以拒

君惟泰是兄。兄可以拒弟。凡取糧餉諸物。自當應付。若欲加兵。勢必禦之。遂將此意通鄭泰。立遣援剿右鎮林順帶領兵船出守大担。適周全斌征陳豹回歸。黃廷慮其有受成功密諭爲變。啓經先下手爲強。全斌不可縱。經然之。全斌入見。執交援剿左鎮黃昌監守。功接廈門諸將公啓。有報恩。有日候闕。無期之句。知金廈諸將拒命。心大恚忿。即使洪有鼎持諭與周全斌。令其回師監殺。有鼎到南澳。船上銅山。聞全斌業已被執。不敢前。五月朔日。成功感風寒。但日強起。登將臺。持千里鏡望澎湖。有舟來否。初八日。又登臺觀望。回書室。冠帶。請太祖祖訓出。禮畢。坐胡床。命左右進酒。折閱三帙。輒飲一杯。至第三帙。嘆曰。吾有何面目見先帝於地下哉。以兩手扳其面而逝。左右報其弟襲暨黃安馬信入視。信令出紅帛蓋之。然後通知各文武。祭奠舉哀。成功於戊寅歲。年十五。補南安學弟子員。屢試極等。而兩赴鄉闈。至乙酉年二十二。父芝龍引見。隆武賜姓名。丙戌年二十三。秋九月。不從父屈辱。潛匿金門。丁亥年二十四。以隻身而奉。

故朔海島羣雄，拱手聽其約束。五省移徙，避其鋒銳。且當敗喘息，又能鎮定，強戰繼而開闢海外乾坤。至壬寅歲五月初八日逝，年三十九歲。屈指統衆計一十六載，以忠義自誓，嚴治軍旅，推心置腹，臨事身先，計策已決，賞罰無私，仇親兼用，噫，可爲人傑矣哉！襲始治喪，差人往金廈報訃。十三日，馬信以哭泣傷懷染病死。一時臺中皇皇，諸將舉襲護理，以安衆心。襲心腹藁雲、李應清、曹從龍、張驥四人謀曰：「護理不過數日而已，豈能南面自尊？」雲曰：「弟承兄業，理之最正。但苦無援耳。」驥曰：「欲舉此事，當謀之有兵權者方可。」先達主公，然後候吾探各鎮說之。從龍曰：「此論誠是。」四人遂密告襲，襲歡然許之。驥卽往黃安營中見安曰：「世子亂倫，情急於勢，黨衆拒父，今幸藩主晏駕，可以無慮矣。」安曰：「年少舉動，是左右無人矣。虎雖惡，不傷其子，豈可率衆相拒？」驥曰：「如公所言，此不孝烏可承統乎？」安曰：「此何說？」子承父業，誰敢異心？驥見安辭色嚴厲，知不可說，佯曰：「子承父業，理之正也。吾所言者，死恰其時，可以解釋父子相仇耳。」遂辭安出，往

黃昭營中見昭曰。護理知公勤勞。令驥致意。昭曰。昭有何能。乃荷護理注存。若是驥曰。護理計台灣戰功。惟公居最。恐世子不知耳。昭曰。世子遠隔。烏得而知。驥曰。藩主之死。死恰合時。可以免世子拒父之罪名。昭曰。觀其所行。真不堪爲人上。驥曰。金厦臺灣。業成水火。昭曰。然。驥曰。公握重兵。扶護理於臺。護理豈肯忘公乎。昭曰。護理仁慈。弟也。弟承兄業。未爲不可。我非貪涎爵祿。亦擇主而事。候與中衝合謀。驥曰。此誠妙算。公當速行。吾歸以公言報護理。驥遂回啓。襲割衣襟。令驥與昭結爲姻。囑速通中衝舉事。是夜黃昭到蕭拱宸營中。對拱宸曰。烏中世子。治兵以拒父。臺灣獨不可承兄以繼統乎。拱宸曰。此亦公論。世子行既不正。護理仁慈。承繼大統。名正言順。遂合謀。次早密報襲。襲與曹從龍。蔡雲。李應清。張驥商議。從龍曰。可假藩主遺言。數世子罪狀。命弟繼統。方可以服衆。襲曰。此計誠妙。汝可速書遺意。付昭等行事。襲卽假成功遺言。出告四方。黃昭。蕭拱宸卽扶襲爲東都主。分兵拒經。其餘諸將。陰持兩端。觀望。獨黃安心。

忿陽爲和悅密遣人坐小哨以報經請經速治兵過臺遲則安固難動也十四日經接訃音隨欲設位掛孝洪旭曰國不可一日無君當先嗣位然後發喪經從之洪旭黃廷王秀奇等同諸文武修表達行在請經就廈門嗣位稱曰世藩布告各島臺灣方舉哀十八日又得提督建威伯馬信因哭泣過傷死報經愈大悲慟厚恤其家二十一日報諸將奉其叔襲護理六月初二日接黃安密陳黃昭蕭拱宸二賊假先藩遺言命襲爲東都主業分兵拒險啓經駭然旭曰事久多變速出周全斌過臺灣正位經是之出全斌爲五軍都督以陳永華爲諮議參軍馮錫范爲侍衛整兵欲東七月總督李率泰於五月二十七日從福省起程六月初三日到泉接効用總兵林忠暨沿海塘報咸稱成功在臺發狂身死隨飛請靖南王耿繼茂暨安輯投誠郎中賁岱金世德等星馳抵漳共商剿撫事宜繼茂立使都司王維明率泰使都司李振華同林忠前往廈門諭以朝廷誠信待人若釋疑遵制削髮登岸自當厚爵加封招撫之經因而未果行與

伯泰洪旭黃廷陳輝王秀奇暨諸參軍會議總欲倣朝鮮例不削髮稱臣納貢而已復之。送林忠等回漳。八月繼茂率泰復使林忠等再到廈門諭欲其將所陷州縣等印信送還。並差員入漳勸議。資本往京請旨。經復與泰廷旭等密議。曰東寧初關先王陡爾仙逝。茲又遭蕭黃二賊搆釁於內。藩院聞信頻頻遣員招撫。順之有負先王宿志逆之則指日加兵。內外受困豈不危哉。不如暫借招撫爲由。苟延歲月。俟余整旅東平。再作區處。諸君以爲何如。旭曰陽和陰違。侯靖內患。再作籌畫。藩主所見甚明。可令楊來嘉吳蔭爲使。將前日所得各州縣學印共一十五顆付來嘉入漳報命。茂與泰厚待嘉蔭二人。泰啓茂曰海上屢執朝鮮例。遲延觀望。茲因成功已死。叔姪爭權。勢已搖動。其佐如鄭泰洪旭黃廷等可用。反譟計間之。使自相猜疑。然後剿撫兼用。茂曰此誠妙論。以所有侯伯印並送回諸印。將楊來嘉改作鄭泰洪旭黃廷之使。密獻兩島。題報倡揚以亂之。繼茂首肯而行。九月初十日繼茂題疏曰爲馳報海上輸誠情由仰祈睿

裁事。案據沿海鎮將塘報稱鄭成功在臺灣發狂身死。海上人心搖動等情。隨經會同督臣具疏題報。一面分佈間諜。庶可招徠。維時督臣先赴漳州。相機調度。嗣聞確信。於六月初八日。帶兵自省起行。冒暑驅馳。至泉州大盈駐。暫秣馬。隨准督臣差副將林忠赴臣軍前云。海上鄭泰等。令僞總兵盧恩差人陳贊前來。據稱欲來投誠等語。併接督臣手書。約臣面商。臣隨於七月初三抵漳州。初十日。僞爵鄭泰洪旭黃廷差僞中軍都督楊來嘉吳蔭到漳謁見。據其來議。多有未諳。臣與督臣切直開示。遣發後。復差僞遊擊姚萬前來。求發的當官員到彼。願繳勅印歸順。臣與督臣同安輯投誠郎中賁岱金世德會商。仰體朝廷德意。隨差臣下都司王惟明。督標都司李振華。同副將林忠前去廈門。諭以我朝誠信待人。須盡釋疑慮。遵制剃髮。繳僞勅印。並造投誠各官兵船隻器械。人民戶口文冊。選差的員。一同進京。奏請定奪。八月二十五日。差官回漳。據稱海上各僞官一時尙未剃髮。俟奉旨後。方行剃髮。其僞勅印有現督事者未交。恐

失印難以約兵。惟三僞侯先繳僞勅。其管兵船隻人民冊籍。先開總數。侯題請命下方。備造姓名繳報。又據僞建平侯鄭泰。僞忠振伯洪旭。僞永安侯黃廷。投到咨呈。內稱爲仰承德意。傾心歸命。披瀝真誠。恭祈疏請事等情。先繳勅三道。現任伯爵銀印一顆。原封公爵銀印一顆。原取州縣銅印一十五顆。仍專差掛印都督楊來嘉赴關待命。以彰歸命之誠等情。臣因全文繁多。不便備錄。該臣看得渠逆鄭成功。竊踞海島。縱橫有年。思以臺灣爲窟。一旦遽服天刑。宜乎人心悔過。臣等宣布皇上德意。多方開導。今據僞侯鄭泰。洪旭。黃廷。具文繳勅。差官投誠。此皆皇上寶籙誕膺。德威遐擧。遂使四海望風。羣情效順也。臣伏覩國家仁恩浩蕩。凡屬山海餘氛。果能真心向化。卽擁一旅尺土來歸。均荷寵頒爵賞。今三僞侯。以全海之兵民土地。還之皇上。據其冊開僞文武官員二千五百六十員。水陸官兵四十餘萬名。大小戰船五千餘號。海上軍民籍及流寓人口三百餘萬。果係真實。其功甚大。所有情節。具悉來咨中。現呈御前。必蒙睿

覽洞鑑中。以安反側之心。而慰歸依之望。在廟堂自有碩畫。無俟臣愚爲之臆揣矣。事關至大。理合據詞奏聞。臣擬九月十二日。帶兵回省。謹題率泰之疏。稱該臣看得渠逆鄭成功。倚海橫行。作孽多年。一日天使殞亡。正致四海清平之日也。適當逆孽報殞之時。人心搖動之際。臣等仰體皇上德意。廣布招徠。今據僞建平侯鄭泰。僞忠振侯洪旭。僞永安侯黃廷。具咨投誠。差僞都督楊來嘉赴關待命。此實皇上天威遠震。廟算遐敷。使海島渠魁。咸思歸心。歸命者也。臣竊見大清開關以來。凡山海梗化之徒。或率大衆輸誠。或獻一島來歸者。莫不錫之厚爵。委以地方。今三僞侯統率全海之衆。據其冊開勳爵文武兵民船隻器械。雖是總約之數。未知果否真實。亦可謂大夥輸誠。其功亦甚偉矣。所有來咨併原冊。進呈御覽。必蒙睿鑑。今皇上寶籙初登。率土賓服。茲僞侯鄭泰等聞風效順。皇上必不靳高爵厚祿。破格賞錫。慰其來歸之念。用安反側之心。庶氛浸得靖。海邦可寧矣。同題送楊來嘉入京待命。隨檄水師提督施琅。左路水師總

兵李長榮。右路水師總兵杜永和。福寧總兵吳奠福。右路總兵王進功。同安總兵黃翠。暨提督馬得功。海澄公黃梧。各按兵相機。密布間諜。以亂賊心腹。鄭經亦乘招撫之暇。將金廈各島交伯泰。洪旭。黃廷。王秀奇等。共轄調度。另馳諭銅山黃元。南澳杜輝。謹防許龍蘇利。竝謂旭等曰。先王開闢東土。以爲進戰退守。曾奈未遂。所願而蒙。余今欲整旅正位。而藩阮又卷卷致意。故遣楊來嘉前去。回日果能息兵安民。無墜先王一片孤忠苦節。余無不唯唯。是從。旭曰。歷計招撫。總差削髮二字。藩主東行克捷。則威聲復振。藩阮雖智。萬難搖動。若楊來嘉果有的確旨意。准照朝鮮事例。旭等自然一面飛報。一面料理妥當。赴各島防範。毋煩藩主過慮焉。十月朔日。經祭江。初六日。經同周全斌等舟師東去。初七日。午刻。經從澎湖收入娘媽宮。初八日。祭祀山祇。巡視諸島畢。卽欲揚帆。永華曰。凡事必先以禮。然後加兵。則師出有名。當藩主新喪時。國家無人。諸將請襲。護理。彈壓軍民。亦未爲非。今須先通知退避。迎接着各官如何舉動。方可進兵。

若不通知。驟然進兵。舉動慌張。亦非爲人上。所宜爾。全斌曰。陳參軍所言。誠爲至論。不通知。是無故自生疑忌。亦非所以待親親。以服衆心。况龔爺明係諸將。公請護理。非其自專。雖據黃安片字。豈可全信。經曰。若非二公指示。幾乎舉動輕率。貽笑四方。卽令禮官鄭斌賚諭。往台布告。不日世藩親統六師。抵臺奔喪。如各鎮分屯守土者。就在本處設位等語。斌到台。諸將觀望無敢言。獨黃昭蕭拱宸二人出爭曰。世子嗣繼大統。理之正也。誰敢背主易言。但世子奉命守國。而亂倫致先王大怒。賜死者再。又不能悔過自新。而反統兵據國。此自古以來。亦未有是子。使先王日夜捶胸飲恨而死。旣而明知其子之惡。難居人上。故遺言傳位與弟。非諸將敢竊萌異念。况龔爺仁慈勇敢。先王愛惜。不離左右。今承兄遺命。承兄大統。亦是守先王之土地。煌煌遺言。誰敢逆之。卽將所假成功。遺言書付鄭斌。回澎湖。復經斌到澎。出其遺言。竝陳黃昭蕭拱宸二將拒命之言。全斌曰。形已成矣。師出有名。卽命諸鎮整旅。下船出泊西嶼頭。候風。經於十六

日開駕東向黃昭蕭拱宸既發鄭斌回遂會蔡雲曹從龍張驥李應清見襲議曰如今勢不兩立鄭斌此去世子必然整師爭位但一不做二不休今舉拒絕全肩担子悉在汝我二人成則爲功首不成乃罪魁也襲曰軍旅之事全賴二公再無敢忘今日昭曰觀諸將之心實陰持兩端未可重托但世子諸將未諳地理不足爲慮惟周全斌一人曾隨師來進剿情形周知大隊雖未必從砲臺前經過然砲台實係安平要緊不可不預防當此重任者非曹從龍不可龍聞言挺身出曰今日二公不惜身家而扶主從龍又烏敢惜此微勞而不謹守砲台乎隨帶兵往守安平砲台昭曰安平一帶可以無慮矣時全斌心從潦港洲仔尾登岸非我二人禦之不可潦港我帶兵往守洲仔尾當仗蕭公前去拱宸毅然曰吾獨當之兵法有云半渡可擊將所有大小煩船盡數列於洲仔尾潦港岸上莫說周全斌一人卽有周全斌百人亦不能展其技也另再將大小煩船令吾左協李成同張驥督從鹿耳門乘潮漲抄入合攻他軍若不覆沒想所

存亦無幾矣。昭曰：此計更妙。令蔡雲帶親隨五百人，同李應清在赤嵌一帶監督諸鎮策應。昭與拱宸隨帶各本部將士分守濠港洲仔尾，以待經舟師至鹿耳門。問全斌曰：諸將士未曾經歷此土地，情形有所不知。公同先王征戰，必然諳熟。今欲進兵，當從何條港路登岸？全斌曰：紅毛所恃者安平砲台。今安平一路船隻切不可從此入。黃昭必遣人把守大隊，仍從赤嵌那邊濠港洲仔尾登岸。經曰：濠港洲仔尾恐有備，將奈何？全斌曰：黃昭拱宸二賊久經歷練，又從先王征戰臺灣，地方周悉，必能設險固守。但斌料護理軟懦，諸將咸係逼從。所恃蕭黃二賊而已。二賊必不托人，定自把濠港洲仔尾二處。今可差快哨賚命諭從安平而入，過赤嵌布告云：叔姪至親，並無間言。因黃蕭二賊陰謀不軌，乘先王賓天，遂從中構衅，假造遺言，離間骨肉，煽惑軍心。爾諸將士悉受先王數十年養，豈有相從作此背逆，係脅逼之故？余自當相諒，亟宜悔過，倒戈生擒二賊，共扶王室。名垂竹帛，一可以慰衆心，二可以亂此賊之心。曲經從其

議。即差兵都事張宸。賚諭坐小快哨至安平。過赤嵌布告。龔急問黃昭。昭曰。此不過搖動軍心。何足介意。當嚴部伍。以決勝負。經船到港。不金鼓。不旌旗。寂然寄椗。一條鞭灣住。十七早。大霧蔽天。對面不見。全斌急請經治兵登岸。經曰。如此霧安可進兵。斌曰。此皇天默祐先王神靈。故有此霧。黃昭機智勇畧。提防必周。沿邊設砲。半渡而擊。安能登岸。今乘此霧。盡將隊伍分散。而上。昭不及防。沈舟背水。此其時也。經從之。因誓師曰。今日諸將登岸。背水一戰。誓無生還。遂統兵。啣枚而上。經立陣甫定。黃昭聞水聲。人語。首先督衆奮勇而前。連砍數十。經衆大潰。適全斌大呼曰。後面是水。大丈夫寧可死於戰。不可死於水。吾已將船棄。擲可速從吾前往。全斌奮先破殺。諸軍聞之。悉反助戰。喊聲震天。黃昭身中流矢死。軍士無主。大亂。而霧遂消。天明。則日已過午矣。全斌疾呼。世藩已到。黃昭已死。諸將速倒戈。安向前曰。此子吾主之子。當往迎之。經免盔相示。諸將悉解甲投戈。經撫慰之。全斌曰。且漫慰問。急據大營。俟斌親收蕭賊。經是之。全斌

率諸將士敵拱宸。宸出敵。全斌高叫曰。罪在蕭賊一人。與爾諸將士無干。悉解散。無得助虐。宸軍聞之。果各星散。拱宸被擒。經令鄭斌請襲。至相抱而哭。曰。幾爲奸人離間。其待襲如初。卽收蔡雲張驥李應清曹從龍等。同蕭拱宸斬首示衆。其餘不問。衆大悅服。經既靖內難。遂各安插於黃昭營中。搜出伯泰交通書數封。悉係囑其扶翼拒經。金廈他自爲之。經藏而人毋知焉。仍以鄭省英爲承天知府。十一月。經同周全斌往南北路巡視撫綏。十二月。楊來嘉從京回廈。報必欲剃髮登岸。洪旭仍令其鎮守崇武地方。遣員過台。啓經招撫不成。

臺灣外記上卷

二百六十二

光緒三十三年七月
光緒三十三年七月
初版
發行

(臺灣外記全部兩冊)

每冊定價大洋五角



重校者 均益圖書公司

印刷者 國學叢書社

總發行所

均益圖書公司

在上海老垃圾橋北開封路永安里

6

752733

(2)